

**NATIONAL ASSEMBLY OF
SEYCHELLES**

Wednesday 5th July, 2023

The Assembly met at 9am

National Anthem

Moment of Reflection

*Mr Deputy Speaker in the
Chair*

MR DEPUTY SPEAKER

Bonzour tou Manm Onorab. Travayer Sekretarya Lasanble Nasyonal e tou manm piblik ki a lekout. Byenveni pour nou sesyon Lasanble Nasyonal ozordi, Merkredi le 05 *juillet*.

Nou travay pou prensipalman dominan par Mosyon ozordi dapre nou *Order Paper*. Donk, mon ava envit premye – loter premye Mosyon Manm Elekte pour distrik Grand Anse, Mahe Onorab Waven William, pou...

Avan sa, mon war lanmen *Leader* Lopozisyon anler. Ou annan en *issue* Onorab?

HON SEBASTIEN PILLAY

Mersi Mr Speaker. Mr Speaker, mon annan en *matter of privilege* ki mon le *raise* devan Lasanble, e sa i konsern en size ki retourn otour en *PNQ* ki mon ti'n anvoye yer. Me

ki Lasanble pa ti kapab pran, akoz Minis ki sipoze reponn sa kestyon, pa ti dan pei.

MR DEPUTY SPEAKER

Proceed ou.

HON SEBASTIEN PILLAY

Mersi Mr Speaker. Mr Speaker, Lendi bomaten parey koutim, mon ti anvoy en *PNQ* pou demande ki;

Si eski Minis responsab pour Lagrikiltir i kapab eksplike akoz ki ziska la *STC*, pa ankor enport okenn manze zannimo, e pri ki bann fermye pe peye pa ankor desann?

Mr Speaker, mon ti anvoy sa kestyon swivan serten *statement* ki ti ganny fer par Minis Dezinyen - Minis Jean-Francois Ferrari, lo en Kestyon *Without Notice* ki Onorab Wallace Cosgrow ti anvoye dan Lasanble menm.

Swivan sa bann *statement*, nou'n swiv e regarde ki pe pase avek bann fermye, mon ti deside anvoy sa *PNQ*.

Lasanble ti enform mwan - e la mon bezwen dir ki Lasanble pa ti *aware* kan Minis pe vin dan pei. E Lasanble ti fer son *due diligence* pou enform mwan, ki nou pa pou kapab pran sa kestyon Mardi, me Merkredi.

E mon pou remersye Lasanble pou ofer pour ki nou

kapab pran sa kestyon Merkrede.

Me *however*, nou ti *then* ganny lenformasyon ki Minis pa pe antre Mardi swar, me i pe antre plito Merkrede swar e alors nou ti bezwen sanz sa PNQ. E mwan mon ti agree pou sanz sa PNQ.

Me sa ki mon dezapwente Mr Speaker, se kot mwan mon montre bonnfwa, i paret poudir Gouvernman i fer en lot kalite keksoz.

Yer swar dan nouvel, sa menm size ki konsern mon PNQ in ganny pase koman en *news item* e pe ganny kouver dan nouvel. E son size pe ganny diskite dan nouvel.

Sa i montre mwan Mr Speaker, ki poudir i annan en manipilasyon politik ki pe ganny fer otour sa size.

Pou anpese ki nou met presyon lo Gouvernman, pou *hold* li *accountable* pou bann *statement* ki i vin fer dan Lasanble Nasyonal, e pou kouver sa bann size devan Lasanble Nasyonal.

Sa ki enteresan Mr Speaker, an relasyon ek bann *statement* ki Minis Ferrari ti fer dan Lasanble, yer swar dan nouvel kot i ti koz lo; *warehouse* in fini pare e ki manze zannimo pe ganny fer vini, sa i pa korek ditou, e sa ki'n ganny dir dan nouvel i totalman kontrer avek sa ki

Minis in dir nou devan Lasanble.

So sa i *raise* 2 problem. Enn; lefe ki Gouvernman – e mon konvenki Gouvernman in manipil sa sityasyon pou anmenn sa size dan domenn piblik, avan ki nou kapab anmenn li dan Lasanble.

Me dezyenm, se ki Minis Dezinyen, ki pa ti'n prepare pou reponn sa kestyon, pa'n kapab donn Lasanble lenformasyon korek otour sa size. E sa in kree serten konfizyon parmi – pa zis bann ferme, me osi parmi lezot endividi ki enterese avek sa size.

Mon demann ou alors Mr Speaker, pou *rule* lo sa size. E ki *dorénavant*, malgre ki mwan mon'n montre bonnfwa lo sa konteks, i pou difisil lo mon konte pou *trust* sityasyon ki pe pase - pa ki mon pe blanm Lasanble Nasyonal.

Me pou *trust* ki Gouvernman, lo son kote pou osi montre bonnfwa ler nou dan Lopozisyon nou dakor pou sanz en size ki nou'n met lo *Order Paper*, akoz ki Gouvernman pa dan en pozisyon a sa moman pou li vin reponn.

Ou a konpran Mr Speaker, ki mon santi poudir sa bann keksoz koumsa pa devret arive, e ki i devret annan plis respe pou nou lenstitisyon.

E mon remet ankor lo rikord – e mon ti a kontan *SBC* i pas sa; ki mon, mon santi poudir i annan en manipilasyon politik deryer sa size.

Sa size i ekstrememan enportan pour en kantite endividi, sirtou bann ferme. E i en size ki bezwen ganny rezourd o pli vit posibil, pou asire ki kou prodiksyon pou bann ferme i reste ba.

E ki pri ki bann endividi, ki bann konsonmater pou peye lo marse, osi pa monte. Akoz kou pou bann ferme i monte? Mersi Mr Speaker.

(APPLAUSE)

MR DEPUTY SPEAKER

Mersi Onorab pour ou komantr ki mon resevwar.

Ler ou'n *call* mwan bomaten pou enform mwan ki ou pou *raise* sa *matter of privilege*, mon ti'n deza donn ou en bout mon pwennvi lo sa size, akoz mon *background* i medya.

So, letan nou'n fini koze, mon'n *call newsroom SBC*. Mon pa'n ganny zot *Chief Editor* akoz i dan konze medikal. Mon pa'n ganny Manmzel Evenor ki pa ti ankor antre.

Mon'n koz avek *Deputy CEO SBC*, ki in ale - mon'n demann li pou rod en pe lenformasyon pou mwan.

Mon'n koz avek Sekreter Sekreter Prensipal - konmsi *the Secretary of the PS of Agriculture* ki'n dir mwan poudir *PS* pa dan pei, e i pa ankor rantre letan nou pe koze la.

E mon'n osi koz avek Zofisye Relasyon Piblik sa Minister ki manmzel – plito Mrs Dubignon.

Now, sa ki mon'n ganny enformen avek *SBC*, Manmzel Wirtz; depi semenn pase, i annan 2 zournalis *SBC*. Enn i apel Alison, enn i apel Sandra. Zot ti'n deza asiste en *workshop* ki ti annan sa topik manze zannimo. E ti annan en *press release* ki ti'n sorti *sometimes* an Zen.

E zot konman 2 zenn zournalis ki enterese, e ki anvi *follow up* bann aktyalite, depi semenn pase zot pe pran kontak avek Minister Lagrikiltir, pou ganny en *interview* lo sa size. Akoz ti annan sa dat le 1er *juillet* ki ti ganny dir manze pou komans vann.

So, baze lo la depi semenn pase zot pe fer demars pou zot ganny sa *interview*, e ki'n konfirman avek mwan par *Public Relations Officer* – Mrs Dubignon.

In dir mwan poudir par lefet ki *PS* pa ti dan pei. Nou'n war li lo televizyon zot in al asiste – ansanm ek Minis Joubert, en some *somewhere*

Lerop mon krwar. E alor *interview* pou donner demen.

Donk mon le reasir Onorab *Leader* Lopoziyon, e Lasanble Nasyonal e piblik Seselwa, ki in napa manipilasyon politik par Gouvernman, pou esey tir karpèt anba lipye *Leader* Lopoziyon - pou anmenn en size dan piblik avan ki i ganny adrese atraver en *PNQ* dan Lasanble Nasyonal.

E langazman Egzekitif i reste. Mon le donn ou mon lasirans poudir, mon ti koz avek Prezidan Larepublik Lendi, ki anfet i ti son lof pour Minis vin Merkredi bomaten pou koz lo sa size. So, napa manipilasyon politik. *SBC* pe fer son travay konman en lenstitisyon endepandan.

E nou, nou ankouraz zot pou rod bann size, fouye, met a latansyon piblik. An menm tan i annan langazman Egzekitif - parey mon pe dir zot, Prezidan in koz ek mwan Merkredi. I ti oule Minis vini ozordi bomaten. Nou pou sanz *Order Paper*, pou Minis kapab pran sa kestyon.

So, mon oule zis reasir ou Onorab ki napa malis - napa malis e zis ki i en move koensidans ki in arive. Minis pa'n dan pei - si non ou *PNQ* ti pou monte Mardi.

So, me selman *still*, ler zot pou donn sa *interview* se *PS* Lagrikiltir ki pou koze. *But*

we can have the Minister to answer the question. It will be 2 different situation. So, nou still kapab pran sa PNQ Lendi - I mean Mardi, si zanmen ou *still* enterese pou adres sa size dan lasanble.

Vwala alor larepons lo ou *matter of privilege*. Mersi. Ou le fer en komanter lo sa ki mon'n dir?

HON SEBASTIEN PILLAY

Mersi-mersi Speaker. Mr Speaker, mwan mon lentansyon se fer sir poudir mon pa trenn Lasanble dan sa sityasyon, e mon apresye sa ki ou'n dir mwan.

Konman en politisyen mon pou pran sa ki ou'n dir mwan avek en serten rezervasyon. Me selman en keksoz ki mon let met lo rikord, mon ti a kontan ki Lasanble i realize ki zefor ki mon pe mete pou kontinyelman met presyon lo sa size, pou ki nou kapab war en finalite e en solisyon ganny anmennen pou bann endividi ki ganny afekte ek sa size.

Sa ki *SBC* in dir ou i enteresan Mr Deputy Speaker, kan mwan mon'n bezwen fer plizyer konplent, plizyer fwa lo la fason ki raportaz i ganny fer, lo sirtou an sa ki konsern travay ki mon *Caucus* i fer.

Me neanmwèn, nou pe ganny en deba kordyal bomaten e in pa mon

lentansyon pou gat lespri ki nou'n konmans sa travay bomaten. Mon ava pran sa ki ou'n dir mwan. Be lefe i reste ki mon santi poudir Gouvernman i devret tret bann size ki nou pe met devan Lasanble avek, en pe pli serye.

E mon lentansyon se pa ki karpet i ganny tire anba mon lipye. Me mon lentansyon se fer sir ki nou annan en solisyon pour sa problem.

Zis parey, Mr Speaker ou a permet mwan, yer swar nou'n vwar dan nouvel ki Departman Lagrikiltir pe lans Program Sterilizasyon pour bann lisyen, ki ti en size ki nou ti anmenn dan Lasanble.

E ki sa i montre ki Lasanble i annan en rol pou zwe, pa zis nou kote latab be lot kote latab tou Manm, pou nou anmenn bann solisyon ki i kapab satisfere nou popilasyon.

Avek sa Mr Speaker, mon osi le met lo rikord ki; mon ti a kontan ki Lasanble i *intercede* avek L'Egzekitiv pou asire ki dan sirkonstans kot nou annan bann kestyon teknik, ki sa Minis ki vin reponn sa kestyon dan Lasanble, i pa fer bann *statement* ki *misleading*.

Be anfendkont Mr Speaker, nou pou agree pou dezagree lo sa size manipilasyon politik. Mersi.

MR DEPUTY SPEAKER

Mersi Onorab. Onorab Cosgrow mon war ou lanmen anler. Ou annan en...?

HON WALLACE COSGROW

Yes, Mr Speaker. Bonzour Mr Speaker. En *matter of privilege* bomaten ki'n *arise* an relasyon avek sa ki *Leader* Lopoziyon in met devan Lasanble ozordi.

Mr Speaker, ler mon ti demann sa kestyon *Question Without Notice* pour Minis Lagrikiltir, ti ganny reponn par Minis Dezinyen Minis Ferrari.

E dan larepons ki Minis Ferrari ti donn nou, nou ti anba lenpresyon *or* i ti donn nou garanti ki *STC* ti'n fini fer demars pou konmans fer vini manze zannimo.

E ki ti annan en *warehouse* ki ti'n pare, pou kapab distribye bann manze zannimo avek bann ferme ki fer elevaz zannimo. Me lenpresyon, Mr Speaker ki nou pe gannyen avek reportaz i se ki, sa lenformasyon ki Minis ti donn nou pa korek.

E mon le konnen ki mannyer Lasanble i *deal* avek en sityasyon kot; Minis i vini, swa i donn nou lenformasyon ki pa konplet, ouswa lenformasyon ki pa korek?

Akoz pou mwan sa i ti en *clear attempt* pou *mislead* nou Lasanble, an sa ki konsern lenformasyon.

E mon zwenn avek *Leader* Lopoziyon pou

demande ki, ler i annan bann kestyon teknik koumsa, se sa Minis ki vini ki reponn, ki domin son size, pou *avoid* ki nou war sitasyon kot en Minis i vini i donn nou nenport kwa lenformasyon.

Aprè pli tar dan medya, nou al war poudir sa lenformasyon i pa enn ki ti korek. Sete sa mon pwen - mon *matter of privilege* bomaten, Mr Speaker. Mersi.

MR DEPUTY SPEAKER

Mersi Onorab pour ou komantr. Sa ki mon ti a kapab partaze i se ki - ou konnen... Onorab Cosgrow pou konn sa pli byen ki mwan, aköz li in deza servi koman en *Cabinet Minister*.

Mon pa krwar poudir lentansyon okenn Gouvernman - ki ganny elekte sirtou, i son lentansyon, ouswa son fason travay pou *mislead*, pou donn lenformasyon ki pa korek piblik.

Mon pa krwar sa i - aköz par natir imen. Be zis bann move dimoun ki pou fer bann keksoz koumsa.

So, letan Minis Dezinyen in vin la, lentansyon Gouvernman sete pou ki sa proze i pare e demare le 21. E sete nou koman adilt ki ti bezwen aksepte poudir; *ok*, lentansyon se pou komanse le 1er *juillet*.

Me apre nou konnen, i kapab arive bann keksoz ki anpes sa keksoz pare, pou retar ki an deor kontrol. I kapab arive. Anfet dan Sesel in annan en kantite keksoz ki lentansyon i bon, ki'n dir pou fer me nou pa ankor kapab fer ziska prezan.

Lentansyon pou nou konstrir en dezyenm *runway*, i la! I lentansyon tou Seselwa, ki kote parti politik ou debout. Be nou pou dir alor Gouvernman pe *mislead*, Gouvernman pe koz manti, Gouvernman pa pe donn lenformasyon ki korek? Nou pa ankor pare pour diferan faktor.

Nou merit kapab aksepte sa nou koman bann adilt ki dan Lasanble, ki fer fas avek sa bann sityasyon. Me nou reste annan sa privez pou kri bann lotorite konsernen, e demann zot annan ekrir, an verbal. Nou, nou annan sa privez pou kestyonn e fer en *oversight* - ki nou responsabilite i demann nou fer - lo sa size.

So, mon pa krwar Onorab. E mon reasir ou poudir i ti lentansyon ouswa bi Minis Dezinyen pou vin la devan, e donn lenformasyon ki pa korek e *mislead* nou avek Lepep Seselwa. Sa mon persyade i pa ti ditou leka.

Me i zis ki annan bann faktor ki pa'n fer arive pou

kapab demare le 1er *juillet*. Me nou *still* annan loportinite pou egorl sa size pli tar. Mersi.

Donk, mon krwar nou'n ariv lafen sa bann *issues*. Nou ava aprezan envit Onorab Waven William pou prezant son Mosyon e Manm i ava segonde. Apre nou ava retourn lo Onorab pour son prezantasyon. Mersi.

HON WAVEN WILLIAM

Mersi Mr Speaker. Bonzour tou dimoun ki a lekout. Mr Speaker, Mosyon ki mon pe prezante i lir *comme suivant*;

Swivan mank presizyon e gaspiyaz resours dan lenplimantasyon serten proze e donn servis o nivo kominote, Lasanble i demann ek tou akter kle dan kominote pou kontinyen revwar zot lapros pour en meyer rezilta. Mersi.

MR DEPUTY SPEAKER

Mersi Onorab. Mon ava ganny en dimoun pou segonde. Onorab Michel Roucou?

HON MICHEL ROUCOU

Bonzour, Mr Speaker. Mersi. Bonzour *à tous*. Mr Speaker, mon le segonn sa Mosyon. Mersi.

MR DEPUTY SPEAKER

Mersi Onorab. E mon ava demann aprezan Onorab William pour fer son prezantasyon.

HON WAVEN WILLIAM

Mr Speaker, Mosyon ki mon pe anmennen, mon ti a kontan klarifye serten keksoz ki i ava ed Manm letan zot fer zot diskisyon, konpran en pti pe pli byen pou zot kapab fer zot lentervansyon.

Mr Speaker, letan mon pe refer avek bann akter kle dan kominote, mon pe refer avek bann Lazans Gouvernman. Mon pe refer avek bann Sekter Biznes Prive.

Mon pe refer avek bann sosyete sivil ki'n enplike osi dan bann aktivite dan distrik. Mon pe refer finalman avek piblik an zeneral konman sitwayen dan bann kominote.

Mr Speaker, par lefe ki sa Mosyon in vin lo *Order Paper*, ouswa in ganny anmennen, se ki pou demontre ki enn; parey nou'n vwar dan *meeting* piblik - nou annan konsern avek lafason ki bann keksoz pe ganny antreprann o nivo distrik.

E osi pou demontre poudir; regarde, dan devlopman en pei i touzour annan lespas pou fer progre e pou fer pli byen.

Mr Speaker, menm si serten lot kote latab i vekse ler mon nonm non Bondye, mon pou kontinyen donn tou louanz e laglwar Bondye Tou Pwisan ki'n fer pep Grand Anse, Mahe swazir mwan pou

koz pou zot, e pou reprezant zot dan movetan e dan botan.

Mr Speaker, in fer mwan konfyans ki desizyon ki mon pran isi dan sa Lasanble, zot konnen i bann swa fonde lo lasazes e pridans.

Mr Speaker, ki la ankor se Bondye ki diriz mwan ek pridans, lasazes, dizernman e konprenezon.

Mr Speaker, sa 2 mo dizernman e konprenezon, in diriz mwan pou pran bann desizyon desiziv ki ozordi mon apresye ki mon ti byen, e ki mon pa zis ti pe argye ouswa rebele.

Ti annan sa nesesite, Mr Speaker, pour sanzman radikal dan gouvannans - pa pou mon lentere personnel, me pou soutenabilite lavenir Sesel dan sa vilaz global e ki tirbilan.

Mr Speaker, Mosyon ti dan *pipeline* avan ki linisyativ *meeting* piblik dan distrik. Mosyon in vin a en moman apropiye, par lefe ki sitwayen dan tou distrik in koze, prezidan in ekoute e piblik an zeneral in swivre. Menm Seselwa aletranze.

In vin dan en bon moman apropiye, aköz Prezidan in konklir par dir ki prezan sa bann konsern, sa bann problem e sizesyon bezwen ganny evalye pou adrese kot i posib; dan kourt term, mwayen ouswa lonterm,

depandan lo gravite, priyorite e mwayen a dispozisyon Gouvernman.

Mr Speaker, mon osi konsyan ki parfwa letan ou dir firamezir, i annan dimoun i ankoler ouswa pa konpran, lafason ki en pei i fonksyonnen dan son devlopman nasyonal avek *peu* resours.

Mr Speaker, sa Mosyon ozordi pe prezant ek tou Manm Lasanble pou osi koze lo bann size ki konsern zot distrik, an relasyon ek *meeting* piblik.

Pli enportan, kontribye osi sizesyon ki a ed Gouvernman pandan ki i pe travay lo en plan stratezi, pou adres *outcome* sa bann *meeting* piblik.

Mr Speaker, sa Mosyon in ganny prezante, aköz sa ki konsern serten sitwayen - sa ki serten sitwayen pe fer fas avek, ek mantalite serten dimoun dan sosyete, ki ganny anploye e peye.

E kontribisyon larzan *tax* lasyer sa pep. Endividi dan pozisyon, ki devret pran desizyon lo son *behalf*, ouswa ganny kontra pou delivre en servis dan pei.

Mr Speaker, i annan serten degre negligans, lapares, trenn lipye pou donn servis sa pep.

Mr Speaker, la mon pa pe dir ki tou dimoun dan sosyete kot i konsern servis piblik - tou dimoun i pares, tou

dimoun pe trenn lipye. Me i annan ki pe fer li.

Mr Speaker, i annan osi latitud serten sitwayen koman propriyeter ki fer lavi son prosen difisil, akoz malis, zalouzri, legois - par fer bann aksyon ki retard progre en lot ouswa group sitwayen pou avans devan.

Mr Speaker, konmsi si ou pa kontan, ou pa kapab dir naryen. Mr Speaker, me nou'n vwar ozordi depi levennman 15 lo 10 avek sanzman dan gouvrenans, dimoun ozordi pa kanmi e pa per pou koze parey oparavan.

Mr Speaker, i annan bann dimoun ki letan problemn i vin devan, Mr Speaker, zot fer lavi dimoun vremen difisil.

Mr Speaker, bokou dimoun i respe bokou sa bann zofisyè, e zot meprize, zot manz anndan pou zot mank respe dimoun. Or fini par zoure ouswa lager.

Mr Speaker, dimoun ozordi pa anvè kontinyen ganny servi konman *yoyo* Mr Speaker. Dimoun ozordi zot pou kas lakord sa bann *yoyo* e vin devan, fer konnen ki keksoz pa pe al byen.

Mr Speaker, i pa normal letan ou annan bann dimoun ki sipoze pran desizyon lo ou *behalf*, zot dir ou vin devan pou koze e fer ou lavwa tandè.

Me solman serten ki

responsab, ki annan zorey pou ekoute ou a krwar zot pa tandè. Zot annan lizye pou ekoute, me ou a krwar zot pa trouve.

Me zot pa kapab pran en pozisyon pou ed ou progrese pou ganny en solisyon, Mr Speaker. Dimoun apre tou pe rod solisyon, Mr Speaker. Zot pa kapab kontinyen donn leskiz, san pran seryezman konsèrn e demann piblik ki pe rod en solisyon.

Mr Speaker, ki pep i anvè konnen si i wi, kan, keler, e kwa, letan i vin avek son problemn devan? Si non, ou bezwen dir li akoz e ki lot alternativ ki i kapab pran, Mr Speaker. I senp!

Pa fodre al liniversite ouswa al rod gidans konsiltan e eksper enternasyonal pou konpran sa, Mr Speaker.

Seselwa ozordi ek sanzman, pou kas sa bann lakord *yoyo* Mr Speaker. Si ou sey pran li pour *yoyo* ouswa toupè ki katak, zis pou savire Mr Speaker.

Seselwa pa dormi boner, e i pa per ozordi pou koze parey nou'n war dan *meeting* piblik, konpare dan ansyen ladministrasyon.

Kestyon fondamantal ozordi; Eski fodre Minis, eski fodre Prezidan selman ki annan larepons pour tou keksoz? Kan anba Prezidan e bann Minis, i annan otan

travayer ki kapab fasilite servis en larepons.

Akoz fodre *call* Minis ouswa anvoy let kot Prezidan pou deblok en solisyon? Akoz fodre *call* Minis ouswa *CEO*, Mr Speaker?

Akoz kontinyen kree zot prop pti rwayonm e bann pti *brass band underground*? Seselwa ozordi nepli anvi ekout sa bann *tune*. Seselwa pou dekod zot anba son detruwa laliberte lekspresyon, dan rod en solisyon.

Mr Speaker, si ou fouy pli profon dan sa fason fer, ou pou dekouver ki zot in retard ouswa depriv serten sitwayen son drwa en larepons, pou li avanse dan lavi. Mr Speaker, son sans pou li kapab bouze.

Mr Speaker, mon pou donn detruwa legzanp. Mr Speaker, i annan en proze dan mon distrik, prezizeman kot laplenn Grand Anse, Mahe, kot anba ansyen Gouvernman san konsiltasyon zot ti anvi vin met en kabinen piblik dan milye laplenn Mr Speaker.

E granmersi dan pe pase mon war kontrakter pe fouye. Mon dir zot; “be tyonbo en kou, ki pe arive?” I dir mwan, “ahh zot in ganny lord pou zot met en kabinen piblik la.” Mon dir zot; be *sorry*, aret travay deswit. E nou bezwen al fer en konsiltasyon.

Mr Speaker, wi nou'n fer en konsiltasyon, e nou'n

montre ki bor sa kabinen piblik i devret ganny fer, Mr Speaker. Kabinen piblik in ganny fer. Me Mr Speaker, depi sa kabinen piblik in ganny fer i pa'n zanmen ganny *commissioned*.

Mr Speaker, in annan vandaliz lo sa kabinen piblik, akoz desizyon pa'n ganny pran ki fason sa kabinen piblik pou ganny administre. Ki ozordi Mr Speaker, koman mon pe koze la, en dezyenm *tender* in bezwen ganny mete pou al repar sa kabinen.

I a fer son dezyenm reparasyon, Mr Speaker. Ki montre ki fason larzan piblik e serten bann zofisye, e bann dimoun ki sipoze pran bann desizyon presi, zot pa'n fer li.

Me mon konsern la, Mr Speaker, ler sa reparasyon pou fini, si zot pa ekout Lotorite Distrik - bann sizesyon ki nou annan pour administre sa fasilite, Mr Speaker, mon zis swete nou pa retourn ankor pou nou pli tar vin fer ankor en trwazyenm reparasyon, akoz napa dimoun ki pe regarde.

Mr Speaker, mon pou donn ou en lot legzanp. Menm la ankor, en pon ki'n ganny fer anba ansyen Gouvernman ankor. E sa i prezizeman La Misère, La Salette.

Mr Speaker, pon in ganny fer, me ozordi depi lanbilans, transpor piblik, *pick*

up ki anmenn bann komodite, pe ganny difikilte pou kapab pas lo sa pon.

Mr Speaker, nou'n koze. Vizit apre vizit in ganny fer. Mr Speaker, me i domaz ki ziske ozordi, sa pon pa ankor ganny amelyore e sitasyon i ankor parey.

I pa kestyon, Mr Speaker, ki Lotorite Distrik pa'n fer naryen. Me, dan bann Minister, bann dimoun responsab pour proze, zot bezwen vin pli responsab!

E silvouple ekout en pe bann rezidan. Annan bann *meeting* ek dimoun, ekoute! E ler zot vin fer bann *meeting*, pa zis vin la, ekoute me selman ou pa tande!

Mr Speaker, be mon pe demande ki sa sityasyon i ganny amelyore.

Mr Speaker, mon annan en lot konsern ki mon anvi met devan pou mon demontre ki fason ki keksoz pe mal marse.

Ler ti annan polisyon larivyer La Misère, pep lanmizer enkli Lotorite Distrik, nou ti pare pou donn sant kominoter La Misère pou fer en klinik. In mars byen. E nou ti ganny dir - ti annan en komitman ki sa sant letan i fini, pou ganny repare e donner a bann zabitan La Misère.

Mr Speaker, me koman prezantan ki konnen ki pe pase e konsilte avek dimoun -

Mr Speaker, resaman mon dekouver ki menm si oparavan, vizit avek tou lede Minis konsernen in ganny fer, pou nou pran en desizyon ki nou'n pran - me mon vwar la Mr Speaker, ki sa sant ti annan en negosyasyon pou donn avek Minister Ledikasyon.

E Mr Speaker, toudswit letan mon ti ganny met okouran, mon ti fer sa Minis konnen poudir; be tyonbo en kou, ou pa kapab fer sa! Nou'n napa konsiltasyon. Zot in fer vizit, wi, san ki Lotorite Distrik i konnen. E i annan en komitman. E si zot donn sa Minister Ledikasyon, pep La Misère pou napa en landrwa pou li rankontre, pou li zwenn.

Mr Speaker, mon pe ilistre sa detrwa legzanp, pou montre en pti pe ki fason servis pa pe mars byen. E ki fason i merit annan amelyorasyon dan konsiltasyon.

Mr Speaker, de lot kote ou ganny bann sosyete sivil ki antre dan distrik, ki fer bann plizyer proze ouswa donn servis, ki pa konsilte avek Lotorite Distrik. E ler i annan problem ki zot konsilte ou, ki zot anmenn ou *onboard* pou kapab sey rezourd problem.

Mr Speaker, de lot kote, kot i konsern *sport*, nou'n toultan demande isi dan sa Lasanble depi oparavan -

bann Lasanble oparavan, ki bann Federasyon, Mr Speaker, ki Lasanble i vot larzan pou zot, ki zot vin fer bann aktivite o nivo distrik.

Akoz enn; distrik pa ganny bokou resours, me ou ganny dir wi me selman ou pa vwar bann aktivite pe ganny fer dan distrik, swa o nivo rezyon. E mwan mon ti ava demande ki zot ekout en pe. Zot ekout en pe.

E ler zot dir nou vin *meeting*, mon pa kapab vin *meeting* zis pou vin ekoute ki ou vin dir mwan. Be *what about* konsern sa pep, ouswa lazenes dan sa distrik? Zot dezir, zot swa, zot lanvi? E koman reprezante, nou pe met devan.

So, Mr Speaker, mon pa pou koz tou mon menm lo sa bann size. Me selman mon anvii dir ki sa Mosyon in vin devan, aköz nou vwar ki i devret annan amelyorasyon. I annan lespas pou nou kapab fer pli byen.

En lot *area* ki mon a touse Mr Speaker, se *welfare*. Mon santi poudir i devret annan en pli meyer konsiltasyon vizavi ka ki vin devan kot *Welfare*, ler i konsern zabitan. Kot nou pa tro, tro serten, me nou konsilte ki nou a kapab nou osi koman reprezentan distrik, donn nou *input*, Mr Speaker.

Akoz parfwa ou war poudir desizyon ki ganny pran *at the end of the day*, pa pe rezourd problem. Aköz sa zofisye i napa listwar lo sa fanmir, pou li kapab konpran poudir, be sa dimoun in vin devan, pa aköz zis i anvii vin devan. Me aköz i annan en konsern.

Mr Speaker, pa tou dimoun ki anvii viv lo *welfare* tou son letan. Tou son lavi. Me i annan ki ou vwar i annan bann ka ki *genuine*, ki mon krwar poudir sa konsiltasyon avek Lotorite Distrik i devret amelyore pou nou kapab fer sir ki, bann dimoun ki vreman merite, zot ganny sa servis.

Mr Speaker, mon osi demande la, atraver sa Mosyon ki Gouvernman apre sa 2an edmi, zot revwar en pti pe sa *Unit SIA* ki pe okip bann proze Mr Speaker.

Mon santi poudir i annan serten proze, ouswa nou devret kategoriz serten bann pti proze ki distrik i kapab *deal* avek. Me ki ozordi ou pe vwar ki i annan bokou retar, Mr Speaker. Bokou retar vizavi lenplimantasyon.

Mr Speaker, menm si lot kote pou riye, i mon drwa dir keksoz ki mon vwar i pe arive dan distrik kot mon'n ganny elekte. E i mon devwar fer konnen Gouvernman kot i merit aranze pou li aranze. Aköz i enportan ki dimoun i

vwar e tandé ki son reprezantan pe met devan bann konsern.

Mr Speaker, de lot kote mon santi poudir i annan en travay enportan lo nivo konsiltasyon, enklizyon Lotorite Distrik, dan bann demars, dan bann proze, dan bann servis ki enn; presizyon i ganny anmennen pou *deal* avek bann problem akòz Mosyon pe tous lo presizyon e pou evit gaspiyaz, Mr Speaker.

Akòz si nou kapab annan presizyon. Si nou kapab koup gaspiyaz Mr Speaker, nou kapab enn; anmenn solisyon ase vit.

So, Mr Speaker, avek sa de mo, mon krwar mon'n fer le neser pou met devan rezondet par deryer sa Mosyon. E mon demann bann Manm pour deliber lo sa Mosyon byen.

E avan mon terminen Mr Speaker, sa konsern la, mon konnen poudir i en konsern ki sansib; se politik. Nou koman politisyen nou toultan pe dir, tir politik dan travay.

Mr Speaker, nou dir sa la isi anndan la. Me selman lo teren nou dir avek nou bann aktivis, sezi tou mwayen, tou loportinite kot nou gannyen pou nou met retar dan Program Devlopman Gouvernman.

Sa Mr Speaker, i en size ki dan lavenir i enportan ki

politisyen dan Sesel nou vwar li. Akòz si non, mon vwar ki i pou anpes pei e anpes pep li menm li devlop avek tou son kapasite.

Mr Speaker, mon pou aret la. Mon remersye ou.

(APPLAUSE)

MR DEPUTY SPEAKER

Mersi Onorab pou ou prezantasyon. Prezan lasal i ouver pour deba. E okenn Manm ki annan lentansyon...? Onorab Zialor? Onorab Zialor.

Sa ki'n segonde i pa neserman i koz dezyenm. I rezerv son drwa pou li koz nenport moman ki i anvi. Onorab Zialor mon pe donn ou laparol antretan ki mon rekonnèt larestan.

HON NADDY ZIALOR

Mersi Mr Speaker. Bonzour tou koleg Manm Lasanble Nasyonal e bonzour Lepep Seselwa.

Bomaten mon'n ekout loter Mosyon tre atantivman. An premye lye konman mon *MNA* Elekte pour distrik ki mon sorti ladan. E konman osi en *MNA* Proporsyonnel ki swiv en pti git devlopman otour Sesel, me osi dan nou distrik.

E pandan ki i pe koze, mo pe reflexir en pti git leko ki i pe eko bomaten. E mon'n sey konpran ki an menm tan, si nou koman bann Manm

Parlman, sirtou si nou aktiv dan nou distrik, e si nou atantiv-mon'n sey konpran ki i pa non selman sa ki li i pe fer resorti, ki reel ki et, me osi dan resaman in annan 26 distrik ki Prezidan Larepublik avek son lekpi in fer letour.

E si nou konman bann politisyen nou'n ekoute, in osi serten pwen ki bann zabitan, bann sitwayen in fer resorti Mr Speaker.

Alors, mon pou donn mon sipor. An menm tan, pou mwan sak fwa en Mosyon i vin isi dan nou Lasanble, i en moman pou nou annan en dyalog, pou nou annan en konversasyon. Parfwa i vin politik, parfwa i osi en mwayen pou nou reflesir.

Alors wi, Mosyon bomaten se pa pou nou – *well*, souvandfwa nou'n ganny dir ki nou bann *rubber stamp*. Souvandfwa nou'n ganny dir ki nou pa – nou zis dir wi dan tou keksoz.

Me la i en moman pou nou osi annan en dyalog, konman 2 brans Gouvernman - brans Egzekitiv avek brans Lezislativ. Pou nou fer sir ki nou tou konman bann sitwayen, koman bann dimoun ki dan servis piblik sirtou, nou tou nou kominik ek kanmarad e nou *in sync* pou konpran pou dir; tou proze, tou plan ki'n ganny met

lo lata, i annan en lenpak direk lo nou sitwayen.

Alors, sa ki nou, nou pe demande, sa ki Lasanble pe demande se ki; annou pa vwar – bon mon mazine lo bout Lezislativ -annou pa vwar bann *community leaders* konman bann dimoun ki fer zot per.

Me annan vwar nou konman sa dimoun ki anvi travay ansanm avek zot, pou fer pei bouze. Pou fer nou kominote bouze.

Tre souvan - nou bezwen onnet ek nou lekor - tre souvan nou ganny apele, ouswa nou ganny kriye. Ouswa nou tou ki la nou konnen se letan nou annan problem. Ler i annan problem. Me letan pou rod solisyon ansanm, tre souvan pa neserman tou dimoun i *onboard*.

Alors mwan, Onorab William, letan mon pe ekout ou Mosyon, mon pe osi ekout leko sa pep. Mon pe asize devan mon televizyon e pe revwar sa bann *meeting* piblik – konmsi dan ou Mosyon; kot Seselwa, kot nou piblik, kot nou bann dimoun dan kominote in anvoy en lavwa avek nou bann reprezantan. Avek sa *public servant*.

Avek sa zofisye ki pran – ki ganny sa *file as first sight*. Avek sa zofisye Lanplwa ki resevwar sa dimoun o premye

lye. Avek sa enn ki li i sipoze pe travay pou *build up* bann cases kot nou pe dir avek li, be annou travay ansanm. Annou rod solisyon ansanm.

E mwan mon en dimoun ki toultan dir, letan nou travay annou travay pour Sesel. Annou pa rod solisyon ki ti sipoze ganny donner yer, annou pa fer li demen.

Alors wi, i annan en nesosite pou nou dir avek bann zofisye, bann dimoun ki parfwa i asiz otour latav pou nou travay ansanm - pou nou kontinyen revwar bann lapros vizavi bann diferan keksoz. Parfwa i bann keksoz senp.

E mwan, mon pa anvi servi politik dan sa Mosyon bomaten. Mon pa anvoy fer politik avek sa Mosyon. Me sa ki mwan mon anvi se ki - sa ki mwan mon anvi dir se ki wi, parfwa, tre souvan, tro bokou letan nou'n met politik dan tou keksoz.

Nou'n met lenterer personnel - fristrasyon personnel anver en dimoun, avan menm ki nou komans travay, oubyen pran desizyon dan lenterer nou kominote.

Alors, mon pa konnen dan ki direksyon nou pou pran ozordi. Me mon krwar i ava en loportinite pou nou koman bann Manm Parlman, ansanm travay e fer bann propozisyon pou nou vremen vwar nou kominote bouze.

Letan ou annan en proze i vin lo latav, si nou konnen poudir nou kapab fer keksoz pli vit, pli byen, annou fer li. Letan ou annan bann - mon pa anvi target person, e tre souvan mon'n tann koz lo la, ou annan bann kontrakter ki olye fer en travay ki byen, i rod en fason pou - ki mannyer nou pou tir plis larzan lo Gouvernman. Sa, i annan en lenpak lo nou pei.

Letan - tre souvan mon servi sa legzanp, parske i reel, e Onorab in tous lo la - ou annan bann zofisye dan servis piblik ki travay avek zot leker, ki travay dir, ki travay for. Ki letan en dimoun i vin devan li, son priyorite se rod solisyon.

Be letan ou annan bann dimoun ki donn en manm piblik en pti bout lenformasyon ozordi, en pti bout demen. Olye dir li; be ou kapab al tel lofis la i donn ou tel keksoz, nou rann li fristre i retourn ver nou kominote.

Onorab in koz lo proze. E la mon anvi fer resorti; i annan en kantite legzanp kot zis pandan 2an bann proze ki'n *drag* pour plizyer lannen zis dan 2an. Wi, renovasyon in ganny fer byen. *A1, A star* - pli byen. Bann proze ki ti pe dormi pou plizyer lannen, nou'n refer li, nou'n fer li vin en realite.

Mwan mon a dir annou swiv legzanp. A labaz

kominoter osi annou swiv sa bann legzanp kot Sesel in sorti byen. Resaman la i annan Baie Ste Anne avek en zoli proze por. Dan konbyen letan sa in ganny fer?

Nou Libreri Nasyonal le 29 Zen bann ki ti prezan dan louvertir. Dan lespas 2an ki'n dormi pour 5an. Me mon krwar avek sa bann legzanp, i donn nou sa laroul pou nou prezan konman bann *community leaders* fer sa refleksyon lo nivo kominoter.

Ki mannyer nou kapab donn bann proze? E sa i pa zis pour Gouvernman. In dir bann *stakeholders* - bann *stakeholders*. Bann proze distrik ki bann kontrakter i fer, annou fer li byen pou ki nou benefisyé.

Parfwa, mon vwar sa dan en distrik dan *meeting* konsiltativ, kot en kontrakter volonterman in pare pou donn son servis, pour ed en dimoun pou fer en proze dan kominote. Be pa i ti a byen osi si – la nou'n ganny en lapel pou nou kontribye ver Lopital Sesel - be pa i ti a byen osi si nou, nou kominote nou annan bann dimoun ki vin devan a labaz volonter pou ed son kominote bouze, atraver bann proze?

Mr Speaker, mon'n tann Onorab nonm lo NGOs. Kantite travay pe ganny fer vizavi bann NGOs ki tous en pe

lamas. Me mon santi – la letan nou pe koz proze - mon santi ki plis i bezwen ganny fer, plis i kapab ganny fer. Tro souvan nou pran tou keksoz e nou dir Gouvernman i bezwen fer.

La nou a lans en lapel avek bann diferan NGOs; retourn ver nou kominote, vin donn en koudmen. Vin donn en koudmen pou tous sa zenn ki tre souvan nou tann koz lo la. Sa zenn ki bezwen gidans. Sa dimoun aze ki souvandfwa nou pe dir be i kot lakour.

Bann NGOs vin avek bann proze a labaz kominoter pou vremen elev – elev nou bann dimoun aze.

So, mon krwar – mwan mon'n dir en pti bout dan sa Mosyon. I annan plizyer Manm ki pou fer zot lentervansyon. Mon krwar sa Mosyon, i en moman pou nou ed nou pei fer sa refleksyon ansanm. Konpran ki – (mon'n toultan dir sa ozordi mon pou dir ankor) konpran ki letan ou pe travay, ou travay ek ou leker.

Ou lopinyon politik, ou lopinyon personnel, ou lopinyon relizyèz, ou lopinyon vizavi karakter endividi, sa i ou lopinyon, i reste kot lakour li. Me letan ou pe travay, mazin pei.

Mazinen – ou konnen pran ou distrik, pran ou pei parey kot lakour, ou ganny en lapey lafen dimwan, ou bezwen kalkile mannyer ou

depanse. Ou bezwen fer sir ki tou dimoun i kontribye. Tou dimoun i zwe son rol kot lakaz. Sakenn i fer son bout.

Me si letan ou al travay – E la mon pa pe koz bann gro proze, mon pe koz bann *day-to-day running of* ou lorganizasyon, ou departman, ou - si ou a latet en Minister. Ki manner ou fer li?

Ou fer li avek lanmour. Ou fer li avek pasyans. Ou fer li ek konprenezon. Ou fer li pou ki ler i ariv 4er apremidi, nou satisfè ki wi, nou'n annan en keksoz pozitiv.

Alors, dan mon lentervansyon, mwan mon pou relans en lapel avek tou dimoun; ki swa ou sa sekreter; ki swa ou sa dimoun lo resepsyonnis – lo resepsyon; ki swa ou sa zofisye parey mon'n dir, ki ganny sa dosye pour premye fwa, pour premye dimoun.

Annou travay ansanm. Annou met sa lespri divizyon dekote. Annou travay pou nou vwar *the end product*, kot sa dimoun dan ou kominote ki pou benefisye. E mon krwar atraver sa Mosyon, i montre poudir ki nou reste konekte avek nou dimoun. Pa parey serten i krwar oubyen i dir ki nou pa ekoute. Non, nou tande.

E se pou sa rezon ki nou pe relans sa lapel ankor en kou. Redir ankor avek bann ki

pa neseserman i konpran sa tranzisyon ki'n arive, pou dir be, nou kontinyen travay pour Sesel.

I normal pou annan nide diferan, lopinyon diferan. Me a lafen dizour sa ki enportan, se ki manner nou anmenn en tranzisyon, en sanzman, en nouvo fason fer dan leker nou kominote.

Avek sa de pti mo Mr Speaker, mon pe aport mon sipor pou sa Mosyon. E mon swete ki tou lezot Manm ki pou pe fer lentervansyon, i donn zot kontribisyon pozitivman e regarde ki manner nou kontinyen fer nou kominote bouz devan. Nou kontinyen fer en diferans dan lavi sa endividi dan nou kominote. Me pli enportan, nou kontinyen met Sesel premye e Sesel devan, Mr Speaker. Mersi.

(APPLAUSE)

MR DEPUTY SPEAKER

Mersi Onorab. Prosenman Manm ki'n endike i le koze se Onorab Andy Labonte.

HON ANDY LABONTE

Mersi Mr Speaker. Bonzour Mr Speaker. Bonzour tou Manm koleg Onorab. Mr Speaker, pou konmanse mon pou sit en proverb sorti dan Liv Lavi.

Proverb 19 20-21 i dir ou; “ekout bann konsey e aksepté

lenstriksyon, koumsa pli tar ou ava vin en sarz”. E vers 21 i dir ou; “zonm i fer bokou proze me zis lavolonte Senyer ki ganny realize”.

Mr Speaker, mon konmans koumsa, akoz mon osi mon toultan remersye Bondye. Mon remersye Bondye ki beni tou nou *être* imen, ki si ou leve bomaten, ou bezwen dir li mersi e ou rann li gras. So i enportan ki nou rekonnet sa e nou touzour tourn ver li.

Me ler mon pe get Mosyon ki'n anmennen par mon koleg Onorab William, mon war bokou lenportans e lesansyel ladan. Sirtou son dezyenm parti kot sa Lasanble, pe demann ek tou akter kle dan kominote, pou kontinyen revwar zot lapros pou ki i annan meyer rezilta.

Mr Speaker, parey nou konnen poudir le 29 Zen nou ti selebre 47an nou laniverser Lendependans, e ankor enn fwa nou bezwen remersye Bondye pour sa.

E nou bezwen kontinyen rekonnet poudir si nou'n ariv 47an nou Lendependans, i annan bokou dimoun ki'n la avan nou ki'n travay dir ki ozordi dan nou pe selebre sa ki zot, zot in fer, ki zot in lager. E nou pa'n konnen vreman - nou pa'n eksperyans sa - nou - sirtou mwan koman en

dimoun ki ankor bokou pli zenn ki 47an.

Me *Leader* Lopozisyon Mr Speaker, ti fer sorti dan enn nou lentervansyon ki i pa ti ganny loportinite petet pou li vin pronons son lekor dan en aktivite ki ti ganny fer, kot nou ti rann gras Bondye pour lazournen nou Lendependans.

Me petet si i ti vin en pe pli boner, i ti pou konnen akoz rezondet - akoz tou le 3 brans Gouvernman ti ganny sans. E li Mr Speaker ti vin fer sa la lapar Lasanble Nasyonal, se pou se la rezon ki i ti'n vin pronons son lekor. E ler Mr Speaker i ti fer sa, i ti fer li avek bokou lasazes, kot petet si li *Leader* Lopozisyon i ti pou la, i ti pou'n war rezon akoz. Akoz i pa menm nivo avek Speaker. So Speaker ki reprezant Lasanble Nasyonal.

So, Mr Speaker, ler mon pe get sa Mosyon ankor enn fwa, mon pou osi remersye nou Prezidan ki'n fer en *meeting* piblik dan distrik - li avek son bann Minis - kot in vini ankor enn fwa, akoz i en form konsiltasyon.

Konsiltasyon kot nou pe angaz nou popilasyon, nou piblik reste pli pre avek zot, pou nou konnen vreman ki zot konsern, e ki zot laspirasyon pou nou pei - nou bann distrik a zeneral.

E ankor enn fwa pou sa, mon pou dir mersi Prezidan

pour sa travay. E nou war poudir i annan en kantite keksoz ki'n sorti atraver sa bann *meeting*.

Me parkont Mosyon Onorab William, parey in dir; i ti'n deza dan program, i ti'n deza vwar lenportans pour anmenn en tel Mosyon, ki mon pou totalman siport sa.

Akoz i montre ou poudir vre. Son premye parti in koz lo pou ede redwir gaspiyaz lo resours. Mr Speaker, si mon pou al lo la, petet permet mwan akoz ki mon pou dir ki mon pe siport sa Mosyon.

Nou'n war poudir dan lepase, dan lepase vre in annan bokou mank kominikasyon, konsiltasyon lo nivo distrik an zeneral, ler zot pe antreprann bann proze ki'n ganny fer.

Par egzantp dan distrik La Rivière Anglaise, kot nou'n annan sa konstriksyon sa Stad Lanmizik ki nou'n tann bokou leokri; zabitan i vreman mekontan, akoz konstriksyon sa Stad Lanmizik.

Me par kont, nou bezwen pran li avek en lespri pozitiv. Pozitiv dan lesans ki nou konnen bokou larzan in ganny depanse dan bann tel fasilite parey. E finalman nou pe war lesansyel, akoz ki nou bezwen sa Stad Lanmizik, e ki mannyer nou kapab itiliz li?

Zis bomaten Mr Speaker, les mwan met lo rikord se ki,

mon'n annan en dyalog menm avek Mr D'Offay ki ansarz *Creative Seychelles* ki responsab sa – sa stad i tonm anba li.

So nou pe rod fason petet ki mannyer nou kapab byen itiliz sa landrwa, kot nou kapab angaz kominote pou nou fer li vin en landrwa *lively*, kot zabitan li menm li i santi poudir i annan en apartenans a bann tel lenfrastruktir; ler ki nou'n depans sitan kantite larzan, ankor enn fwa pou nou kapab reste avek en lespri pozitiv, lo ler i annan bann tel devlopman kot parkont in napa bokou konsiltasyon.

Me antretan ankor enn fwa, akoz mon pou dir pou dir i esansyel sa Mosyon. Retourn dan mon distrik ankor - i annan en proze semen parey ki nou'n fer anler *Greenwich*, kot semen in ganny fer. E ler nou ti war ki en miray *Castor Road* ti'n degrengole, tou zabitan pti pe demande akoz.

Me *basically* nou'n war ankor enn fwa akoz move planifikasyon ki'n ganny fer in napa konsiltasyon, zot pa'n prevwar bann evantyalite ki ti kapab arive.

Ki finalman sa delo i sorti anler lo montanny, in napa drenaz ki'n ganny swivi. E nou'n war poudir in degrengol en miray. E

finalman plizyer lezot zabitan ki ankor annan konsern.

So, dan sa lespri ki mwan mon pe get sa Mosyon - mon pe get sa Mosyon poudir i annan son merit, e nou bezwen get li dan en fason pozitiv. E menm boner sa lannen, nou ti annan en sesyon avek bann profesyonnel dan Minister Lasante kot ankor Lopoziyon ti *boycott*, zot pa ti vini.

Nou'n ganny bokou lesplikasyon, bokou lenformasyon, ki mannyer ler nou pe enplimant bann proze nou kapab met – pran kont bann mezir lasante dan tou Polisi ki nou pe fer.

La i fer mwan mazin bann lenfrastriktir, kot ler nou pe koz bann dimoun. Parey nou'n war poudir ankor enn fwa mon pou swet – mon pou *congratulate* bann atlet dezabilite ki'n fer byen.

Ki i annan enn dan mon distrik Aleandro Croisée, ki'n vin avek en meday, malgre pa meday lor. Mon pou dir *bravo* e tou lezot ki zot fer bokou, zot kontribye bokou.

E ler nou pe fer bann semen - parey dan *meeting* piblik ankor enn fwa in fer sorti i pe rode – i annan enn ki'n fer sorti lakoz ki nou war poudir en *pavement* ki ankor bon pe ganny refer Mont Fleuri.

Me petet nou pa war lesansyel ladan, akoz nou'n war poudir i annan bokou sa bann lenfrastriktir ki'n ganny fer, me nou bann dimoun ki pe viv avek en dezabilite, oubyen parey ou apel zot bann otreman kapab, zot pa pe ganny pran kont ler nou pe fer.

Nou war bann *building* ki pe ganny fer o, me selman i napa fasilite kot sa bann dimoun i kapab ganny akse avek. Nou war bann *Health Centre* li menm li kot i pa *friendly* pou sa bann tel zabitan.

So, an zeneral, Mr Speaker, sa i lespri ki mwan mon pe get sa Mosyon li menm li. E, si mon pou get en pe pli lwen, parey nou pe get kot *Ste Anne Jetty – Ex Ste Anne Jetty* ti ete kot tou dimoun ti dir, lontan i annan serten lenfrastriktir ki ti'n deza ganny mete ankor enn fwa laba, kot nou tann plizyer zenn pe dir pou dir napa landrwa pou zot ale, pou zot kapab sosyalize, defoule *and so on*. Apre zis nou war sa bann landrwa i tonm an rin.

So, ou konnen i bann lespri koumsa. E la ankor en enn fwa mon pou remersi nou Gouvernman. Parey koleg in koz avan mwan in koz lo la - Onorab Zialor in dir - nou war poudir dan sa pti lenstans ki la, nou Prezidan in war ki mannyer nou kapab vreman

reviv bann landrwa kot i deza egziste.

Parey *NIHSS* ki ti en batiman, ti zis la koman en moniman ki'n ganny anvair, e nou'n war son valer. Nou'n kapab remet li an plas. Nou'n war kot - mon'n temwanny ankor re louvertir nou *Library* Nasyonal, ki en lenspirasyon en zenn ankor ki ti fer sorti – Prezidan ti dir dan en *meeting*.

E ozordi nou war poudir in ganny remet an valer e nou kapab pe servi sa. Me par kont i pa vedir ki napa defayans. E nou koman en Gouvernman ki serye, e sirtou mwan koman en zenn Manm Parlman ki'n ganny elekte dan distrik La Rivière Anglaise, e ki reste konnekte avek mon bann zabitan, ki kontinyen ekout zot.

Ki tre byento nou pou bezwen annan en dyalog. Parey zot in tande poudir i pou annan en Sant Reabilitasyon, malgre i pa pou abit bann adikt. Me selman i pou en sant ki pou ganny fer dan nou distrik.

So, nou pou bezwen annan en dyalog pou nou kapab koze pou konsilte, ki zot konnen kwa ki pe deroule dan distrik. Ankor enn fwa parey kot *Ex Krishna Mart* kot i annan en bon pe bann keksoz anti-sosyal ki deroule, ki bann konportman ki pa favorab.

So, mon'n ganny sans zwenn avek propriyeter ki mon'n zwenn avek – Zenn, Mr Pillay - garson Mr Pillay ki nou ti konn li koman *Krishna Mart*. Ki nou pare pou nou redevlop sa landrwa, pou donn li en nouvo fasad pou fer li vin pli *attractive*.

Ankor enn fwa la mon demann - mon demann bann lotorite silvouple, ler nou met bann proze devan, kot nou pe demann zot pou vini pou donn nou en sipor, pou silvouple korpore.

Konpran nou poudir nou pe rod sa ki meyer pou nou distrik. E ed nou pou nou kapab pous sa bann proze, ki pou tir bann konportman anti-sosyal.

Ankor enn fwa, retourn dan mon distrik, i annan bokou sa bann tel *issue*. Anler kot *condominium* kot nou war bann marmay ki anvi en landrwa pou zot zwe futbol, kot zot zwe futbol partou lo semen. E nou annan en laplenn ki ti la o paravan, me ki ti'n ganny negligez.

Me nou, nou pe sey rod fason – la nou'n fer sir depi ki nou'n antre dan lofis, nou'n fer sir ki laplenn anler Union Vale, toulezour i pe ganny netwaye. E nou pe met li alaoter. Nou anvi rearanz li, met li lo en standar kot zenn i kapab servi.

E la mon anvi lans en lapel avek bann partener dan distrik, pou ed nou, donn nou en koudmen pou nou kapab amelyor sa bann fasilite pou nou fer nou kominote vin pli – pli *pleasant*, si oule, kot nou tou nou kapab viv ansanm malgre nou diferan lopinyon politik. Me nou kapab viv ansanm koman en kominote.

Ankor enn fwa, i annan bann kado par ler ki nou gannyen lo baz – avek nou bann zanmi enternasyonal. E petet ler nou gannyen osi, i enportan ki nou swiv sa tre pros ki nou fer sir – malgre ki nou ganny en kado.

Me selman ki apre i pa pou vin en fardo lo nou, ki nou pa kapab *maintain* sa landrwa. So, nou travay ansanm ki i kapab amelyor nou distrik, nou lanvironnman.

La i fer mon get parey *La Bastille*. *La Bastille* i zis en *building* ki'n anvarye. I annan serten proze ki sipoze ganny deroule. Zabitan i ankor pe kontinyen demande. Nou annan dyalog lo la.

So, i bann keksoz ki si nou pe get sa Mosyon byen, sa Mosyon i annan son lenportans. E sa Mosyon i pe dir avek lotorite poudir, ler nou pe antretenir bann proze dan distrik, alor annou annan konsiltasyon. Annou pa fer gaspiyaz.

E la mon pou anvi remersye Mr Shah kot *SIA* - Jitesh - Mr Jitesh Shah, ki pe fer en bon travay kot lenfrastruktir, malgre i annan bokou travay, i annan bokou presyon ki nou konnen. Me selman zot pe delivre, zot pe fer en bon travay, mon pou dir zot kontinyen.

E sa i enkli pou tou bann lezot partener. Bann lezot dimoun ki pe travay dan Gouvernman ki pe fer en bon travay. Mon pou dir zot kontinyen.

Me selman sa konsiltasyon, sa koneksyon avek distrik - e sirtou nou bann Manm Elekte oubyen reprezantan distrik, ki nou konn nou distrik, nou konn nou zabitan. So, i esansyel ki i annan sa dyalog ki kontinyen.

E parey loter Mosyon in al en pe pli lwen, in koz osi lo *ASP* ki mon pou totalman dakor, i annan plizyer lezot lenstitisyon kot petet avan ler zot pran bann desizyon. I enportan ki nou Lotorite Distrik, i pa neserman – petet si dan lepase i ti en – tou keksoz ti annan politik. Be nou pa pe fonksyonn koumsa la konmela.

So, i enportan ki bann move latitud, bann vye latitud ki ti pe fer ditor nou popilasyon i ganny met dekote, i ganny rezete. Me nou vin avek en

lespri pozitiv, kot ler nou pe pran en desizyon, nou pran desizyon dan lentere nou distrik an zeneral.

E la ankor enn fwa mon anvi remersye Minister Billy Rangasamy, ki nou'n war nou'n kapab konplet en lot 16 unit 3 lasanm, malgre i pa ase dan distrik. Demann lakaz i bokou.

E parey mon'n dir avek tou mon bann zabitan ki pa'n ganny aksepte dan sa proze, mon leker i fermal wi, me solman zot laplikasyon i sitan kantite letan.

Me selman pou nou fer lakaz, ou konnen i pran letan e toultan lalis i pli long. Me mon pou dir zot kontinyen pey zot HSS. E nou, nou pou kontinyen travay, pou fer sir ki nou kapab asiste zot dan lafason ki nou kapab.

So, Mr Speaker, dan sa lespri ki mwan mon pe get sa Mosyon – e mwan, mon pou dir avek Onorab William, sa Mosyon i en tre bon Mosyon.

E mon pou dir avek L'Egzekitiv, se ki, nou anvi kontinyen travay avek li e nou ki lo sa kote mazoriter, ki toultan la prezan pe siport zot dan en fason pozitiv. Nou pa zanmen negativ.

E kot i annan en keksoz pou nou koze, pou nou diskite, nou pou dir. Nou pou kontinyen dir. I pa vedir ki nou pe kritike, parey lot kote in

tant pou gognarde ler nou'n anmenn sa Mosyon. Me non, napa naryen mal dan sa Mosyon.

Sa Mosyon senp keksoz se ki pe dir se ki, nou koman bann zabitan ki ganny – bann dirizan ki'n ganny elekte pou reprezant nou distrik, nou bezwen koz avek nou L'Egzekitiv pou nou dir li be; sa ki nou, nou ti a swete e, sa ki nou anvi. So, annou travay ansanm pou nou kapab kontinyen byennet nou distrik e nou pei an zeneral.

So, Mr Speaker, pou mwan avek sa de mo, mon pou dir ki mon pou siport en tel Mosyon. E mon pou demann Bondye pou kontinyen donn nou sa lasazes, sa gidans pou ki nou kapab kontinyen anmenn bann Mosyon - bann kestyon ki annan bokou lasazes avek gidans le Sentespri.

Avek sa de mo, mon pou donn mon dipor sa Mosyon. Mersi Mr Speaker.

(APPLAUSE)

MR DEPUTY SPEAKER

Onorab, mersi pou ou lentervansyon. Mon pou aprezan apel Onorab Sathya Naidu.

HON SATHYA NAIDU

Bonzour Mr Speaker. Bonzour tou koleg Onorab ek tou dimoun ki a lekout.

Mosyon anmennen par Onorab Waven William i donn nou en bon platform, espesyalman koman en Manm Elekte pou kapab koz lo nou leksperyans ziska aprezan, kot nou santi annan gaspiyaz resours.

Me avan mon bouz lo la, mon le rekonnet tou bann travayer dan Gouvernman ki pe fer zot travay. E parfwal pli lwen ki sa, pou kapab rann en servis pou nou kapab bouz nou pei de lavan.

E pandan sa dernyen 2an edmi in annan en kantite - en kantite progre ki nou pei pe pas ladan. E se gras a direksyon ki nou pei pe pran anba nou Prezidan, Vis-Prezidan e *Cabinet of Ministers*.

E par anba zot i annan bann travayer dan nou *civil service*, ki pe delivre. Ki pe fer le lesansyel pour kapab bouz nou pei e nou distrik.

Me selman, byensir apre tou sa lannen in annan en tranzisyon an term governans pei; an term en nouvo fason fer; an term en nouvo fason regard keksoz. E pou nou kapab akonpli sa, nou bezwen ki tou travayer dan *civil service* i vin *onboard*.

Me imen parfwal, i pran en pe letan pou kapab sanz zot

latitud. E mwan fransman dir ou, ler mon ti'n antre dan sa soulye e avan ki mon'n vin en *MNA*, mon'n aktiv dan politik.

E koman enn bann dimoun ki'n la dan parti *SNP*. Byensir ler ou konn leksperyans ki ou'n pas atraver ek Gouvernman presedan ki'n la, e ler ou annan serten travayer ki ankor la ozordi.

Ler ou regard zot! *You will not want to work with them. You will want to pose certain questions* lo, eski sa bann dimoun i pou ed mon distrik bouz de lavan?

Me selman, in annan en bon pe zot ki'n montre mwan ki mwan mon mal, poudir ki zot in met zot travay - zot annan zot travay aker, zot annan zot pei aker. E ozordi zot pe donn mwan en koudmen pou bouz mon distrik de lavan. E pou sa mon dir mersi.

Me, dan lot kote i osi annan en bann ki - parey mon'n fek eksprim mon santiman - ki ankor la, ki pe trenn lipye. Ki pe fer keksoz vin tonm an retar pou mon zabitan kapab bouz de lavan pou li ganny sa servis Gouvernman. E servis Gouvernman, nou aprouv en Bidze pou zot kapab rann sa servis.

Li koman sa *taxpayer* i fristre aköz i pa pe ganny sa

series. E ler ou regarde akoz i pa pe ganny sa servis, par deryer sa i annan en figir, i annan en non, i annan en dimoun. E sa dimoun malgre ki i ganny en saler, i pa pe fer son louvraz!

E se la kot nou bezwen lans en lapel avek sa bann dimoun, si ou pa pou kapab fer, ale silvouple, sed plas pour en lot pou kapab delivre sa servis! Nou pa pou kapab kontinyelman fer dimoun vir an ron. Se sa ki nou'n war dan bann *meeting* piblik.

Dimoun in apresye travay ki nou Gouvernman pe fer; ki nou Prezidan pe fer; ki nou bann Minis pe fer, me zot osi rekonnèt bann difikilte ki zot, zot rankontre.

Ouswa – vi ki nou, nou osi asiste sa *meeting* akote Prezidan, nou konnen difikilte ki nou bann dimoun osi pe pas ladan. E nou'n fer nou mye pou kapab ed sa dimoun. Malgre mwan dan mon lenstans mon'n fer tou sa ki mon kapab, i reste pou sa *civil servant* egzekit son responsabilite!

Mon pa pe demann plis ki sa mwan. Mon pa pe demann faver politik mwan! Mwan mon pe dir fer ou travay pou sa dimoun ganny en servis. E nou pa pou kapab kontiny koumsa. Sa i en form gaspiyaz resours.

E ler mon pe fer referans avek bann travayer; lo kote *LWMA*, nou pa pou kapab kontinyelman ganny difikilte ek kontrakter pou fer son louvraz baze lo kontra, ki li i pe al gannyen. Wi, kekfwa pou serten distrik i pe mars byen. Pou sa bann kontrakter ki pe travay byen, mon dir felisitasyon.

Me dan mon distrik, mwan, mon pa satisfè. E ler mon *DA* pa'n siny en *form* pandan 2 mwan, ki mannyer eski ou kapab aprouv peyman? *There's an issue here.*

E ler nou regard *bin site* atraver pei - *ETF*. Si fodre servi *Environmental Trust Fund* pou aranz nou bann *bin site* pou met li annord lo en baz nasyonal, *by all means do it if there's a possibility!*

Bann pti, pti keksoz. Bann slab ki'n tonbe pou nou aranze deswit, i kree en lenpak landmen ler en dimoun pe al zet son salte.

Ouswa ler i annan en konze piblik, konnen ki i bezwen annan plis dimoun ki bezwen ganny mobilize pou anmas salte, pangar volim salte i vin lo semen!

Annou servi nou lespri osi silvouple. Annou mazin dan en fason ki lozik. Ler mon pe mazin fason ki lozik - malerezman nou, nou bezwen dan en serten sans, gaspiy

resours finansyel ki nou ti kapab investir dan bann lezot keksoz, pou kapab adres bann gaspiyaz Gouvernman presedan.

I annan proze parfwa zot in fer, zot pa'n met en senp rigol, prezan tou delo i devid kot lakour en dimoun. Prezan ozordi i vin mon problemm.

Parey en lot problemm Serret, pa'n rezourd pou 23an, Gouvernman presedan ki ti annan tou mekanizm an plas - L'Egzekitiv, pou fer le neseler, pa'n fer, prezan ozordi i vin mon problemm, akoz delo pe rantre kot lakour en msye.

E nou bezwen trouv larzan - 300ekek estimasyon. Mon pa konnen konbyen pou arive. Me selman, ankor enn fwa i fer nou gaspiy resours pou adres problemm lepase.

E an relasyon avek sa, *maintenance* bann *estates*. Mon'n lans en pledwari ek *PMC* pou fer sir ki ler i annan bann nouvo *estate* - ler zot pe fer alokasyon pou bann nouvo *estate*, sa eleman anti-sosyal, sa eleman kot i annan vandalizm dan bann *estate* - bann nouvo *estate*; Fodre ki nou adres sa.

Akoz ozordi anba Program *Maintenance* li menm, *PMC* parfwa i bezwen fer *maintenance* senpleman akoz, imen - lafason ki zot konport zot. Zot osi zot ede, an term zot osi zot gaspiy resours

ki ganny met an plas. Ouswa lenfrastruktir ki Leta i met an plas.

Pou ou sa msye St Louis ki nou'n fek aranz en *crash barrier*, ou'n al kraz lo la, ou'n zis deside pou ou ale. Demen, se Lotorite Distrik ki bezwen trouv mwayen finansyel pou kapab aranz sa.

Ouswa pou ou ki zet en ros lo en *convex mirror*, pou nou kapab fer sir ki tou bann dimoun ki pe itiliz semen i an sekirite.

Ouswa pou ou ki kas sa lalimyer, senpleman akoz ou krwar ou bezwen kontinyen vann drog kot ou pe vann. Ou osi ou pe ede pou gaspiy resours.

So, gaspiyaz resours i vin - lo en kote kot nou pep ki annan en mwayen pou kapab ganny akse avek servis. E gaspiyaz resours i vin avek bann travayer ki annan en responsabilite pou delivre, zot pa pe delivre, e koz gaspiyaz resours.

E enn bann pli gran *issues* dan bann *meeting* piblik anba *portfolio* Minis Rangasamy, ti *PMC*. E pou *PMC*, *sorry to say* - lo kote travay bann *estate managers*, zot bezwen fer en pe plis. Zot bezwen kominik avek nou lo en baz regilye ann ekrir, pou dir kan zot in vizite, kwa ki zot in war.

Akoz souvandfwa zot, zot krwar mon limero se limero *PMC* e zot met tou zot konsern devan. E mon pran mon responsabilite pou adres sa konsern. Me selman, lo sa size *they have to get it right*, an term keksoz ki zot war lo teren, e mannyer zot reakte, pou fer sir ki bann *tenants* i santi zot alez.

E mon bezwen rekonnet lo kote *maintenance*, *PMC* in fer en bon travay dan ka St Louis. Harrison in ganny en nouvo fasad. Dan Koko nou pe fer ankor travay renovasyon. *Bedsitter Serret* osi tre byento zot pe al demare.

E atraver zot paz lo rezo sosyal, mon war ki zot vreman aktiv tou resaman, kot zot pe menm sansibiliz dimoun pou pran zot responsabilite, pou ki Leta pa bezwen gaspiy son resours, pou met bann *estate* annord.

Me selman lo size later, nou bezwen ganny en nide kler ki bor eski Minister Later i debout lo sa size, ler ou annan 2mil aplikan. E dan ka St Louis in annan dimoun ki depi '96 in monte desann, monte desann, monte desann! Zanmen in gannyen. Zanmen in gannyen.

E ozordi nou Gouvernman i annan sa responsabilite akoz i annan tou son dokiman, i zwenn tou

bann kriter pou li ganny son bout later.

Be ler ou annan 2mil aplikan an tou, *how are we going to go forward with this?* Nou pou bezwen enform piblik. Nou pa pou kapab demann en dimoun pou al idantifye en bout later. Pa tou ki annan sa kapasite ouswa le mwayen pou kapab fer sa, pou kapab al regarde ki bor zot pou ganny en later.

Alors, eski sa lekspektasyon i enn ki realistik, pou en dimoun ki'n bezwen atann pou tou sa letan? En lot size se *housing* li menm. Dimoun ki'n debout dan en *queue* pour 10an, 15an, i ekspekte i ganny son lakaz. Me ankor en fwa, avan sa enn ki'n atann pour 15an, i annan en lot ki'n atann pour 20an.

Prezan nou bezwen fer sir ki sa size la, i annan latransparans. Pa devret annan politik. Pa devret annan en ka kot politisyen pe determinen lekel ki pou ganny lakaz. Non! Nou bezwen kapab annan en lalis ki transparan, ki ker.

Si i annan en dimoun 1 ziska 50 aplikan, ou dir ki bor sa aplikan i debout. Si ou – par legzanp mon annan 6 *unit*. Mon annan mon krwar en 30enn ki krwar zot pou ganny en plas dan sa 6. E mon bezwen edik zot, lo lafason ki sistenm i marse.

Me ankore en fwa, si i annan 50, 1 to 50. E tou le 3 mwan i sanze lo baz kontribisyon ki zot donnen. E ler en dimoun i vin kot ou, ou kapab dir; ou debout dizyenm akoz ou'n fer tan. Sa lot i par lao ou akoz in fer son laplikasyon ki dat!

E zot tou zot form par sa prosesis akoz zot pe kontribye ver *HSS* pou zot ganny en lakaz, e bezwen annan latransparans pou zot konnen akoz sa lot in gannye e li i pa'n gannye.

Me ankore en fwa, lafason ki lakaz in ganny donnen, se lo lakantite piti ki ou'n fer, ouswa gravite ou problemm sosyal ki; problemm sosyal ou pran ou met dan en *housing estate*, apre ou krwar tou keksoz pou *ok*.

Annefe Departman Sosyal, mon pou krwar zot bezwen *dedicate* en *specific unit*, zis pou bann problemm dan *housing estate*. *That's how bad it is. We can't continue like this! So annou revwar sa.*

E in annan *NGOs*. I enportan ki tou bann *NGOs* i fer zot bout. I annan serten *NGOs* ki ganny larzan, ki ganny donasyon. Be parfwa mon demande ki bor sa bann donasyon i ale? Kwa ki zot pe fer ek sa larzan ki zot, zot resevwar? Mon pa pou al an detay, me selman zot bezwen fer le lesansyel lo sa size.

E lo size *ASP*, nou'n fer en bon travay. Nou'n fer en tre bon travay, pou fer sir ki i annan disiplin fiskal. E nou fer sir ki bann dimoun ki merite, ki ganny asiste. I pa ganny asiste akoz in vot pour entel dan eleksyon. Non!

I ganny asiste lo baz merit. Napa naryen pou fer ek politik.

Me selman, i annan bann lenstans kot dimoun ki dan bezwen ler zot vini zot pa pe ganny sa led. E mon pa konnen kote, ki bor zot bezwen aranz zot *framework*. Silvouple fer le lesansyel. E fer li lo en baz kot i annan en pe konpasyon osi.

Kekfwa i varye pou tou bann ka. Byensir, i pou bezwen annan serten ki vini, ou pou bezwen dir zot non. E kekfwa serten pa le donn zot *bank statement*, akoz zot annan tan dan zot kont.

Me selman i kapab annan serten ki annan en pe dan zot kont ki zot pe garde akote, par ka okenn evantyalite pou li al en tretman. Par legzanp, dan plas relye lo Gouvernman. Si zot kapab donn kek zistifikasyon pou siport sa, mon krwar nou bezwen kapab get en kou ladan.

Me selman an zeneral, i annan en bon travay ki pe ganny fer. Mon dan ka St Louis mon satisfè. Me selman i enportan ki ler sa bann *civil*

servants i zwenn, mon krwar i bezwen annan en *name tag*.

Akoz souvandfwa ou ganny dir; mon'n zwenn en madanm entel, prezan li in dir sa, sa, sa, sa. Sa bann keksoz verbal, kominikasyon verbal la - mon krwar tou dimoun ki pe ekout mwan, ler ou ganny en komikman, fer sir ki sa dimoun i met ann ekrir.

E si zot pe ekspekte en keksoz, fer sir ou ganny en repons. Sa repons i kapab non. I *ok* li. Selman fer sir ki zot ganny zot repons. Akoz bokou fwa dimoun i vini, i dir ki zot in zwenn entel, prezan ou pa pou kapab fer sir ki sa endividi i fer son louvraz.

Alors dan sa size, ler nou pe sey adres bann travayer dan *civil service* ki pa pe delivre, ki'n fer serten komitman, ki pa pe fer le lesansyel - i enportan ki nou annan levidans pou kapab prouv sa osi - pou kapab siport sa pou fer sir ki bann *civil servants* i delivre.

E avek *RBM*, nou koman en Gouvernman nou pe sey adres sa. Nou pe sey adres tou bann gaspiyaz resours, ki nou annan. E Oditer Zeneral dan son rapor, tou bann Lazans ki'n ganny *audited*, nou'n ganny a *clean sheet in a sense*, kot nou'n demontre kot i annan disiplin fiskal.

E Gouvernman presedan nou pa'n war sa. Nou'n war

gaspiyaz, gaspiyaz e gaspiyaz. E ozordi, nou pe adres bann gaspiyaz ki nou, nou war pou nou kapab bouz nou pei de lavan. Mersi Mr Speaker.

(APPLAUSE)

MR DEPUTY SPEAKER

Mersi Onorab Naidu. I annan lezot Manm ki'n eksprim lentere pou koze. I pa vo lapenn mon donn zot laparol la apre pou nou al *break* tar.

Donk nou a pran *break* la, nou ava retournen 11er e nou ava kontinyen avek deba lo Mosyon prezante par Onorab Waven William. So, nou a zwenn 11er.

(BREAK)

MR DEPUTY SPEAKER

Welcome back tou dimoun e bonzour pour bann ki fek zwenn nou pour kontinyasyon nou travay pour ozordi bomaten. An se moman nou pe debat en Mosyon prezante par Onorab Waven William.

E pou bann dimoun ki fek zwenn nou dan zot benefis, mon a zis repas lo sa ki Mosyon pe demande;

Swivan mank presizyon e gaspiyaz resours dan lenplimantasyon serten proze e donn servis o nivo kominote, Lasanble i demann ek tou akter kle dan kominote pou

kontinyen revwar zot lapros pou ki i annan meyer rezilta.

Lo lalis prosennman i Onorab Georges Romain.

HON GEORGES ROMAIN

Mersi Mr Speaker. Bonzour Mr Speaker. Bonzour tou koleg Onorab. E en bonzour spesyal tou zabitan Anse Etoile e tou lezot dimoun a lekout.

Mr Speaker, mwan osi mon pou donn mon sipor sa Mosyon anmennen par Onorab William, akoz ler mon regard sa Mosyon – parey mon koleg Onorab Labonte in fer resorti - lo sa bout ki i dir;

Lasanble i demann ek tou akter kle dan kominote, pou kontinyen revwar zot lapros, pou ki i annan meyer rezilta.

Mon osi mon pou dakor avek li lo sa bout, akoz sa bout i tous mwan en kantite, an vi ki mwan osi mon en *MNA* Elekte dan distrik Anse Etoile.

Mr Speaker, mon pou konmans koumsa; parey nou tou nou konnen dan tou distrik – tou distrik, nou ganny en Bidze pou tou nou bann pti proze. E byensir sa i pa pou kapab fer tou nou proze ki nou annan dan distrik, akoz i pa sitan en kantite larzan.

Me par kont Mr Speaker, ler nou, ansanm ek nou *DA*, ansanm ek tou lezot travayer distrik, nou idantifye nou

bann proze ki nou krwar i en priyorite pour nou zabitan, nou byensir, nou ganny lasistans avek *Local Government* apart zot bann dimoun proze.

E ler nou bezwen fer vizit osi pou sa bann proze dan sa bann landrwa, kot nou pou gete ki mannyer sa proze pou demarke pour deroule, bokou fwa nou pa ganny tou bann antite ki prezan, pou nou kapab fer en desizyon lo sa proze.

E sa Mr Speaker pou mwan i vreman sagrinan ennler ou kapab dir, akoz nou koman en Manm Lasanble, pa toultan ki nou dan distrik.

Akoz nou annan louvraz Lasanble osi pou nou – ki nou, nou konnen parey dan nou ka kot nou kote *LDS Caucus*, nou konnen Lendi, Mardi, Merkredi nou annan travay ki nou fer kote Lasanble. E sa i vreman dekourazan Mr Speaker parey mon'n fer resorti.

E byensir, kantmenm nou ganny sa bann dimoun pli tar pou vin asiste nou ek sa bann proze, e ler proze in fini ganny met lo papye, nou vwar ki lot problem i vini kot sa proze byensir i bezwen ganny – kot son *costing* parey nou dir.

E ler tousala in fini ganny met lo papye, sa proze aprezan Mr Speaker i bezwen

al *tender*. E la nou konnen – nou tou nou konnen, i pran en pe letan.

E menm kantmenm nou'n fini ganny sa kontrakter ki pou fer sa travay, li osi Mr Speaker ler pou vin dan distrik pou li kapab konmans sa travay, ou vwar ennler i donn ou diferan kalite leskiz.

I dir ou i annan en lot travay kot i pe travay, i pa ankore fini e pe vini apredmen oubyen lot semenn. E sa travay i ganny retarde.

E byensir nou zabitan i fristre, akoz sa travay ti en priyorite pou nou. Sanmenm sa ki nou'n met li lo papye pou nou kapab fer sa travay.

E alors, la mon le profite Mr Speaker, pou dir pa tou sa bann kontrakter ki koumsa. I annan ki vreman fer zot travay byen, e zot fer sa dan sa dele letan ki zot in gannyen. E zot fer vreman en bon travay. E pou sa, mon personelman mon pou felisit zot pou zot kontinyen fer sa bon travay.

E menm par ler Mr Speaker, ler nou annan lezot proze ki vin devan nou dan distrik ki nou bezwen byensir rod kontrakter, toultan mon dir ennler atraver *DA*, akoz nou pa pran sa serten kontrakter?

Akoz nou konnen in donn nou en louvraz ki de kalite. Be byensir i pa mars

koumsa, e ou bezwen *go through* sa prosedir *tender*.

En lot problem ki nou rankontre baze lo Mosyon, ki pe demande ki nou ganny sa rezilta – meyer rezilta pou koup gaspiyaz, i pa lot ki bann kontrakter ki travay avek *LWMA*.

Problem ki nou gannyen ek sa bann pti kontrakter, Mr Speaker – la mon le fer resorti, mon pa pe dir pou tou kontrakter *LWMA*. Sa bann pti kontrakter. Zot konnen lekel zot.

E menm Anse Etoile Mr Speaker, mon ti ganny sers fer en *meeting* avek zot ansanm ek *DA*, ek lezot travayer distrik, kot nou ti envit zot tou, enkli son Depite *CEO*. I pa ti kapab *make it* sa zour. Be lezot bann ki ase o pozisyon dan *LWMA* ti la dan sa *meeting*.

E sa zour mon ti fer resorti ki distrik i bezwen ganny netwaye, met li annord, akoz bokou konplent sorti kot nou bann zabitan. E sa bann konplent i *genuine*, Mr Speaker.

E nou menm nou - mon menm mwan mon'n marse dan distrik. Mon'n tir portre kot mon'n war sa bann defayans. E mon ti annan mon telefonn pou mon dir zot ki; la, la, sanmenm sa ki nou ti pe fer sa *meeting*, pou nou kapab rektifye bokou sa bann problem.

Be parkont Mr Speaker, zot in agree, zot in dakor ki wi nou bezwen fer pli byen. Me selman rezon avan nou ti *call* zot pou nou dan sa *meeting*, nou ti vwar bokou bann landrwa - parey mon'n dir - zot in ganny neglig sa bann landrwa.

E la letan ou bann zabitan aprezan i fer resorti avek ou, i demann ou lekel ki netway dan sa landrwa, akoz zot konnen i annan dimoun ki netway dan sa landrwa. Akoz sa bann dimoun pa pe fer zot louvraz.

E prezan sa bann dimoun pe al – byensir ler zot fristre, zot fristrasyon zot pa pou tir lo sa pti kontrakter, zot pou tir lo ou. Parey enn mon koleg in fer resorti. Menm zot pou anmenn Gouvernman tou ladan. Zot pou trenn Gouvernman tou ladan, ki zot dir sa Gouvernman pa'n fer naryen, e pa pe fer naryen.

E menm zot fer resorti ennler kot dir ki i parey avan, ki mannyer ti ete anba ansyen administrasyon. E sa bann kalite komanter koumsa i pa byen, akoz nou sipoze fer pli byen.

E lanmenm ler aprezan, nou koz ek sa bann dimoun, e byensir sa bann kontrakter i vini i fer sa travay parey zot sipoze fer.

Me selman la Mr Speaker, mon le profite pou dir

avek sa bann pti kontrakter; mwan, mon santi ki zot ganny peye – parey nou tou nou dir; *taxpayers money*, zot bezwen delivre e zot bezwen fer sa louvraz avek zot leker.

Akoz bokou zot sa bann kontrakter i pa sa zot *main* travay. Zot travay, zot annan en landrwa kot zot anploye, oubyen zot annan en lot biznes, be selman zot pran sa bann pti kontra par kote, pou zot kapab byensir, ganny en lot pti rannman parey nou dir. E zot pran sa bann travay.

Be par kont, zot napa travayer ki kalifye dan sa domenn. E ki nou vwar, nou vwar zot sa bann pti kontrakter, zot zis zot pran dimoun dan semen *on a day-to-day* – parey nou dir ki *casual*. E sa bann dimoun zis ou war zot pe fer sa louvraz san ganny okenn gidans.

E menm parey ler nou vwar zot osi ler zot pe koup zerb Mr Speaker, zot pa ni realize en transpor pe pase oubyen dimoun pe pase dan semen. Zot zis kontinyen koup zot zerb, ki par kont in arive kot vit loto in ganny kase e en lot problemm i leve ankor.

So, sa i enn bann konsern distrik ki mon krwar bokou distrik mon krwar i osi pe pas ladan, ki mwan lo kote Anse Etoile mon vwar sa i en problemm Mr Speaker.

Me par kont, mon ozordi tre kontan ki nou'n kree en group *WhatsApp* pour tou nou bann pti kontrakter dan distrik. E sak fwa zot fer zot louvraz, byensir i annan enn de pti problem, zot kontan tir portre met dan sa group.

E nou vwar i annan en gran amelyorasyon kot bokou landrwa prezan zot pe netwaye e landrwa i prop. E i zoli ler ou gete Mr Speaker, kot sa bann landrwa ki ti sal avan. Bann rigol pa ti pe ganny netwaye. Zerb la ater partou dan rigol - zot pe fer sa louvraz e sa i vremen byen.

E sa mon ti a kontan ankouraz zot pou kontinyen ek sa bon lapros. E akoz *at the end of the day*, Gouvernman pe pey zot en larzan, zot bezwen delivre. Parey nou dir; foudre ou travay pou ganny peye.

Bann lezot problem osi ki nou gannye en pe dan distrik, Mr Speaker. Par egzansp, en legzanp; nou konnen - en landrwa ki nou konnen dan distrik ki nou annan, Bazar La Retraite kot bann peser in benefisyé, kot en zoli bazaar ti ganny fer.

Me par kont nou sipoze ganny en bazar legim akote sa bazar. E sa, sa larzan in fini ganny Bidze dan sa lannen pour sa bazar. Me par kont Mr Speaker, ler mon pe regarde

akoz sa bazar pa ankore kapab ganny fer ozordi?

Ler mon'n *liaise* avek tou bann Lazans, mon'n ganny dir ki zot pe esper *MLH* donn zot lotorizasyon pou konstrir sa bazar. Plan in fini ganny aprouve, tou keksoz in ganny aprouve.

E en keksoz ki la mon oule profite met devan Mr Speaker; mon krwar ler ou pe koz lagrikiltir - Minister Lagrikiltir, byensir i form par dan Gouvernman. E *MLH* i tonm anba Minis Billy Rangasamy, li osi i form par Gouvernman. E nou pe koz Gouvernman.

So, pou mwan mon konpran i bezwen annan en prosedir ki ou bezwen swiv. Be selman mon pa konpran akoz i bezwen ganny sa retardman, pou kapab zis otoriz Minister Lagrikiltir pou kapab demare ek sa bazar.

E la pou mwan i en pti pe enkyetan, akoz mon'n bezwen entervenir, ekrir mwan menm tou pran sa kopi sa let anvoy kot sa Minister pou dir zot, silvouple, annou en pti pe pli vit lo la. Akoz lannen pe fini e nou konnen ki sa larzan ti ganny Bidze dan lannen pou kapab fer sa bazar.

E ler sa pou aprouve, Mr Speaker, nou tou nou konnen sa proze pou bezwen al dan prosedir *tender* byensir. Prosedir ki normal pou bezwen

swiv. E nou konnen ankor sa i pou pran ankor en pe letan.

E la ankor ki i pa ti neser pou pas dan tou sa bann staz, ki mon krwar ki pou al kree en pti pe nou fristrasyon. Akoz mwan mon menm mon, mon ti fer resorti dan speech Bidze mon krwar, mon ti dir ki zabitan Anse Etoile pa'n ganny Bazar Legim La Retraite. Byensir sa ti en keksoz ki bon pou nou. E ler i annan en devlopman pe arive dan nou distrik, byensir nou tou nou kontan.

E mwan mon'n fer resorti sa. E byensir sa pa ankor materyalize. E la mon priye Mr Speaker, ki tou i ava fini kefwa sa lannen. Byensir mon pa krwar bazar pou fini kefwa avan sa lannen. Me selman *at least* i a konmanse – sa konstriksyon a konmanse.

E ler mon regarde ankor Mr Speaker, an vi ki nou pe koz bann servis de kalite dan nou distrik, ki nou bezwen konnen ki pe pase dan nou distrik, pour lakominote byensir kontinyen ganny sa bon rezilta, pou nou dimoun konnen vreman ki pe pase.

Nou tou nou konnen ki tou distrik i annan bann proze lakaz byensir ki ganny fer, Mr Speaker. E Anse Etoile osi i ankor pe esper en proze lakaz. E tre byento mon konnen i annan enn ki dan Bidze osi sa

lannen, kot pou annan 24 *unit* lakaz La Gogue.

E la ankor Mr Speaker, zot ti'n dir pou pran 15 mwan pou fer. E ankor mon pe met en pti pe presyon lo la - lo sa proze. E mon'n ganny dir ki sa proze i lo son staz *tender*. E byensir, ler i lo sa staz *tender*, la nou Zilyet. E byento mon pa konnen si ou pou kefwa an Out ti an fini materyalize.

E mon krwar ankor anba - kefwa konstriksyon i dir pou pran 15 mwan. E mon pe mazine kefwa, si tou keksoz i al byen, kefwa lafen 2024 mon mazine, kefwa i avan'n fini si tou keksoz i al byen.

Me selman ankor Mr Speaker, i bann keksoz ennler ou koman en Manm Lasanble, ou santi ennler ki i mank en pti pe sa lafors kot sa bann keksoz i merit ganny pouse.

Akoz tou keksoz ki ler pa mars byen dan ou distrik byensir, i tonm lo ou konman en Manm Lasanble. E ennler byensir, i annan dimoun i apros ou dan en fason vreman amikal pou koz ek ou lo la, me pa toultan.

Akoz osi Mr Speaker, ou bezwen realize ki nou osi nou en imen. Me selman par kont nou fer bokou kot nou kapab. E byensir osi nou bezwen tou bann brans bann Minister dan Gouvernman osi, pou zot kapab donn nou sa lasistans

pou keksoz kapab bouze dan nou distrik.

E la mon pou fer resorti osi Mr Speaker, i pa vedir ki tou keksoz pa pe mars byen. Nou annan bokou keksoz ki pe mars byen dan nou distrik, par kont.

Parey nou tou nou'n fer resorti plizyer fwa dan sa Lasanble, kot nou vwar ki *SLTA* i parmi enn bann departman anba Minister Transpor, ki pe fer en bon travay.

E zot ler ou *call* zot, anvoy zot en *email*, menm atraver en *WhatsApp*, zot vremen vini dan distrik pou vin fer sa vizit baze lo kwa ki ou'n dir zot.

E ler zot vini, byensir zot donn nou en nide, kan sa pou materyalize oubyen ki fodre nou fer. E nou annan en bon lapros ek zot. E toultan zot in vini zot in delivre.

E ozordi nou ganny bokou felisitasyon avek nou bann zabitan dan nou distrik atraver *SLTA*, ki menm zot in dir pou tou sa kantite lannen ki byensir zot in reste dan sa distrik, zot in war en kantite ki'n amelyore lo sirfas semen.

Kot byensir parey mon'n fer resorti Mr Speaker, i en louvraz ki *SLTA* i fer. E pou sa nou vremen apresye en kantite. E toultan nou rekonnet ki zot pe fer, e nou pe kontinyen dir zot kontinyen ek

sa bon travay. E nou pou toultan byensir, kot zot fer byen nou pou felisit zot.

Be osi Mr Speaker, parey ler mon pe fer resorti, mon pa kapab osi pa dir naryen lo *PUC* osi tou. Akoz li osi nou servi zot bokou dan distrik. Parey nou konnen, parey i annan bann poto elektrik ki kekfwa i pa dan sa landrwa kot i sipoze.

Bouz sa poto elektrik oubyen bers li dan bann brans dibwa ki pe anpandan lo bann laliny. I annan bann keksoz ki dimoun i konplent avek nou, nou bezwen *liaise* ek *PUC*.

E parkont Mr Speaker, mon krwar lo kote nor nou annan en dimoun ki nou *liaise* avek kot *PUC*. Mon pa anvi mansyonn son non, akoz i pa pou kree kekfwa lazistis pour larestan.

Me selman sa madanm i toultan – ou anvoy li en *WhatsApp* i pou reponn ou, i pou dir ou ki ou bezwen fer. E en pti moman ou ganny en *call* kot *PUC*, i dir ou donn plis lenformasyon lo sa ki ou pe rode. E ou vwar sa bann travayer *PUC* i vini i fer sa travay.

E pou sa mon pou vremen felisit sa dimoun ki konnen – si i pe ekout nou i konnen lekel li, akoz mon'n toultan anvoy li en mesaz pou dir li kontinyen ek sa bon travay.

E i montre ou ki si dan tou departman bann Minister nou ti annan en dimoun koumsa, ki nou ti kapab *liaise* avek pou donn nou sa servis, mon krwar ozordi kekfwa nou lapros ki nou pe koze lo la kekfwa i ti pou en pti pe diferan. Be, pou sa Mr Speaker, i annan bokou ki pe ganny fer.

Aprè en lot pti keksoz avan mon pou terminen Mr Speaker, parey nou tou nou konnen dan nou distrik i annan – mon konnen enn nou Onorab – Lemiel ti anmenn en Mosyon lo zafer koup pye dibwa.

E nou tou nou konnen dan nou distrik – byensir la nou dan vandswet, nou konnen i annan bokou bann pye dibwa ki menas bann lakour. Kantmenm napa vandswet byensir nou konnen toultan bann pye dibwa la nou le fer koupe.

La i annan en problem kot nou ankor *still* pa pe vreman konnen ennler lekel ki sipoze pe koup sa pye dibwa. Ennler nou'n atann dir *Local Government*. Ennler nou tann dir *SLTA*. Ennler nou tann dir Lanvironnman.

Mon krwar i annan en lot ankor. Mon pa pe mazine la. Menm mon krwar *SPTC* lontan tou ti antre ladan, bann ki o bor semen. E la mon krwar en keksoz kekfwa ki merit

amelyore, sa i merit annan en landrwa - mon krwar nou'n deza fer resorti dan Lasanble, kot nou merit annan en landrwa - zis en landrwa spesifik ki li i ansarz tou pye dibwa dan pei. Ou *liaise* ek li, li i pou konnen lekel ki pou vin koup sa pye dibwa.

So nou pa bezwen al dan diferan landrwa. Sa enn i dir ou anvoy kot sa lot. Nou, nou pa konnen ki bor nou bezwen ale nou. Nou, nou bezwen al kot ou. Ou, ou ava prezan *delegate* sa pou nou ou. Ou vwar?

So, Mr Speaker, mon'n dir en pti pe be selman mon napa bokou ankor plis ki sa pou dir. E mon santi ki Mosyon Onorab William, si nou enterpret li byen i en bon Mosyon.

Akoz i pe ede pou nou anmenn plis dibyen pou nou distrik - pou sa bann Minister ki travay avek nou dan nou distrik, pou nou kapab dir zot bouz en pti pe plis ki nou osi nou konman en Manm Lasanble, nou a santi nou dan en pti pe pli konfor.

Dan en pti pe pli - mon kapab dir ek nou zabitan - ki i ava konpran nou pli byen, ki ler nou met en pti lavwa devan. Ou anvoy nou en *email*, en *WhatsApp* parey nou dir, ki zot osi zot ava rekonnèt nou ki nou dan distrik. Nou konnen problem nou distrik. E zot

bezwen regard nou en pti pe – en pti pe pli o serye, ki i pa pran sa gran dele letan. Mon konnen i annan 26 distrik.

E pa zis en serten distrik ki ou bezwen donn tou latansyon. Me selman donn nou sa lasistans, kot *at least* nou a kapab osi anmenn dibyen pou nou zabitan.

Mr Speaker, bokou i kapab ganny fer, si nou tou nou viz ver en sel direksyon. E sa nou konnen pour benefis nou pep dan nou distrik.

E alors Mr Speaker, mon pou dir ou mersi pou sa letan ki ou'n donn mwan pou dir enn de mo. E mon le dir Onorab William, i pou ganny tou mon sipor pour sa Mosyon. Mersi Mr Speaker.

(APPLAUSE)

MR DEPUTY SPEAKER

Mersi Onorab Romain. Mon krwar ou merit donn *dues* kot *dues* i merit donner. Mon krwar ou ti merit mansyonnen lekel sa bann dimoun *PUC*.

Akoz mon konnen i annan Manmzel Maria Payet avek Marie-Antoinette Laurence, - konm dir Minis Billy Rangasamy - senpleman sanpyon.

Sa de dimoun, *whatever led* ki ou bezwen, zot donner. *So felisitasyon and keep up the good work!*

(APPLAUSE)

MR DEPUTY SPEAKER

Prosenman lo lalis i Onorab Doyace Porice.

HON DOYACE PORICE

Mersi Mr Speaker. Bonzour Mr Speaker ek tou mon bann koleg *MNAs*.

Mr Speaker avan mon fer mon lentervansyon, mon anvi felisit Sir Sony Athanase pour sa bon travay ki in fer anver nou atlet lo Praslin.

Kot i annan 2 atlet Rashid avek Geesha ki'n ganny meday, Moris. E pour sa ankor enn fwa nou dir li mersi pou sa bon travay ki i pe fer.

Mr Speaker, Mosyon anmennen par Onorab William, i en Mosyon ki pe anmenn en solisyon dan tou sekter gouvènmantal, prive e tou lezot landrwa travay; kot pou ede aret annan gaspiyaz dan tou son splander. Kot nou anmenn en servis egzantpler pou anmenn nou pei pli devan.

Nou rekonnet, Mr Speaker, ki nou annan travayer e kontrakter ki pe fer byen. E tre byen. E pour sa, nou dir zot mersi. Serten travayer e kontrakter, pe konpran ki mesaz nouvo Gouvènmant pe anmennen anver son pei.

E sa i fer mwan mazin nouvo proze lo Baie Ste Anne, Praslin. Parey Lasose Ero, *roundabout*, bazar, nouvo lofis pou travayer SFA, eksetera. Bokou ankor kot in annan bokou konsiltasyon anver zabitan distrik e osi Gouvernman.

E mwan osi konman en Manm Proporsyonnel, mon'n donn mon sipor atraver bann bon konsiltasyon ki Gouvernman i anmennen.

E la mon pou remersi Linyon Eropeen, SFA e sa kontrakter ki'n donn Baie Ste Anne en zoli bazar ki'n fer mwan, fermye, peser e osi labousri vreman kontan lo nou zil.

Bann proze lo Baie Ste Anne pa'n esper ni 5an, ni 10an pou fer, me zis 2an edmi, Mr Speaker. In montre nou ki nou Gouvernman pe delivre. E bokou ankor pe al ganny fer.

Mantalite, latitid par serten travayer ouswa anplwaye. Sanz tou e anmenn sa lanmertim anver lezot. E la travayer pa mars byen. E la i pou osi annan gaspiyaz. Si nou anmenn sa respe, dialog, nou pou fer tou byen. Akoz ozordi dimoun pa oule ou pran li pou en "pa nonmen."

I annan difikilte ki nou kapab rezourd. La pour sa, si nou pe anmenn sa bon servis - ankor konsiltasyon i

enportan, Mr Speaker. Nou osi, konman en Manm Lasanble, nou bezwen anmenn nou sipor anver distrik, kominote, Gouvernman pou ede fer marse nou pei.

E la mon pou sipli avek mon bann koleg Manm Lasanble US. Sirtou bann ki'n ganny elekte, ki zot osi zot bezwen siporte, non pa reste lwen apre nou zis *boycott*.

Si nou pe koz lezot travayer pou fer byen, nou osi nou bezwen fer byen. Avek sa de mo, mon dir mersi Mr Speaker.

MR DEPUTY SPEAKER

Mersi Onorab Porice. Prosenman lo mon lalis i Onorab Francois Adelaide.

HON FRANCOIS ADELAIDE

Mersi Mr Speaker. Bonzour Mr Speaker. Bonzour tou Manm Lasanble, Sekretarya e tou dimoun ki a lekout.

Mr Speaker, mon osi mon pou profite pou mwan dir de pti mo lo Mosyon Onorab William, ki mon vwar ki i annan en merit. E mon krwar kot i annan en keksoz ki nou kapab fer, parey mon pe dir pou nou pei. Zis parey yer. Mon krwar nou bezwen apiye.

Nou konnen poudir pa tou keksoz ki an roz dan okenn pei. I annan keksoz ki byen, ki nou bezwen felisite e

ankouraze. E byensir i annan bann ki mon pa dir i mal, me petet ki demann en pe plis lankourazman, pou zot osi kapab fer en pe pli byen.

Mr Speaker, nou annan en Prezidan ki mon panse i annan en bon grander lespri. E son bann *statement* ki i fer par ler, i souvandfwa bann *statement* ki ou bezwen repas lo la kontinyelman pou ou vreman konpran ki i pe *mean*.

Ti annan en – mon kapab dir - en fraz ki i ti dir; *run* ou Minister ouswa *run* ou departman parey ou prop biznes.

Mr Speaker, be sa i en gran *statement*. E i en *statement* sarz ki si nou tou nou met latansyon avek, mon krwar nou pou trouv bokou pozitivite dan en *statement* parey.

Mr Speaker, mwan mon ti anploye avek Minister Lasante avan, ler mon ti konmans travay. Apre pour rezon ou en lot, mon ti bezwen al fer en pti biznes pou mon menm.

E se la sa bann letan ki mon'n kapab konpar sa 2 keksoz, ki ler ou pe travay pour en lakonpanyen pour Gouvernman, ouswa ler ou pe travay pour ou – ki mannyer - sirtou ler ou pe travay pour ou, ou bezwen bouze. Ou bezwen fer sir ou pran bann

desizyon byen kalkile. E fer sir ki dan ou lavi e lavi ou fanmir i annan prosperite.

Mr Speaker, mwan mon krwar ozordi, nou'n viv bokou letan kot ti annan bann desizyon ki - mon konnen poudir nou annan en ta Seselwa kapab.

Me zot pa ti ganny sa sans pou zot kapab pran desizyon, aköz ti annan en letan tou desizyon ti'n bezwen pran anler *State House*, par en sel dimoun.

E bann dimoun ki ti annan sa kapabilite pou zot kapab pran desizyon, byensir zot pa ti kapab egzers sa drwa. E ou konnen ler ou pa *practice* en keksoz, byensir ou tant pou perdi bann *skill* ki petet ti kapab ed ou bouz pli devan.

Mr Speaker, nou'n trouve dan *meeting* piblik - nou'n trouve dan *meeting* piblik ki i annan bann problem ki bann dimoun in anmennen de lannen. Menm 4an, 5an Mr Speaker. I pran zis 2 minit, 5 minit e deswit sa dimoun i kapab ganny en solisyon.

Savedir ki i montre ou? Pou dir i annan bann desizyon. Mon konnen wi, i annan bann desizyon ki ou pou bezwen pran en pe letan. Be nou annan en bann desizyon osi ki nou'n kapab fer en pe resers o pli vit posibil, e donn sa dimoun en rezilta.

Mr Speaker, ozordi laplipar dimoun i fristre, pa akoz i pa ganny sa ki i bezwen, me akoz en senp larepons ki petet i ti pou determin ki kote son lavi pou ale. E i pa pe esper promes li. Swa en wi, swa en non, e li apre i ava debourye i ava konnen ki i pe fer.

E souvandfwa sa bann keksoz pa arive. E se la kot fristrasyon i arive. E sa i fors nou pep petet pou mazin otremman. Mon mesaz – mon pa pe dir ki tou keksoz i mal. Parey mon'n dir; mon konnen poudir i annan bokou bann bon keksoz. Me i annan osi ki mon krwar nou devret *improve*.

Mwan mon krwar ki sak travayer, sirtou dan Departman Gouvernman - mon krwar in ler pou nou pran sa lapros poudir ler nou ganny donnen en responsabilite, nou kapab *accountable* pou nou bann desizyon ki nou pran.

Si nou pe ganny peye en lapey tou le lafen dimwan, mon krwar i egalman enportan ki toulezour ler nou desann, atraver *taxpayers money* ki pey nou tou le lafen dimwan, mon krwar i vreman enportan pou nou travay sak zour, e mazin ki mannyer nou kapab fer lavi sa pep vin pli mye.

Akoz se atraver, parey mon pe dir *taxpayers money*, sak sou ki nenport endividi i

mete, ki nou kapab ganny sa larzan pou nou kapab donn sa bann dimoun en lapey.

Mr Speaker, mwan mon krwar ki Seselwa i bezwen realize poudir sanzman an 2020 in en sanzman ki i sipoze pozitiv. Kot tou dimoun sanzeksepsyon, no *matter* ki pozisyon ou ete dan servis piblik, dan servis prive.

Mon krwar in ariv en letan kot nou bezwen kapab pran bann desizyon. Mon krwar nou bezwen kapab pran bann desizyon pour byennet nou pep, e byennet nou pei an zeneral.

Ler mon lo la Mr Speaker, dan mon distrik mon osi, Baie Lazare i annan bokou bann proze ki'n materyalize. E sa mon pou dir mersi tou sa bann departman, tou sa bann dimoun, tou sa bann Minister ki'n ede pour realiz sa bann proze.

E mon bezwen realize poudir i annan ankor proze ki i ankor dan *pipeline*. E petet i annan osi – i annan osi bann servis ki mon kominote pe demande, e ki pa tou kou i ariv a ler.

E mwan konman *MNA* tou kou mon pou bezwen – i mon travay ki mon pou bezwen *chase*- mon pou bezwen *chase* sa bann Minister, departman konsernen pou *at least* pou

mon bann dimoun ganny en larepons.

Zis parey Onorab Porice in dir; pa zis travayer piblik ki devret travay. *MNA*. Dan Sekter Prive. Mon panse ki nou tou nou devret kapab pe delivre pou ki nou kapab anmenn prosperite pou nou distrik, pou nou pei an zeneral.

Mr Speaker, la mon pe osi lans en lapel. Mon ti annan en *email*. Mon krwar sa konsernen mon krwar zot pou bezwen ekoute. Mon pa pou bezwen nonm non ozordi. Me si i kontinyen, mon pou nonm zot non enn par enn, pou nou konnen lekel ki pe donn problem, e ki pe fer keksoz pa arive.

Nou annan en sityasyon *Ex Gondwana* kot nou'n raporte avek departman konsernen, ki dan sa *flat* i annan en *crack*. E bann dimoun i enkyet. Zot anvi konnen ki mannyer laspe sekirite i ete. I annan en pe letan ki *MNA* in anvoy *request* kot sa bann departman.

Mon'n anvoy premye *request*. Mon'n anvoy dezyenm *request*. E ozordi mon'n anvoy en *final reminder*. So, ozordi mon pa pou nonm zot non. Si zot pe ekout mwan silvouple, pran zot responsabilite. E fer zot travay, donn sa bann dimoun en larepons.

Akoz *next time*, mon pa pou gete lekel ou. Ki ou responsab. Mon pou nonm zot non dan Lasanble Nasyonal, akoz mon krwar la ki mon'n ganny mete pou mon defann zentere mon pep.

E si zot pa pe fer zot travay, mon krwar zot pou bezwen kapab donn en larepons. Napa personn dan departman Gouvernman ki nou kapab dir i endispansab. Sa nou bezwen mazin.

E ou *LDS*, ou *US*, ou nenport - Katolik, Protestan, si ou pa pe delivre, mon krwar le moman in arive apre 3an mon krwar zot kapab – tou bann dimoun in kapab *assess* zot lekor.

E si zot trouve poudir sa travay pa pou zot, zot pa kapab fer sa travay, mon krwar in plis ki ler pou nou sed la plas. E donn bann dimoun ki anvi travay sa loportinite pou travay. E fer nou pep – e donn nou pep sa ki zot bezwen e sa ki pou fer zot lavi prospere.

Mr Speaker, parey mon pe dir; dan lepase in annan en pe keksoz ki ler mon gete, petet sa osi in kapab ede pou fer ki nou dan sa sityasyon kot dimoun pa pe kapab pran desizyon.

Nou'n trouve poudir ti annan bann Minister, ti annan bann departman ki tou kou ti annan son replika. E ti annan

sa *zwe pass the buck*. Sa pa mwan ki fer, sa ki fer. Sa pa mwan ki fer, sa ki fer. E zanmen bann desizyon in kapab ganny pran pour lentere sa pep.

I vre ler nou'n vini atraver sanzman – parey bann Onorab i kontan fer nou mazine, poudir nou vin fer pli byen ki sa Gouvernman avan. Wi, i annan enn de bann departman ki nou'n *revamp*.

E petet i annan enn de ki'n bezwen fermen. E nou'n bezwen anbelir lezot, pour ki sa pep i pa zis ganny tourn an ron ler i bezwen annan bann desizyon ki pour son lavi e ki pou ed li a lavenir.

So, Mr Speaker, parey mon pe dir – mon pa pe dir ki tou keksoz pa bon. Mon aksepte poudir i annan bokou keksoz ki pe byen bouze. Dan Baie Lazare nou trouve i annan bann proze ki pe byen demare. I annan ki pe vini.

Dan Sesel nou'n trouve konbyen bann koup riban ki nou'n koupe. Savedir i annan progre, me selman i annan landrwa kot mon krwar ki nou pou bezwen – nou pou bezwen met plis zefor. Mon krwar la i letan. *Ok?*

Si dan lepase ou ti ganny dir trenn lipye aköz nou bezwen fer sa bann dimoun fristre, pour ki petet ler lot eleksyon i a vini, nou ava

kapab met en lot parti. E la nou ava rekonmans travay.

Mr Speaker, tou bann dimoun ki'n ganny konseye pou fer koumsa, silvouple sanz zot nide. Parey mon dir, se sa pep ki leve bomaten ki al debourye ki al travay, e atraver sak sou, i kontribye pou fer nou lapey, annou silvouple, annou tret sa pep avek plis respe, avek plis dinyite. Donn li sa ki i bezwen. E mon krwar nou osi nou ava ganny sa ki nou bezwen.

E konman *MNA* parey mon pe dir, Onorab, ou Mosyon i annan son merit. Mon pou donn ou sipor. E esperon ki tou dimoun ki pe ekoute i tandé, i konpran pou ki nou – mwan mon par la, nou par la pou pas zizman lo personn.

Byensir kot i annan letan, nou pou ankouraz zot. E kot nou pou bezwen dir zot sakouy zot, mon krwar i toutafe normal ki nou dir zot.

Akoz mon krwar nou en parti ki responsab. Nou en pep ki nou annan en parti ki realis e nou anvi sa ki byen pou nou pep. E mon krwar nou bezwen gid zot byen.

Avek sa de mo Mr Speaker, mon ava dir ou mersi pou donn mwan sa pti letan.

MR DEPUTY SPEAKER

Mersi Onorab. Prosenman lo lalis i Onorab Norbert Loizeau.

HON NORBERT LOIZEAU

Mersi Mr Speaker. Bonzour tou Manm. Bonzour tou dimoun a lekout.

Mr Speaker, mersi pou ganny en sans pour koz lo Mosyon Onorab William. En Mosyon ki ase larz kot nou kapab tous bokou keksoz.

Me mwan mon a profite, vi ki mwan osi mon annan en distrik konman en Manm Elekte, mon a tous serten keksoz ki petet mon krwar i enportan ganny adrese.

Mr Speaker, an 2020 nou *motto* pour eleksyon ti “Sesel pou tou son zanfan”. E Prezidan li i ti vin avek sa, akoz i ti santi ki vreman Sesel i bezwen retourn pour tou son zanfan. I ti war ki Sesel pa sipoze zis pour en group dimoun ouswa pou en parti politik.

Me plito Sesel i sipoze appartenir a tou Seselwa. E tou Seselwa i annan par ladan. E tou Seselwa i bezwen zwe son rol enportan, pou fer sir ki Sesel i bouz devan. Pou fer sir ki Sesel i reste sa pti bizou ki santer i sant lo la.

E parey dan mon distrik Bel Air, Mr Speaker, nou osi nou santi ki Bel Air i bezwen reste sa landrwa – parey John Wirtz i sante; “Bel Air sanmenm landrwa ki mon pli kontan,” Mr Speaker. Akoz Bel Air i enn parmi bann zoli

distrik. Enn parmi bann distrik byen prop, Mr Speaker.

Kot ler ou get nou semen li menm. Ler ou antre kot en lakaz Mr Speaker, i montre ou ki kalite dimoun ki reste dan sa lakaz. E ler ou antre Bel Air ou get nivo lapropte, ou get nivo lezot keksoz ki nou annan dan distrik, i montre ou ki distrik Bel Air i en distrik ki bann dimoun i serye, prop. E pare pou travay pou bouz nou pei devan.

Mr Speaker, me par kont i osi annan bann defi dan mon distrik. Enn bann defi se mank presizyon lo serten keksoz. Parey ki nou'n vwar, ozordi nou pe ganny bokou difikilte avek *wayleave*. Sa i vin akoz Mr Speaker? Akoz lafason ki bann later in ganny *allocate* san en bon presizyon, kot semen pou pase.

Kot ozordi ou war dan *meeting* piblik sitwayen dan distrik Bel Air pe *voice out* zot lopinyon, akoz napa semen ki pe ariv anler. Akoz sa ki reste pli ba pa le sa ki reste pli o ariv se li.

Mr Speaker, tousala in arive akoz bann mank presizyon lo lafason ki bann keksoz in ganny fer, Mr Speaker.

E nou ozordi konman en Gouvernman, nou santi li nou devwar pou nou kapab sey *deal* avek sa bann sityasyon ki

parfwa nou pa pe trouv solisyon, Mr Speaker.

E gaspiyaz resours Mr Speaker, parey mon'n dir dan mon distrik nou pa'n eparnye ek sa. Gaspiyaz resours dan lenplimantasyon serten proze.

Mr Speaker, nou'n war ozordi dan distrik kot nou bezwen refer bann proze. Bann proze ki'n ganny fer en pe letan avan ki pa'n ganny fer byen, Mr Speaker.

Kot nou ozordi, nou bezwen trouv resours pou non refer sa bann proze, kan sa resours ki nou ti pe servi nou ti kapab servi pou fer lezot keksoz.

Parey, Mr Speaker, i annan bann pti *railing*. Bann pti semen kot i annan *railing*, Mr Speaker, kot ou vwar kalite travay ki'n ganny fer pa ti lo standar.

E ki i annan *des années* i annan serten dimoun pe demande pour *railing* ganny fer, aköz i pa solid. E souvandfwa sa bann landrwa i annan bann dimoun aze. I annan bann dimoun aze ki servi sa landrwa.

Mr Speaker, nou'n vwar ki i annan serten keksoz ki pandan – ki ti en bann promes ki ti ganny fer kot serten dimoun.

Parey la mon pe mazin an montan Anba Zanblon pou mont an kouri kot Tida, an montan, ti annan bann

dimoun ki'n donn morso later pou kapab fer en *footpath*, pour bann dimoun kapab ariv se zot, annakor ki zot ganny en miray - en *retaining wall* pou kapab anmas zot later.

E ozordi ler nou war, *retaining wall – retaining wall* ni en bout feray napa ladan. *Retaining wall in crack*. E ozordi travay i bezwen ganny refer, Mr Speaker, zis aköz move planifikasyon lo serten keksoz.

E ozordi par kont, Mr Speaker, *SIA* i bezwen mele. *SIA* i bezwen mele pour fer sir ki bann proze ki ganny met devan pou fer i ganny fer byen.

Ki bann plan pour sa proze – menm si *Local Government* ki pe antreprann sa proze. Me apre ki zot, zot in fini organiz bann keksoz, i bezwen al laba pou fer sir ki son plan lo kote *engineering*, tou keksoz i pas byen.

Mr Speaker, e tousala se bann keksoz ki mon pe vwar dan distrik, e ki i pa zoli pou war. Aköz sa bann larzan ki nou tro depanse la, nou ti kapab fer li dan lezot keksoz.

Mr Speaker, nou'n vwar serten dimoun aze dan nou distrik ki'n sibir serten konsekans, Mr Speaker. Aköz? Si nou rapel, i annan sa bann *improvement loans* ti pe donn bann dimoun aze 100mil.

Mr Speaker, ozordi sa larzan nou pa konnen manner ti adminis... ti sipoze pour sa dimoun. Me la ler mon *DA* pe pase – Dan Koko i annan en ka, kot sa msye ti pran 100mil e ki i ankor peye pou rekouver son *roof*.

E ler i al vizite, ler ou gete napa gran keksoz ki'n ganny fer. Selman sa msye li i ankor pe pey son *loan* konman en dimoun aze. E dapre konpran, li in zanmen kapab pran sa larzan li, malgre li ki pe peye pou li kapab fer sa proze li menm.

Ti annan serten dimoun dan distrik, ki sak fwa ti ganny sa larzan ti dir; anmenn kot mwan, mwan mon pou organize pou peye. Ozordi ler nou get proze, Mr Speaker, nou konman Lotorite Distrik - mon *DA* in bezwen ale, al revwar sa msye, pou nou kapab konpran ki fason pou nou kapab reaziste li. Menm si i ankor pe pey son *loan*.

Me par kont Mr Speaker, dan tousala, i annan sa eleman tarde ganny peye par bann kontrakter. Sa en eleman ki lontan pe arive, Mr Speaker.

Mon menm mon bann letan ki ler mon pa ti ankor dan politik mon ti fer, fer bann travay, in deza pran mwan pres 8 mwan pou mwan kapab ganny en peyman. Kot ou trouve peyman i sorti isi i al

kot lot. Ler ou vini i dir ou i kot *PS*. *PS* in oubliye in anvoy kot soz.

Tousala Mr Speaker, se bann lanpayaz ki'n annan e ki ozordi in still annan, Mr Speaker. Malgre Sesel pour tou son zanfan, i ankor *still* annan sa bann lanpayaz. E nou, nou anvi dir ek sa bann dimoun; annou bouze!

I byen nou annan nou politik ki nou fer, si i annan ki pe fer politik - mon pa pe dir, mon pa pe akiz person - si i annan ki pe fer. Me selman annou fer li an deor nou travay. Annou pa fer nou bann dimoun fristre.

Annou fer sir – parfwa en peyman tarde i okazyonn retar dan serten travay, Mr Speaker pour sa bann kontrakter. E par kont osi Mr Speaker, i annan peyman ki ganny fer vit, me selman louvraz, travay pa alaoter. Sa nou merit admet.

I annan kontrakter ki serye, ki pe fer travay serye prop, byen, zoli. Me i annan osi nou bezwen admet, ki zot travay pa alaoter. Me selman ler konsern ganny peye, zot le ganny peye.

E la Mr Speaker, sa i dan tou departman Gouvernman ki annan sa retar peyman. E la mon anvi dir ki, annou bouz en pe. Annou bouze pou ki sa bann kontrakter zot osi, Mr Speaker, zot a kapab ganny en

pti *cash money*, pou zot kapab petet kontinyen e fini sa travay en pti pe pli boner posib pou satisfè nou kominote.

E ler mon pe koz louvraz alaoter Mr Speaker, nou'n war legzanp le 29 Zen. Oter louvraz ki nou Gouvernman pe dir ek dimoun fodre i annan.

Legzanp i *National Library* Mr Speaker. En travay ekselan e ki in pran en letan apropiye pou fini.

E byento nou bann zanfan – nou bann zanfan pou kapab antre dan en *library* modern, pou zot kapab ganny zot bann liv, pou zot kapab fer zot resers.

E sa en keksoz ki byen akoz i annan plis ki 5an, 6an nou'n annan en *library* ki'n fermen. Prezidan in fer resorti sa dan son diskour le 29 Zen. E la ozordi keksoz in fini bouze. *Library* in fer.

E en keksoz pli enportan ki nou Gouvernman i fer - ki nou Prezidan li, li menm i pe dir - In menm dir apre ki diskour ki direkter ti dir pou pran 5 mwan. Prezidan in dir non! Sa bann zafer retar 5 mwan, 6 mwan fodre arete. Plis ki 2 mwan, 3 mwan fodre bann keksoz in ganny mete pou bann zanfan kapab bouz dan sa *library*.

Mr Speaker, se sa lespri ki nou Gouvernman pe vin avek. Sa bann zafer tarde, trenn lipye, esper isi, esper 2

mwan, esper ankor 3 mwan, sa en keksoz ki mon krwar nou bezwen met li deryer nou, e annou bouz devan. E Prezidan osi in met lanfaz lo kalite louvraz, e osi lo mentenans.

Mr Speaker, dan mon distrik osi i annan bann keksoz ki napa *maintenance* lo la. Parey ler mon'n koz lo sa bann pti semen kot *railing*, in napa *maintenance* ki'n ganny fer lo la. Zis *railing* in ganny fer. Ni en pti kours lapentir pa'n ganny pase pou *deal* ek larouy.

E ozordi tousala in tonm an rin, e kot i pe kout nou en ta larzan pou nou kapab remet li dan proze distrik. E mazine ou nou pa ganny bokou dan distrik pou nou fer nou bann proze.

E ler ou war ou pe retourn lo bann proze ki ti sipoze fini fer. E nou, nou pe bezwen re aranze pou fer li pli byen, i met en pe lanpayaz, sirtou lo nou distrik.

E, ozordi Mr Speaker, i enportan ki ler nou pe koz lo tousala - travay bann proze. I enportan ki nou ankouraz nou bann zenn. Annou leve. Annou sorti anba pye dibwa laba pou vey en bout bwar, en bout drog.

Annou bouze, annou travay. Annou vin sa bann zouvriye kalifye Seselwa, pou nou pa konplent etranze pe

antre, pe pran nou plas. Ki nou, nou kapab fer pou nou pei nou pou anpes sa bann etranze antre pran nou plas, menm si nou pa pou kapab anpes tou antre? Nou bezwen leve pran en travay serye.

Mr Speaker, mon rapel lontan *Technical School* ti prodwir bann teknisyen, bann travayer, bann mason, ki ozordi zot antre lo laz, Mr Speaker.

E mon mazine *by the time* sa bann dimoun i pran zot retret, mon demande oli ankore? Oli ankore nou bann zouvriye kalifye Seselwa, ki nou pou kapab kontakte ozordi pou vin fer en pti proze dan distrik pour nou?

Pou vin met en pti *tiles* kot nou lakaz, pou azout en pti bout lavarang. Nou pa pou war, Mr Speaker, si nou pa ankouraz nou bann zenn. Nou pou war zis bann travayer konstitisyon Endyen da zot *spare time*, pe kontinyen pe vini, pe fer sa bann travay. Kan nou, nou ti kapab fer sa.

Me Mr Speaker, dan tousala, pa zis dan domenn konstriksyon ki nou merit gete. Nou merit get dan tou domenn. E la Mr Speaker, ou ava rapel yer dan Lasanble Nasyonal nou ti war sa kantite profesyonnel sorti kot Finans.

I annan menm ladan, Mr Speaker – mon'n dan Lasanble en pe letan, zanmen mon'n

konn zot. Zot ti la zot selman Mr Speaker, zot ti la. Me selman zot ti ganny met en pti pe akote akoz zot ti prefere ganny dir ki pou fer olye zot partisipe, Mr Speaker - dan bann keksoz konsernan finans pour nou pei.

E ozordi Mr Speaker, mwan konman en Onorab, mon annan konfyans dan sa bann profesyonnel pou ansarz nou larzan, Mr Speaker. Akoz mon annan konfyans?

Lafason ki serten in deliber-e la devan, Mr Speaker, zanmen mon'n war. Zanmen mon'n war dan lepase. Ozordi bannla pe koz fran. Sa bann profesyonnel pe dir nou keksoz mannyer i ete. E zeran. Pe zer nou larzan byen.

E la Mr Speaker, ler nou annan bann dimoun, bann profesyonnel ki pe zer nou larzan byen. Be lezot departman alors Mr Speaker, zot bezwen bouze. Zot bezwen *step-up* zot osi.

Nou pa kapab annan bann dimoun ki pe zer nou larzan, ki pe fer sir tou keksoz pe deroul byen lo kote finansyer, me selman dan lot kote, i annan pa pe montre akoz zot bezwen ganny sa finansman.

E Mr Speaker, an kitan sa. E la mon anvi – Mr Speaker, mon pou retourn ankore lo bann proze lakaz.

Mon anvi felisit *MLH* ek tou bann dimoun. Tou bann dimoun swa kot *SIA*, bann *project officers* Mr Speaker, ki'n travay lo 6 *unit* lakaz Sans Souci, ki byento i pe al ouver byento. Posibleman sa mwan.

Mr Speaker, akoz mon felisit zot? Sa ti en proze ki depi avan 2020 sa proze ti vin lo lata. Mon pa konnen ki'n arive avek. Proze in lo *hold* en bon pe letan e zabitan Bel Air in tay isi partou laba pou ganny lakaz. Me proze zanmen in ganny fer. Nou'n ganny 24, nou'n konpran. Nou dir mersi pour sa 24, me i annan mankman.

E la mon anvi dir mersi pour sa 4 *unit*. E la mon anvi dir sa 6 *unit* ki'n byen – Mr Speaker, en larsitektir parfe ki *blend* dan Sans Souci, akoz Sans Souci nou annan bokou rezerv. Zoli landrwa ki'n ganny *monitored* par bann teknisyen pou fer sir ki travay i ganny fer byen.

E mwan tanzantan mon ti pase mon ti gete, menm si mon pa pe koz ek sa bann teknisyen. Zis mon ti pase mon ti met en lizye lo la.

E la mon anvi dir ek bann dimoun ki pou antre dan sa lakaz; okip zot lakaz. Mr Speaker, tousala i enportan. Nou pa kapab zis rod lakaz apre nou pa okip lakaz. Okip zot lakaz. Pa fer annan bann nwizans.

Kot sa bann *flat* in fer la 6 *unit*, en zoli pti kominote trankil. Pa vin *disturb* zot vwazen ek lanmizik, fer tapaz, anmenn drog dan *stairs*. Parey pe arive dan tou bann lezot landrwa dan distrik kot i annan bann *housing estate* Mr Speaker.

E mon konnen Mr Speaker, zabitan Bel Air parey mon'n dir, en bann zabitan ki konpran. Mon pa dir lezot pa konpran. Ki annan en bon savwar viv.

E ki mon konnen ki sa *flat* la ki pe al gannyen, sa bann dimoun ki pou vin la, se bann dimoun ki pou okip zot landrwa. E ki pou fer sir ki napa okenn *disturbance* dan zanmerant.

Mr Speaker, ozordi nou'n ganny 6. Se sa linisyativ ki mwan mon ti dir avek Minis. Mon pa le 24, 50 *unit* en sel landrwa. Zot dir napa teren. Si zot war en pti *pocket* zot kapab met 6, donn mwan, mon pran.

Si zot war en lot landrwa ki nou kapab met ankor 4 – akoz Bel Air son topografi mannyer i ete, zot pa pou kapab *blend* en ta gro, gro *flat* partou. Si nou 3. Nou ganny 6 isi.

Mr Speaker, ler nou met li ansanm i fer nou 24, 50. E se koumsa ki Bel Air nou, nou reste. Pa neserman ki nou fer en manman *housing estate* kot apre i annan tou sa bann

problemm sosyal e ki a lafen, dan sa kominote i ganny *disturbed* avek lezot keksoz.

Mr Speaker, ozordi dan mon distrik – mon pou koz for lo mon distrik Mr Speaker, avek larive nouvo Gouvernman Mr Speaker, i annan proze ankor ki ti'n ganny retar.

E la dapre ki konversasyon ki mon pe fer avek Mr Shah, proze i sipoze al ganny demare. Bann *Mid-range Condo* ki pou al ganny fer anler kot vye *daycare*.

E mwan Mr Speaker, mon pe ankouraz – en keksoz ki mon pe fer avek tou dimoun Bel Air, tou zenn - pa depan lo *social housing*. Finans ou proze.

Akoz Mr Speaker? Ki ler ou finans ou proze, se ou larzan, ou labank ki'n finanse. E ou, ou pou bezwen fer sir ki ou protez sa ki ou'n finanse.

Akoz *social housing* – i annan dimoun i rod *social housing* apre zot pa antre. Zis pou vin zot in ganny *social housing*. Akoz zot pe peye? I annan i lo *rental*, i annan pe pey par morso. Me ler ou'n ganny sa finansman, ou'n finans ou proze ou menm avek ou labank Mr Speaker, i pou montre ki ou en dimoun responsab.

E mwan mon pe ankouraz tou zenn dan mon distrik. E i annan en bon pe

Mr Speaker, ki ti lo *social housing*, in montre sa lenterere pour zot antre lo sa proze *mid-range condo*. E mon satisfé avek.

Ozordi nou annan anviron, sote en ventenn - posibleman en karantenn zenn, bann koup ki'n enterese pou zot antre dan sa proze.

Mr Speaker, parey mon'n dir an terminan, Sesel i pour tou son zanfan. E ler Sesel i bouz de lavan, i bon pour mwan, i bon pour ou, i bon pour tou Seselwa.

E i enportan pou nou konnen. Ozordi nou kapab la dan Gouvernman, nou bezwen fer keksoz ki pou byen pou nou pep. Nou bezwen ankouraz tou sa bann bon mannyer fer dan nou dimoun.

Parey ler Prezidan i koz lo servis piblik. Pa trenn lipye. Annou bouze. Pa met politik. Ki en fason, Mr Speaker, a lavenir la - Gouvernman sanze, sa bann dimoun – nou lo servis piblik, pou en lo servis piblik ki pou delivre.

Ki pou delivre, aköz? Akoz nou tou nou pa pe fer li pour nou byen politik, me nou pe fer li pour Sesel, e pour tou Seselwa.

Mr Speaker, avek sa de pti mo mon a remersi ou pou donn mwan sa sans. E mon anvi dir Onorab William, ki son Mosyon i en pti pe larz.

Konmansman mon ti'n en pti pe rode kot mon pou ale.

E a lafen mon'n konpran – mon'n konpran son Mosyon byen. E mon anvi dir avek Onorab William, mon pou siport ou Mosyon. E mon anvi demann tou lezot Manm osi pou donn sipor Onorab William pour son Mosyon. Mersi Mr Speaker.

(APPLAUSE)

MR DEPUTY SPEAKER

Mersi Onorab Loizeau. Ou'n anmenn nou ler ki nou merit pran en *break*.

Nou pou *adjourn* la e nou pou rebran 2er apremidi pou nou kontinyen avek deba lo sa Mosyon. E ABC pou zwenn 1er en kar. Donk, nou ava rezwenn 2er.

(BREAK)

MR DEPUTY SPEAKER

Bonn apremidi tou dimoun *welcome back* e nou kontinyen avek deba lo Mosyon prezante par Manm Elekte, pour distrik Grand Anse Mahe Onorab Waven William, ki mon ava zis pas lo la vitman pour bann ki pa'n sezi ziska la:-

Swivan mank presizyon e gaspiyaz resours dan lenplimantasyon serten proze e donn servis o nivo kominote, Lasanble i demann ek tou

akter kle dan kominote pou kontinyen revwar zot lapros ki pou annan meyer rezilta.

Sa i Mosyon e prosennman lo lalis i Onorab Philip Monthy.

HON PHILIP MONTHY

Mersi Mr Speaker. Mr Speaker nou'n annan sanzman Gouvernman an 2020, kot nou vwar en nouvo Prezidan ganny elekte e in antre *State House* avek son lekip. En nouvo Vis-Prezidan, nouvo *Cabinet of Ministers*, pour fer sa travay ki Lepep Seselwa in konfye zot.

Eleksyon 2020 in osi anmenn sanzman lo nivo Lezislativ, kot nou'n vwar parti LDS sorti 15 Manm Elekte, pour ariv 20.

Avek 5 proporsyonnel e kot Parti US in vwar zot reprezantasyon redwir konsiderableman, sorti 10 Manm Elekte pour ariv 5. Alors Mr Speaker - (6) *ok*. Alors Mr Speaker sanzman in ariv lo nivo Egzekitiv, e lo nivo Lezislativ. Me lo servis piblik in pour lamazorite ka reste parey i ti ete anba ansyen Gouvernman.

Apard detrwa depar e nouvo apwentman lo nivo *senior* serten Minister, departman, oubyen lazans. Servis piblik in reste parey Mr Speaker, akoz Sesel i pour tou son zanfan e lo servis piblik i

pa propriyete okenn parti politik.

Me parey son non i dir ou, servis piblik i sipoze rann servis Lepep Seselwa e pei san pran kont okenn lopinyon, oubyen lapartenans politik.

Sa servis piblik ki pa'n sanze Mr Speaker, ki ankor tel parey i ti ete anba ansyen Gouvernman US, kot plizyer nou Seselwa enkli mwan menm, in travay avek tou nou kouraz pandan plizyer lannen. sa Gouvernman dizour e pep Seselwa ki'n anmenn sa sanzman, i ekspekte ki sa i kontinyen, parey i ti ete anba sa ansyen Gouvernman kot nou tou nou travay, e nou tou nou donn 100 poursan nou kouraz.

Nou konnen ki i annan en kantite nou bann frer ek ser Seselwa, ki pe donn zot tou pour deservi sa pep dan nenport ki responsabilite ki zot annan. Si pei pe bouz dan en bon direksyon, e pe fer progre parey nou kapab temwannyen ek plizyer bann proze ki ti'n zis ganny koz lo la dan lepase e ki pe ganny konkretize la anba sa Gouvernman LDS, sa i temwannyez ki i annan en kantite nou bann frer ek ser Seselwa ki pe desarz zot responsabilite.

Si plizyer mon bann pti proze dan distrik pe ganny realize, si plizyer bann semen

segonder ki ti dan bann move kondisyon, in ganny neglize plizyer lannen, pe ganny resirfas, i montre ki i annan nou frer ek ser Seselwa, ki pe deservi zot responsabilite, *to the fullest* parey nou dir.

Si i annan zofisye serten lazans ki ou *liaise* ek li, deswit i reponn ou parey taler kan mon pe tip sa bout Mr Speaker ou'n nonm non sa dimoun, mon pour re-nonm son non ankor Maria Payet kot PUC, kan ou *call* li, kan ou annan en *issue* pour *take up*, deswit.

E kan mon ti pe ekrir sa fraz, o menm moman ou'n fer referans ek li i en legzanp en dimoun, ki pe fer son louvraz mon pour dir 150poursan son zefor e mon felisit li pour sa.

E i pa le sel. I annan detrwa lezot ankor kot SLTA kot serten lezot lazans, menm si mon pa 100 poursan satisfte ek travay ki LWMA pe fer i annan serten zofisye laba ki fer zot louvraz byen, parey Mirenda mon pour nonm son non, mon fek *liaise* ek li yer, deswit in reponn mwan in *action* lo en keksoz, *ok?* I montre ou ki i annan nou frer ek ser la ater, dan lo servis piblik ki annan lentere Seselwa a ker e pe fer zot travay parey i devret.

Me Mr Speaker, koman Manm Elekte pour mwan distrik e ki an kontak avek mon bann zabitan toulezour,

pour esey trouv solisyon pour zot bann problemm oubyen difikilte, nou pour bezwen admet ki i annan serten nou pov frer e ser Seselwa, ki pa pe desarz zot responsabilite parey zot pe ganny peye pour fer; e ki pe ganny ankouraze par zot bann met politisyen pour fer sa.

Ler Prezidan Larepiblik ki'n ganny elekte lo en slogan "Sesel pour tou son zanfan" e i pe donn sans tou zanfan Sesel pour kontribye dan devlopman zot pei, e i demann avek tou travayer servis piblik pour les zot politik dan lakour e pour pa anmenn dan travay, ki nou vwar?

Nou vwar en group zot, zot ki ankor dan soufrans, e lakoler sa defet dernyen eleksyon, e zot piblikman vin ankouraz zot siporter pour vin fer lekotrer e vin fer politik, dan travay.

E sa politik dan travay Mr Speaker, se pa zis vin koz politik, me i apel fer politik. E fer politik dan travay i vedir oubyen sinonim trenn lipye e fer tou posibil pour sa - pour ki sa pep la deor, ki bezwen en servis i vin fristre, e ankoler. E ler en dimoun i ankoler, sa lakoler byensir, i ganny dirize ver Gouvernman e ver Prezidan Larepiblik.

Mr Speaker, mon kapab prezant plizyer legzanp ki zabitan in donn mwan, kot *file*

in ganny *misplaced* oubyen perdi, kot laplikasyon pour en servis i pran 2 mwan, e si non *MNA* pe entervenir sa zabitan i kontinyelman tourn an ron. E kot menm ler nou *MNA* nou entervenir, nou menm nou ennler nou bit avek en miray.

E menm serten dimoun ler ou koz ek zot, ou santi dan zot lavwa sa lakoler, akoz zot pe koz ek en *MNA LDS*. E san ki mon konn sa dimoun mon'n fini vwar son lopinyon politik i ete. Vwar? E dan bann tel sityasyon, ou demande ki mannyer ou pour bouz devan. *Ok?* E sa miray Mr Speaker, i dan preski tou lenstans bann motiv politik ki par deryer.

Mon kapab donn plizyer legzanp, kot komanter in ganny pase parey enn mon zabitan in dir mwan lot fwa kot zofisye en lazans ti dir li" prezan al dir ou Prezidan dan *meeting* piblik." I annan en kantite travay malis ki pe deroule Mr Speaker e Lepep Seselwa i konnen.

Pa krwar ki ler sa bann mannev malisye pe deroule ki Seselwa i kontinyelman pran lakoler avek Prezidan Larepiblik. Mwan plizyer mon bann zabitan ki pas atraver sa sityasyon, zot konnen ki sa i zis en zes kalkile avek bann lentansyon malsen, zis pour fer zot vir kont Gouvernman e Seselwa i komans vwar zot. E Mr Speaker *enough is enough!*

Parey Onorab William ki loter Mosyon li menm i kontan dir.

Mon pour donn en senp legzanp Mr Speaker; mon anvoy en *mail* en Deputy CEO e mon *call* li zis pour mwan ganny en repons. Mon reanvoy en lot *email*, sa i plis ki trwa semenn pase, e mon pa ankor resevwar okenn kominikasyon sorti kot sa biro, ziska ozordi la ler mon pe koze.

Dan bann tel lenstans ki egziste dan serten biro, ki i pour tande ler aksyon i ganny pran. Ou pour tann, sa sanson viktimizasyon politik vin ganny zwe lo sa gitar en lakord la dan sa Lasanble.

Mr Speaker Onorab Adelaide in dir ki laprosenn fwa, i pour komans nonm sa bann ki pe kale dan zot responsabilite. E mon pour siport li pour sa e mon osi komans nonmen.

Mr Speaker, Sesel i nou pei e Seselwa in fer li en tre bon swa, dan dernyen eleksyon. Pei i lo bon semen. Tou Seselwa i santi lib pour koze e epanouir dan son pei. Avek sa kantite progre ki pei in fer depi 2020, zis mazine si tou travayer Seselwa, ti fer en refleksyon profon lo lafason ki zot pe delivre dan zot responsabilite e alors fer en zefor pour amelyore, kot zot santi zot pa pe donn ase ki zistans sa pei i ti pour ete ozordi la?

Akoz leker en pei se son servis piblik, an vi ki se la kot bezwen mazorite Seselwa i ete. E ler i pa pe ganny sa servis nesese e dan en dele letan ki akseptab, byensir i pour fristre.

Avek sa detrwa mo Mr Speaker, mon pour aport mon sipor pour Mosyon anmennen par Onorab William e mon pour sipliy avek tou Seselwa pour annan, pour annou les pozitivite pran kontrol lo nou fason fer e les sa bann laenn e lanmertim politik deryer nou. Mersi Mr Speaker.

MR DEPUTY SPEAKER

Mersi Onorab Monthy. Prosen enterven an lo mon lalis i Onorab Johan Loze.

HON JOHAN LOZE

Mersi Mr Speaker. Bonn apremidi Mr Speaker, bonn apremidi tou dimoun a lekout. Mr Speaker, *just a quick aside* avan mon komanse. Batiman *National Cultural Center* mon pa'n tro swiv demars mwan. Eski nou'n sanz son non letan in ganny investir le 29? Akoz mon pe santi Lasanble nou annan en responsabilite, nou pe apel li *National Library* nou.

MR DEPUTY SPEAKER

Mon. Mon irite parey ou lo sa size. Akoz ler sa *building* ti ouver, mon rapel mon ti en *journalis and the official name*

is supposed to be the National Cultural Center. Mon pa konnen akoz zot pe – be mon'n fer letour sa building mon pa war en – kot ti ekrir National Cultural Center ...

HON JOHAN LOZE

Devan la...

MR DEPUTY SPEAKER

...zot in sanze zot in met sa, non sa antite la ki konplike mon pa konnen mannyer mon poudir *National Culture Heritage* tousala avek.

HON JOHAN LOZE

Non-*anyway* so mon pe mazinen ki petet *we should get it right as the Assembly....*

MR DEPUTY SPEAKER

Wi. Sertennman.

HON JOHAN LOZE

National Cultural Center ki'n ganny *renovated* in ganny ouver le 29 Zen. So sete sa ki mon ti pe mazinen.

Mr Speaker, mon le komans avek en sitasyon. "Annou pa rod solisyon ki sipoze donner yer pour nou fer li demen". Onorab Naddy Zialor.

Mr Speaker, mon komans avek sa sitasyon, akoz mon anv'i fer enn pti *segue* dan en pti dikton ase popiler ki Seselwa i kontan servi. Mon nasyon Seselwa i kontan dir

ou, annou pa koz zafer deryer zafer. Annou pa koz zafer deryer zafer Mr Speaker.

Ozordi nou pe ganny enformen ki zot annan drwa koze, zot pour koze, zot annan drwa dir zot Gouvernman sa ki i bezwen ganny dir e zot pour dir li. E mon santi zot brav ki zot pe fer sa. Mon kontan ki zot in trouv sa kouraz pour zot nobou fer sa. Be i annan zis nou la anndan, nou pe koz antre nou dan en *silo*, e zot pa pe koz ek zot Gouvernman zot.

Se sa ki mon pe dir sa bout koz zafer deryer zafer. Ofet, i fer 2an edmi nou la, nou'n fer nou de Bidze, nou'n fer repons de SONA, plizyer PNQ e bokou kestyon. *Now* de Bidze in pase, zot pa'n dir Minis nanryen zot.

Bidze lafason ki i deroule se ki *very good* Minister *best budget ever*. Sa Bidze i ti sitan bon, ti sitan byen, ti'n byen bennyen! Ti'n byen piz li - ni en lever ti napa lo la! Telman ti'n pize. Be vwala. Vwala kot nou'n arive ozordi! *Halfway into the year*, Bidze in sal, pa ankor bennyen, mon krwar in ganny en ta parazit la, ziske mantoun dan lipye i annan.

Akoz la lafason ki zot pe koze, zot bliye poudir Bidze ti'n byen bennyen, ti'n byen piz li, ti prop! E ozordi tou problem zot ki annan! Be dan sa demars Bidze, akoz zot ti kit nou, nou tousel? Nou sipoze

Lasanble Nasyonal Sesel, *regardless* ki kote latab ki nou lo la, ki nou ideoloji? Ki nou filozofi? Kwa ki nou siporte?

Nou ti annan en legzersis depouy Bidze. Be akoz zot ti kit nou, nou tousel? Akoz zot ti les nou fer *the heavy lifting, do the hard work*, ganny dir pa kestyonn trezyenm mwan saler, konbyen fwa nou ti ganny dir pa kestyonn trezyenm mwan saler?

Nou ti ganny abandonnen dan sa demars zis pour zot ozordi vini, zot dir nou zot kapab koze e zot pour koze e zot poudir zot Gouvernman sa ki zot annan poudir li e zot Gouvernman i *markedly absent*.

E ler zot Gouvernman i la, zot pa dir nanryen! Zot les nou, anmenn sa bann lager nou tousel. Mon bann Onorab koleg mon *sorry* si mon pe ofans zot, mon *sorry* si mon pe dir zot sa bann keksoz dan sa fason. Mon konnen zot pa pe pran li an mal, mon pa pe dir zot an mal, mon pe koz ek zot byen kalm selman mon demann en leskiz.

E mon pour demann en leskiz osi Onorab Sandy Arissol de la par Onorab Sathya Naidu, e Onorab Sandy Arissol nou konnen in fer semen, be Onorab Naidu fer rigol mon zanmi!

Bon, Mr Speaker mon krwar i enportan pour ler kestyon i vin devan Lasanble Minis i la, annou nou tou partisipe. Annou nou tou met presyon lo Gouvernman, annou *hold government accountable*, parey i nou rol e nou fonksyon ki Konstitisyon i donn nou.

Annou nou tou fer sa linite ki zot koz lo la e nou ava ganny tou sa bann keksoz ki zot, zot pe demande ozordi. Ler ASP i vin dan Lasanble i dir i annan zis 110 dimoun, ki ankor pe ganny *welfare* dan Sesel dan 90mil dimoun, zot tou zot asiz trankil zot les Loze ganny met deor li tousel akoz Loze pe dir ASP in dir i annan 110, Speaker pe dir non i annan 4000.

Be si zot ti'n donn mwan en koudmen *back then* konmsi. Si zot ti'n donn mwan en koudmen poudir, be ekoute i mal! I pa kapab annan zis 110 sepa 115 dimoun ki *deserving* pour ganny lasistans sosyal dan en pei 80ekek mil dimoun? I pa korek! I pa byen!

Si zot ti'n lev en lavwa zot osi, ozordi nou pa ti pou trouv nou dan en sityasyon, kot nou'n ganny dir en pli meyer konsiltasyon, konsernan sa ki pe vin devan kot *Welfare*.

E se sa ki nou'n ganny dir ozordi. E Onorab i napa tor

dan sa ki in dir. Wi, nou bezwen en pli meyer konsiltasyon dan sa ki'n vin devan kot *Welfare*. *Welfare* pa kapab kontinyen ganny *run* parey sa bann diktatir ki zot pe dir i annan, bann pti lanpir bann isi laba.

Eski mon pe fer sans mon pe *resonate* avek zot la? Akoz mon pe dir menm keksoz ki zot pe dir mwan osi. Selman la ozordi zot pe dir sa la trankil dan en *silo* zis ant nou, mwan ler mon dir mon ganny met deor oubyen mon sey dir li devan bann zofisye konsernen ki la.

Be zot ti a donn en koudmen. Ozordi zot pa ti avavwar zot dan sa petren ki zot ladan ozordi. E wi, mon santi zot dan en petren, zot in menm anmenn en Mosyon enportan pour *deal* ek sa bann size, ki zot, zot pe konstern zot. Be menm si size pe konstern zot Mr Speaker, asize la bomaten *at some point* nou ti napa *quorum*.

Yer nou pa ti 5 Manm nou! Mosyon i sitan enportan ki avek zot *super majority*, zot pa'n kapab gard *quorum* pandan lazournen antye dan Lasanble. Zot vwar, vwala lenportans ki zot in donn sa Mosyon.

Be Mr Speaker, nou trouv nou dan en sityasyon kot *LDS* avek son L'Egzekitiv, ek son *super majority* dan

Lasanble zot pa kapab *hold* zot L'Egzekitiv, *accountable!* Zot pa kapab. E sa i pa en *failure* sa ki dan sivil servis sa. Si sa ki dan *civil service* ti ganny met presyon lo la, *civil service* ti a marse. *At least* i ti a mars pli byen ki i pe marse la. Be i pa ganny met presyon lo la. Ler presyon i sey ganny mete nou dir in byen benyen, in byen pize napa pli bon ki sa.

Be si nou tou nou ti fer nou louvraz, nou zwe nou rol, nou ti met presyon, nou pa ti pour bezwen annan sa Mosyon ozordi.

Mr Speaker, ozordi nou ganny dir ki Gouvernman apre 2an edmi i bezwen revwar sa *unit SIA*. Mon pa pour konnen, me imedyatman apre sa i annan de lot Manm i vini i felisit *SIA*. E mwan mon zis not sa, akoz nou ti pe swiv zot pour ganny gidans lo sa Mosyon.

Parey Onorab Norbert Loizeau in les nou konnen, lo komansman i pa ti konnen kot zot pe ale ek sa Mosyon. Si Onorab Loizeau ki asiz dan zot *Caucus* in nobou fer sa prononsyasyon, zis mazine kot nou, nou ete, nou pe ekout zot e nou pe swiv zot pour nou ganny gidans lo kwa ki zot vremen an vi vremen serse atraver sa Mosyon.

Be enn i vini i dir revwar *SIA*, e trwa lezot i vini i felisit *SIA*. Onorab Naidu loter

Mosyon ti dir fodre revwar sa *unit* ki apel SIA. Me imedyatman apre li Onorab Labonte i vini i felisit sa *unit*, ki apel SIA - *Seychelles Infrastructure Agency*.

So, Mr Speaker, zot menm zot, zot in trenn en serten nivo konfizyon, en serten nivo *all over the place*, avek zot Mosyon par lafason ki Manm in adres Mosyon. E mon kapab asize *nitpick* tou bann pti bout kot zot in asize zot in kontradwir kanmarad, me selman sa i pour enn pti pe *petty*, so nou pa pour al ladan.

En lot morso ki mon anvi *pick up* Mr Speaker, ozordi Lopozisyon in ganny demande pour siporter. Koste, siporte e sa in ganny met atraver koman nou travay aköz Onorab ki'n dir sa in swiv sa avek bann lezot travayer pe ganny demande pour travay Lopozisyon osi konmsi nou bezwen travay siporte.

So Lopozisyon, i ganny demande pour siporte! Mon krwar sa la, i reflekte en pe zot leta lespri enn pti pe. Ou konnen, nou bezwen annan *diversion views* ek *opposing viewpoint* dan en pei - mon konnen ti *upset* Onorab Georges dernyen fwa ki mon ti dir "pwen gal nou pwen gal banbou, nou pik dan delo, nou pous sa kartye maron ki apel Sesel an avan", apre li i vin rod

mwan se pa li i annan *superyacht*.

Be pour nou siport sa demars pous sa pti kartye maron ki apel Sesel de lavan, nou bezwen annan bann *viewpoints* ki *oppose* bann *views* ki pe ganny *held* par parti mazoriter. E mwan mon krwar nou, nou sey fer li e nou fer li ase byen kot nou met - nou avans nou bann pwen devan, nou diskite, e dan plizyer lenstans, nou *oppose* bann propo ki zot, zot anmenn devan.

Be kot i neserer mon'n toultan dir zot nou pour koste zepol ansanm kot sa ki byen pour pei nou pour siport zot, sirtou dan bann Lezislasyon. La konmela Lezislasyon i yar! I parey dizef zwazo, ou a krwar Lalwa pa'n ponn Lasanble, napa Lalwa pour pase. Mr Savy petet i bezwen get, larg en pe Lalwa laba lo zil, nou ava ganny Lalwa pour nou travay lo la.

Be sirtou kot bann kote Lezislasyon ler i annan bann Lalwa ki enportan pour pei nou siport zot, nou toultan siporte. Solman mwan i annan bann bout ki mon dir zot konmela mon mefyan, mon pa pe antre dan sa bann demars, avek zot ankor aköz mon pa fye zot.

Be, nou pa pour kapab dir Lopozisyon pa opoze vin siporte. Ou konnen mon pa

konnen si Onorab ki'n dir sa i pa'n realize, i pe propoz la diktatir la, i pe propoz *one party state* la. E mon krwar petet pa en bon nide pour nou al dan sa direksyon. So, sa osi nou a kit lanmenm, nou pa pour fer gran, gran zafer lo la.

Sa ki mon'n konstate selman, se ki koman en *Caucus*, zot santi ki zot annan bokou problem, zot annan bokou defayans e zot pe eksperyans bokou difikilte. Mon krwar finalman zot in realize poudir sa sez *MNA* pa donn lasoup dal, e gouvrenans e zesyon pei pa donn lasoup dal, non pli! Zot in vin la pour travay e zot bezwen travay.

Be selman i enteresan sa ki zot pe fer. Zot pe servi zot sez, zot pe *pupute* ki zot annan pour koze, pour zot kree distraksyon. Mosyon ti la depi avan miting piblik be ozordi sa ki mon vwar se ki Mosyon pe ganny servi pour kree distraksyon swivan sa masiv fristrasyon ki'n monte dan *meeting* piblik!

Konmsi Prezidan, "masiv"! "Masiv fristrasyon"! E mon konpran zot aköz zot in vwar santiman sa pep Seselwa, *raw!* E mon krwar petet zot in, zot in soke me si zot ti'n ekout nou *all along*, zot ti a konpran! Zot ti a konnen poudir i annan sa la deor, zot pa ti pe ekoute.

Akoz zot i annan apepre zis en 9 mwan ki zot in retourn lo teren zot. Zot ti per teren! Zot ti'n sove lo teren zot! Sepa si pa 9 mwan menm, sepa si pa 6-7mwan depi ki zot in komans retourn lo teren zot.

Be pandan tou sa letan, zot pa'n vreman nobou - konstat santiman dimoun, ler zot ti pe dir nou dimoun pa lafen, napa isi, napa laba dan pei e la prezan zot in ganny li antye. E ler zot in ganny santiman dimoun olye asize, depouye fer analize e travay lo la pour zot ganny en solisyon, zot kree distraksyon!

E zot distraksyon i senp zot, i pa konplike en! Pour en bann dimoun ki aköz zot prosen, ki i annan en gitar en lakord, petet se sanmenm lenstriman ki zot pe zwe aköz i en *mélodie* senp ki zot pe zwe zot.

I annan sabotaz dan Gouvrenman, e zot realize poudir Seselwa i ganny akize konmkwa ki annan bann met politik ozordi en. Onorab ki'n koz avan mwan in dir bann *civil servants* pe ekout zot bann met politik.

Onorab Seselwa pa lisyen. Seselwa napa met. Mwan mon en politisyen, *franchement* mon pa met personn e mon pa pour zanmen vin met personn mwan. Siporter parti politik i pa propriyete e mon pa

ekspekte ki zot, zot me zot bann siporter *either*.

So, annou dir sa ti *slip of the tongue*. Be selman lefe i reste ki zot pe sey kree distraksyon, zot pe sey met dan lespri dimoun, ki tou bann *failures* zot Gouvernman la pe ariv aköz sabotaz.

Akoz i annan bann met politik, aköz i annan bann enstigator aköz i annan dimoun ki pe dir dimoun desann dan biro, al fer politik.

Be zot ler zot ti debout ICCS zot ti dir koumsa, “demen letan ou al dan ou landrwa travay dir ki ou en, aktivis! Dir ki ou en, aktivis!” Be pa zot ti dir dimoun dir i en aktivis dan landrwa travay zot. Anr! Zot ti *ok*. Zot i *ok*, ler zot dir dimoun desann zot landrwa travay al fer politik, al dir ou aktivis LDS. Anr *ok*, mon konpran, mon konpran pour en pwa, mon napa en nide koman konbyen mezir zot kapab annan.

Be selman les li, sa i zot distraksyon ki zot, zot pe sey kree, zot in rod enn pti papye klate zot pe sey sekwe dan lize dimoun pour dir gete get sa papye klate la ki nou pe montre ou, bliy tou ou problem ki ou annan, ou problem i aköz i annan sabotaz.

Tou sa dimoun ki'n debout dan *meeting* piblik in dir, “Msye Prezidan mon

mon'n *call* Minis entel i pa reponn, mon'n ekrir Minis entel i pa reponn, i annan 2an mon annan mon problem. Ler dimoun i dir i annan 2an. Depi kan sa? Konbyen lannen sa? Tou dimoun ki koze. Depi kan? Anr depi avan! Gouvernman avan! Be tou sa dimoun ki'n dir zot 2an zot pa'n tande?

Tou sa dimoun ki dir in *call* Minis, Minis pa reponn, zot pa tande? In lev Minis, Minis pa reponn. Dimoun i vin ek gro dosye devan zot, be zot pa pour kapab zis *distract problems away*. Zot bezwen asize travay e sers vre solisyon pour dimoun.

Nou pa pour kapab kontinyen koz mansonz e *hope* ki sa bann mansonz ki nou koze, kontinyen e repete i vin realite, i pa pour vini realite! I pa pour vini realite, aköz ou annan en Lopoziyon ki pour opoze e i pa pour vini pour siporte!

E tan ki nou pour opoze, nou pour toultan donn *view* dimoun, ki dimoun pour konpran poudir “ou vwar sa zans la, zot pa pe fer sa ki zot devret fer”.

Mr Speaker, i annan en size ki'n ganny entrodwir taler se bann profesyonnel dan finans ki'n koze devan Lasanble Nasyonal yer. Profesyonnel wi in koze, profesyonnel i koze, i koze

byen zot koz laverite. I annan en profesyonnèl in dir nou koumsa poudir kont Gouvernman i vid, ziska ler Gouvernman i anmas reveni e i met dan son kont pour li servi.

So, kont Gouvernman i natirelman vid, reveni i ganny anmase, i met ladan e Gouvernman i servi. So, si an 2020 ti napa aktivite ekonomik, ti napa reveni ki ti pe ganny anmase, i normal *then* pour kont *dwindle* e reste zis 14milyon ladan, akòz ti napa reveni, *from what* profesyonnèl finans in dir yer, ti napa reveni!

Me prezan si sa bann menm profesyonnèl Finans ti'n fini fer provizyon pour aprovizyonn kont Gouvernman sa kont "007" *James Bond 1401* ki zot pe dir la - be si depi Avril 2020 provizyon ti'n ganny fer atraver *Amended Budget*; si depi Avril sa bann profesyonnèl Finans ki zot pe dir ti'n fini met dan Bidze amande ki Labank Santral pour *provide* R500milyon *under force majeure conditions at zero percent interest*. Pa fer premye fwa mon dir sa dan Lasanble, mon poudir e mon pour repete.

Be si tousala ti'n fini ganny fer ki manner Minis Hassan ti pe mank sonmey? *Ok a better question*. Ki

manner ti napa larzan pour pey saler travayer? Sey eksplik mwan! Akòz se sa ki nou, nou ti ganny dir. Kof i vid, i reste zis 14milyon, Minis Hassan pa kapab dormi, napa larzan pour pey saler travayer, napa!

Selman provizyon ti'n fini fer, depi Avril, e zot in servis sanmenm sa provizyon ki bann profesyonnèl finans ti'n fer depi Avril 2020 dan *Amended Budget*, pour rezourd zot sityasyon kof vid pour pey saler travayer.

Ou konnen i zis konmsi zot in pran nou solisyon ki nou ti'n kit la apre zot maltret nou, maltret nou pour en solisyon ki nou ti'n kit ek zot ler zot in antre. Fermal sa en! Speaker i annan en - Mr Speaker i annan en parol ou'n servi taler, mon konnen ou kontan servi sa parol. "Be sa bann move dimoun ki fer sa", Mr Speaker, si ou permet mwan, si ou permet mwan pour sit, pour sit ou.

En lenspirasyon Mr Speaker, en lenspirasyon *but I'm quoting the source*. "Be sa bann move dimoun ki fer sa", konmsi antre nou la anndan nou byen ek kanmarad, annou pa fer sa!

E prezan yer pov Onorab Uranie i poz en keston i demande i dir be si ti annan R320milyon dan *Suspense Account* akòz ou dir nou kof ti vid? Konnen Minis i reponn

Onorab Uranie, lo rezerv dan Labank Santral! E personn pa dir nanryen.

Kestyon Onorab Uranie pa'n ganny reponn li, in ganny reponn lo rezerv dan Labank Santral. Be *now* akoz zot pa ti dir nanryen? Akoz enn zot pa lev lanmen poudir Minis *look ou* pa'n adres size!

Akoz personn pa dir en keksoz zot Gouvernman letan i *blatantly mislead* Lasanble e Lepep Seselwa? Be si zot ti'n fer *all along*, 2an edmi si zot ti'n fer nou pa ti pour la ozordi Mr Speaker.

Pa fer premye fwa ki zot anmenn Mosyon pour sey sipliy zot Gouvernman akoz zot pa kapab koz direk avek zot Gouvernman. Me i pa fer premye fwa ki zot vin la anndan pour sey avans size, akoz zot Gouvernman i refize ekout zot.

Konbyen Manm lo zot kote ki sey entersed avek ASP pour ganny lasistans pou zabitan dan distrik e ASP i anvoy zot nyak! Be nou siporter ki fer sa. Be zot *call CEO* zot, zot *call CEO* ki enn zot siporter ki i dir zot? Mon konnen zot fer li, mon lenformasyon i bon mwan.

ASP i anvoy zot vire. Be oule dir mwan, *US* ki pe sabotaz kot ASP? *US* ki pe al fer ASP anvoy *Caucus LDS* vire letan zot vin devan avek en demann *genuine* pour zot

zabitan dan distrik? I annan met politik la ki pe fer keksoz? Ouswa se sa dimoun ki zot, zot in apwente zot in met laba zot in dir li fer sa, e prezan i fer e i vire i mord zot menm.

Mon konnen i fermal - la i fer mwan mazin sa parol ki msye Denis ti dir zot dan *meeting Roche Caiman*, mon konnen i fermal.

Mr Speaker, zot vin la anndan, zot montre ledwa lo nou, pour problenm ki zot Gouvernman i annan. Zot vin la anndan zot montre ledwa lo nou pour bann mansonz ki zot Gouvernman pe koze. E mansonz i komans depi anler e i reste anler menm, e zot vini zot dir nou poudir bann siporter *US*.

E la sa gro mansonz kof vid, siporter *US* ki ti dir sa? Napa larzan pour pey saler, travayer siporter *US* ki ti dir sa? Ti komans ek kof vid la in vin kont *007 James Bond 1401* sepa ki 00 kwa, be i siporter *US* ki ti dir sa? A *blatant lie*?

E sa zafer la i pour bezwen reganny vizite e reganny adrese sa en? Akoz sa mansonz la ti en *set up* sa. Ti en *set up* pour kree *a sense of urgency*, ki'n fer nou pran tou sa bann pikir ki pa ti ankor ganny aprouve, ki'n fer ouver pei avan ki zot menm zot, zot ti dir, pour esper Sesel ganny *herd immunity* avan, ouver pei

e zot ti ouver avan i ganny *herd immunity*. Se sa mansonz sa!

Pour annan en *accounting* pour sa en? Akoz sa move dimoun ki fer sa, bon dimoun pa fer sa kalite keksoz.

Mr Speaker, mwan, mon swet Onorab bonn sans avek son Mosyon. Mon ti a swete kapab ed li avek son Mosyon. Mon ti a swete kapab solider avek li e port li en led e en soutyen, akoz mon konnen i dan mal. Mon konnen i dan mal, be en kantite sa bann keksoz ki zot pe sey adrese ozordi atraver sa Mosyon i bann size ki nou, nou'n anmennen dan lepase.

Nou'n met presyon, nou'n kestyonnen nou'n diskite dan Bidze, nou'n releve dan SONA. E zot pa'n zanmen pare pour donn okenn sipor e soutyen sa pep Seselwa, atraver met serten presyon isi dan sa Lasanble.

Zot in toultan pare pour kares Minis, *chouchoute* Minis, kares zot Gouvernman. Se sa ki zot in fer. Be zot ekspekte nou, ozordi vini ed zot avek en problem ki zot Gouvernman pe gannyen e ki zot, zot pe gannyen avek zot Gouvernman, a la menm enstan zot pour sey vire e blanm nou.

Blanm Gouvernman oparavan; kasyet problem ki zot Gouvernman pe fer e

eksperyanse pas atraver gannyen ozordi anba Gouvernman avan e zot bezwen nou pour siport zot fer sa. An term Kreol Seselwa i dir ou pour li fer en keksoz koumsa fodre i napa nennen. Nou pa pour fer! Mwan personnelman mon pa pour fer.

Zot pour bezwen *from now on*, komans kapab debout, fer sa ki zot in dir ozordi zot fer, koz avek zot Gouvernman, met presyon lo zot Gouvernman, kestyonn zot Gouvernman.

Ler Minis i vini i asiz la devan nou, i dir nou *crime is getting worse!* Ou pa vini en semenn, de semenn pli tar poudir Komisyoner Lapolis ti dir in *improve*. Ou pa fer sa! Ler Minis pe dir *it's getting worse* la, met e presyon lo li, met presyon lo Minis la anndan ler i la, pa asiz trankil, pa lev lanmen personn.

Travay! Parey zot in dir nou siporte, i nou travay la. Travay. Fer louvraz Parlmanter *hold government accountable*, mon pa dir zot *oppose* zot Gouvernman mwan, *but hold government accountable*.

MR DEPUTY SPEAKER

Onorab Loze?

HON JOHAN LOZE

Yes, Mr Speaker.

MR DEPUTY SPEAKER

Annakor avek *Order 57(9)*, ki dir, “*A member shall be entitled to speak for not more than 30 minutes*”. Mon pa pour kapab permit ou kontinyen aköz ou'n koz 30minit, ou ti komans 2er 13, la i 2er 43. Si mon matematik i byen i fer 30 minit. *So to be fair.*

HON JOHAN LOZE

Mersi. Mersi Mr Speaker. Mon pour remersi ou pour ou lendilzans e pasyans ki ou'n montre lo mon size. E mon ava *wish* tou bann Manm, bonn deliberasyon pour larestan apremidi. Mersi Mr Speaker.

MR DEPUTY SPEAKER

Mersi Onorab. Prosen Manm ki lo lalis, i Onorab Michel Roucou.

HON MICHEL ROUCOU

Mersi Mr Speaker. Bonn apremidi *a tous*. Mr Speaker, Mosyon anmennen par Onorab William, i tre kler, aköz nou pa kapab esper Angle demen desann Sesel pour vin dir nou, kan nou poudir avek nou bann koleg - mon pour apel li - nou bann koleg, aköz i bann dimoun ki travay dan nou Minister, ki travay ansanm dan nou, travay dan bann Minister, ki travay ansanm avek nou dan nou distrik.

E nou, nou la koman en *partner* avek zot, koman bann dirizan dan nou distrik pour nou gete ki mannyer, nou kapab ed zot; ed zot pour zot petet fer enn pti pe pli byen, kot nou vwar poudir petet i annan sa defayans.

E osi kot i annan serten dezapwentman, petet parmi nou zabitan li menm li, an term parey bokou Manm in dir kot serten fristrasyon i vini e nou, nou la koman bann Manm, ki'n ganny elekte swa proporsyonnel pour nou kapab travay avek nou bann *partner*.

Mr Speaker, nou Mosyon nou pa la pour nou ofans person nou. Nou Mosyon se ki i vremen kler aköz nou ki la dan distrik, apre sa 2an pour ariv lo 3an ki nou'n la kot nou travay avek plizyer *partner* aköz i annan bokou nou ki nou'n nouvo koman *MNA*. E nou pa kapab zis vini, dan plas aprann serten travay avek bann ki la, konn serten keksoz ki mannyer bann keksoz i marse, zis nou vini nou vini nou kritike.

Nou bezwen travay ek bann dimoun ki'n la e aprann avek zot osi e osi ed zot, pour zot amelyor lo serten fason ki demen sa i ava vin en benefis pour pei e osi pour nou menm.

Mr Speaker, ler nou pe koz lo sa Mosyon, i vre i annan bokou landrwa kot i merite

annan serten *improvement*, e nou bezwen aprann par le pase li menm li, kot nou vwar kot apre sa i kout pei bokou larzan.

Zis en legzanp, ozordi ler nou get bokou nou bann *housing estate*, i annan sitan bokou problem, i bann *housing estate* ki date pour sitan bokou letan, e lafason petet ki in ganny *build* li menm li, e ozordi lamazorite *housing estate* i annan problem *sewage*.

E nou tou la anndan koman en Manm Elekte, nou konnen ki problem lo bann *housing estate regarding sewage*. E ozordi mon kapab *proudly say*, se ki mon vwar poudir *PMC*, in annan bokou amelyorasyon. Akoz mwan menm mon dan enn mon *housing estate* ozordi, kot ti annan sa gro lavalas lo kote *sewage*, li menm li akoz ou ti vwar apre ki sistenm i fel, e ozordi ou vwar amelyorasyon.

E sanmenm sa ki ou apel ou kapab dir nou'n aprann. E si nou, nou pa ozordi nou vini, koz lo la lekel ki pour fer li pour nou?

E ler mon pe koz lo kote *PMC*, ozordi i annan nouvo Lazans *SIA* ki mon vremen remersye zot Mr Speaker. Akoz mwan souvandfwa mon kominik avek zot akoz ozordi konmela zot ki antreprann laplipar proze pour

Gouvernman, proze dan distrik pour *build* bann *housing estate* mon vremen apresye, mon pour dir zot en gro mersi.

Mon kapab mazin Ms Elsia Vidot ki nou kominik vremen pre, Mr Keith Arnephy, zot *CEO* Jitesh, ki sak fwa ou kominik avek zot, zot pare pour donn en gidans, pour zot eksplik ou tel keksoz ki mannyer pe ale, lo kote ki direksyon bann proze i ete Mr Speaker.

E selman mon mazine avek sa nouvo lekip zenn la, ek sa nouvo fason fer, dan sa transformasyon, kot la nou pour vwar Mr Speaker, ki pour annan bokou amelyorasyon lo bann nouvo *housing estate*, kot nou menm vwar ek bann *housing estate* ki pe ganny fer e menm konmela zot pe enstal bann *STP*, kot pour ede pour *deal* avek bann problem *sewage* li menm li.

E osi i annan bokou propozisyon ankor ki mwan mon'n kapab *attend* serten diskisyon kot menm i annan sa zafer *water tank* dan plafon. I annan bokou nouvo fason fer, mon'n vwar bann letan ki mon'n kot *PMC*, kot en letan zot ti menm pe sey enstal dan plas met *plywood* dan plafon, met li en plato beton ki demen si i annan sa *overflow*, petet i pa *overflow* dan lakaz sa dimoun.

E ozordi nou pe, nou tann zot pe komans lo nouvo fason fer se ki petet sey met bann *water tank*, dan plas met dan plafon petet met li deor.

Be selman ankor la, nou bezwen mazine se ki zabitan i bezwen pran son responsabilite, ki zanfan li menm li zot pa ava *tamper* ek sa *water tank*. Osi Mr Speaker mon pour koz enn pti pe petet lo NSC, mon travay tre pre avek NSC, mwan osi akoz mon annan en ta lenfrastruktir sport.

Be mon vwar poudir i annan sa retar. I annan sa retar kot i anmenn serten dekourazman, dezapwentman, kot souvandfwa nou vwar nou, nou bezwen pe pran kontak avek zot, zis parey en legzanp, tou dimoun ler pour pase kot Laplenn Kolez, zot pour vwar poudir i annan en bout laplenn ki byento NSC pour bezwen pran en diskisyon ki zot pour fer avek.

Akoz i annan en problem kot drenaz ki la, tou sa delo i tant pour *overflow* dan laplenn e aprezan bann vezetasyon ki la i tant pour *overgrown*, kot menm ennler ler ou pase pres pour ou pa vwar poto goal.

E la i annan en desizyon pour pran kot *court basketball* li menm li, i bann landrwa - bann size kot ou kapab dir kot bann zenn i frekant plis. E

nou, nou bezwen nou koman bann *Leaders* ki la, ki frekant nou bann zabitan, bann zenn ki servi sa bann fasilite, nou ki bezwen al anmenn zot soutyen kot sa bann departman li menm li e nou, nou pe travay avek NSC.

E menm Mr Speaker dan bann zour ki vini la, nou annan en biznes prive ki pare pour li vin get nou *court basketball* avek nou, pour gete ki mannyer nou kapab revwar enn pti pe son *sitting area*, petet donn li en *proper sitting facilities*. e tousala i ava ede, ed nou Gouvernman pour nou kapab bouz de lavan.

Mr Speaker, ler mon pe koz lo bann proze dan mon distrik, mon distrik in benefisy e avek bokou proze, ozordi kot laplipar dimoun pou monte pour vwar - zis dan semen Mont Fleuri ou pour vwar lagrandisman semen kot pour annan en nouvo *lane*.

Ki sa pour ed mouvman trafik dan distrik, atraver SLTA ki mon vremen apresye zot travay zot osi, ki zot pe fer dan mon distrik kot ler ou tap zot laport, espesyalman Mr Cliff Telemaque, ki ler ou tap son laport zot pare pour donn ou sa servis.

Nou konnen poudir i annan bokou lezot distrik ankor ki bezwen, me selman ler nou, nou apres-e zot pare pour zot donn nou sa sipor.

E osi ler nou ti apros zot apre ki nou ti pe fer avek en *businessman* ankor, ki nou ti pe gete ki mannyer nou pour agrandi enn pti pe sa fasilite *parking* anler Rochon. Zot ti pare pour zot *partner* ansanm avek nou, ansanm avek en *private* biznes dan nou distrik pour nou kapab soulaz enn pti pe bann zabitan ki laba anler.

Be selman Mr Speaker, lo la, mon mazine dan sa Mosyon anmennen par Onorab William, i annan en pli gran lanons ankor ki nou pe fer. Se ki zabitan li menm li nou bezwen *take ownership*, nou bezwen *take ownership* nou distrik, annou pa zis depan lo Gouvernman pour li vini, pour gete ki mannyer pour fer.

Mon apresye ki ennlèr mon vwar Mr Carl Fanny desann kot mwan i dir mwan, "MNA mon'n pas tel landrwa mon'n vwar tel keksoz la mon krwar mon devret amelyore." Zabitan i bezwen pli angaze! I devret pli angaze dan devlopman nou distrik, annou pa zis asize konplent, annou vin devan pour nou gete ki mannyer nou kapab *take ownership* dan distrik.

Me zis parey lot fwa mon'n tann Mr Pierre kot ki responsab tim futbol *Foresters*, in fer en lannos lo radyo mon ti ekout byen, kot i ti pe demande pour Lotorite

Distrik anvoy en lanmen pour zwenn zot.

Be Mr Speaker, depi lontan Lotorite Distrik pe anvoy lanmen, pe kriy tou tim spor pe dir zot vini. Akoz demen ler *MNA* pour fer *mass* spor zot pour debout zot poudir politik. Nou pe dir tou bann tim spor vini, zwenn avek Lotorite Distrik. Nou a tir bann zenn dan bann move frekantasyon, vini nou'n dir nou.

Nou'n menm rod en dimoun pour met la pour ed zot pour anrezistre zot tim. Tou bann tim sport, me nou vwar poudir sakenn i dan son pti kwen. Me selman la ankor en lanons petet ki lo par Lotorite Distrik mon devret anvoy-e, mon dir bann tim spor vini, annou zwenn ansanm nou ava - nou annan en ta fasilite spor nou. Nou ava anmenn sa vibrasyon dan nou distrik, nou annan en *mass* spor ki pour vini byento.

Lot fwa nou ti vwar poudir Bel Air ti fer kot nou ti anvoy en tim laba, bann zenn manrmay pour al partisipe. E nou osi Mont Fleuri nou pour fer enn byento kot nou demann tou tim spor pour zot vini. Nou bezwen *take ownership* nou distrik bann la. Akoz sansan nou pour vwar, toultan nou pour vwar sakenn dan son pti kwen, pe konplent.

E Mr Speaker, osi mon'n kapab vwar parey mon'n dir lo komansman - mon'n kapab vwar bokou proze ki'n ganny materyalize, i annan ki *actually*, i lo semen pour komanse demen. Nou pour vwar kontrakter pe vin siny Lagreman pour *extend* semen kot Oreddy ki desann kot Tracy Moustache laba, ki sa pour benefisye bokou bann zabitan.

Akoz mwan osi plizyer fwa ler mon al vizit mon desann ek mon transpor, mon vwar poudir i annan sa problemn akoz ki mannyer semen i ete.

E osi pour annan en diskisyon, ansanm ek bann zabitan laba dan sa *zone*, pour zot konn enn pti pe lo kote sa proze, pour zot partisipe pour zot zwenn sa kontrakter ki pour fer sa proze.

E la nou pour envit zot pour zot vini zot osi, pour zot kapab donn en pe zot *input*, pour zot konnen kote ki semen pour bezwen frenmen akoz i pour annan en bout pon ki pour bezwen definitivman ganny kase pour refer e la nou pour envit zot.

E ler mon'n koz avek Mr Keith Arnephy Mr Speaker, in fer mwan ganny en konpran poudir vre, *SIA* i annan serten petet problemn ki zot pe sey adrese zot menm zot, lo kote *manpower* i enn. *manpower* i

enn Mr Speaker, akoz zot pe sey zot mye akoz parey zot konnen poudir dan lepase nou annan bokou lenfrastruktir ki'n ganny neglize.

Lopital i enn, batiman ki Onorab Loze in koz lo la, ki nou, nou apel li *National Library*, i en lot ki nou fek vwar son reouvertir. E nou bann stad, Stad popiler Mr Speaker, Stad Linite, kot zot dan en move leta, ki la Gouvernman pe al investir en ta ladan. E i annan ki deza komanse pour kapab fer serten renovasyon konplet lo la.

E osi Mr Speaker, dan bann proze kwa ki enn ler ki souvandfwa i fer ganny en pe retar, lo kote i annan sa mankman *surveyor*, akoz bokou proze konmela, ou bezwen pas atraver proze la mon vremen apresye ki nou annan sa semen Dan Gale ki byento pour komanse. Mon le dir mersi msye lafanmir Theresine, Mr Alen Jean ki son madanm Cindy, ki zot in kapab donn nou permisyon *wayleave* pour nou kapab demare avek sa proze.

E si nou ganny bann *surveyor* -petet la osi tou nou devret ankouraz nou bann zenn, pour zot antre dan sa domenn Mr Speaker. Akoz la pour lemoman, bann *surveyor* kot *MLH*, zot bezwen travay apre ler, sansan bokou proze pour bezwen ganny an retar

pour bezwen bouz an retar Mr Speaker.

E osi, si nou pa fer li koumsa nou pour bezwen, Gouvernman pour bezwen al rod li bann *surveyor* prive pour kapab - kapab bouze ek sa bann proze. E bann proze li menm li, petet lo kote *timing* sa i devret ganny aranz en pe.

Timing fer sir poudir bann proze pe ganny bouze boner ki i kapab ganny demare. E sa osi Mr Arnephy in dir mwan poudir se ki zot pe revwar kot pour fer sir poudir i annan en *timeframe*, kot bann proze i kapab ganny *deal* avek.

Mr Speaker, osi nouvo fason fer se ki oparavan, si mon pa tronpe, se ki okenn proze distrik i pa ti pas atraver *Planning*. E konmela avek nouvo fason fer tou proze *Local Government* i pas atraver *Planning*, kot la *Planning* i annan son bann formalite ki i bezwen fer.

E petet ki mwan mon panse, pour nou al enn pti pe pli vit, nou devret petet i annan serten zofisye kot *Planning* ki petet pe ganny *allocate* ekspreseman, pour zot travay avek proze distrik.

Akoz sa osi i kapab pe ede pour fer petet serten *delay*. Akoz *Planning* i annan son bann prosedir, i annan son bann *policies* i bezwen

mont lo teren vin gete fer sir ki proze pe al sa.

Mwan mon i annan en legzanp dan mon distrik kot i annan pour serten proze ki'n ganny retar aköz *Planning* pe dir i pe donn son *views* lo en serten kote, e sa petet i kapab ede.

E osi bann kordinasyon, ant diferan Minister ler i ariv lo kote proze li menm li. Si i annan serten pli byen kordinasyon sa i ava ede pour nou kapab ganny bann proze ki lo standar, ki vremen lo standar pour ede ki bann proze al enn pti pe pli vit.

E Mr Speaker, mon osi parey bann larestan Manm se ki mwan mon remersi bann *partner* ki travay avek nou, parey bokou in mansyonnen, i annan Maria Payet kot *PUC*, ki nou vremen apresye ki ler nou *call* li, nenport ki ler mwan mon *call* li enn ler, mon *disturb* li si i annan serten *emergency* dan mon distrik, pour li kapab diriz mwan e ki mon pour ale.

Be petet, bann Minister pour zot kapab touy enn pti pe serten konsern, serten fristrasyon, parmi bann dimoun, aköz zis en dimoun pe rod en lenformasyon atraver en Minister i ase pour kree fristrasyon,

kot souvandfwa nou vwar bann zabitan zot bezwen vin atraver *MNA*, pour nou

kapab donn zot sa led pour fer serten kontak pour zot.

Akoz petet i *call* dan serten biro laba, sa dimoun ki li i pe koz avek petet i enn pti pe - mon pa konnen - lot fwa in ariv mwan en sityasyon mwan osi kot mon'n *call* kot Biro *Carer* apre ki enn mon zabitan in vin kot mwan, e li osi tou pe sey tap laport kot pour son manman pour lasistans *carer*.

Be mwan ler mon pe koz ek sa madanm kot Departman *Carer* laba, i paret ki sa madanm i enn pti pe per mon pa konnen pour li koz avek nou, ouswa si i pa le donn lenformasyon. nou pe sey dir li be gid nou, dir nou *the next step*, kwa ki sa dimoun bezwen vin avek, pour nou fini avek sa.

Petet i bann keksoz, i bann senp pti keksoz Mr Speaker, ki petet dan bann departman si zot revwar nou leve bomaten, nou tou nou'n *apply* en pozisyon travay, aköz petet nou kontan sa louvraz oubyen nou domenn i dan sa louvraz, me selman ler nou vin dan sa landrwa travay zis mazine si ou pe travay dan en domenn piblik, definitivman piblik tanzantan pour *call* ou pour demann ou lenformasyon.

E zot pour le plis gidans e si nou kapab zis donn bann gidans sa pep la deor, keksoz

pour mars vreman byen e kot dimoun i ganny lenformasyon.

Mr Speaker, avan mon fini koz lo Mosyon li menm li, se ki nou bann *Leaders* espesyalman nou ki'n ganny elekte dan en distrik, nou ki travay avek zot definitivman pour annan serten letan kot nou pour bezwen *call* bann *public servant* pour nou kapab kominik avek zot. I pa veditir se ki nou, nou pe vin swa *tackle* zot, swa fatig zot.

Nou osi nou annan nou bann *constituents* la deor, ki zot in tap nou laport e nou, nou bezwen vin kot zot. E petet nou devret pe komans atraver bann politisyen. Nou pa kapab pe toultan pe fann bann propagann petet pour kree, pour kree serten ou kapab dir dekourazman dan bann serten departman, ouswa pour bann dimoun ganny motive pour fer serten keksoz dan serten departman Gouvernman, pour zot pa donner parey zot merite li menm li.

E petet nou menm nou, bann politisyen annou pran en dyalog, annou rod en fason, pour nou kapab - zis mazine poudir sa pei Sesel, i pa zis petet pour Gouvernman ki la ozordi, i pour nou tou.

E demen, oubyen nenport ki lannen ki arive, nenport ki Gouvernman demen i vin o pouvwar, ouswa ou menm ou ki demen ou pe

fann serten propagann ou kapab erit sa ki ou pe fannen.

Mr Speaker, mwan mon pour donn mon sipor sa Mosyon anmennen par Onorab William, koman segonder Mosyon. Akoz mon vwar i en Mosyon ki vreman enportan, akoz nou, nou anvi ki i senpleman donn enn pti pe plis *push* bann dimoun ki pe travay dan nenport ki fason avek nou, dan nou distrik akoz nou tou nou anvi vwar nou distrik petet pe al enn pti pe pli devan, dan term proze li menm li, an term travay dan bann departman Gouvernman, menm prive li menm li.

Kot la - demen nou a vwar en Sesel enn pti pe pli meyer kot tou dimoun - akoz zis mazine poudir ler nou sorti dan nou landrwa travay, nou retourn kot nou, nou retourn kot sanmenm sa dimoun ki petet in donn en pti *call* taler ou'n mal koz ek li, ouswa ou pa'n donn li lenformasyon ou pe fer li fristre.

Nou tou nou bezwen kanmarad, akoz Sesel i vreman ptipti, nou tou nou konn kanmarad. E i pa zoli ozordi demen ler ou tann en dimoun petet pe *curse* serten dimoun, dan serten Minister.

E petet bann Minister annou - adopte annou adopte en fason kot i en dimoun ki petet i kapab la pe asiste bann

dimoun pour donn zot lenformasyon, donn zot - en dimoun ki kapab pe kominik avek zot entel ou ti anvoy ou let, nou'n resevwar ou let, lala esper tan letan pour nou kapab, kapab li menm li tir enn pti pe sa fristrasyon. E osi enn pti pe pli konekte avek Lepep li menm li. Mersi.

MR DEPUTY SPEAKER

Mersi Onorab Roucou. Prosen entervenans lo lalis i Onorab Rocky Uranie.

HON ROCKY URANIE

Mersi Mr Speaker. Bonn apremidi tou koleg Onorab en bonn apremidi spesyal pour tou bann zabitan Zil Pros ki a lekout. Mr Speaker mon koleg Onorab Johan Loze, in dir bokou, tre bokou menm e Mr Speaker atraver ou, mon'n ekout Onorab Naidu koze taler ki mannyer in koze lo Saint Louis, konmsi Prezidan Ramkalawan ki ti *MNA* laba, swivi par Onorab Sandy Arissol ki ti *MNA* laba, pa'n fer nanryen! Lenpresyon ki pe donner, li ki pe vin fer tou.

E ler mon'n ekout mon koleg, mon zanmi lekol Onorab Philip Monthy, kot pe blanm travayer servis piblik, pour defayans ki annan dan sistenm Gouvernman, pour inefikasite son Gouvernman i fer mwan lapenn, kot i pe donn lenpresyon dimoun ki si

keksoz pa pe marse, i bann dimoun ki pa siport *LDS* dan landrwa travay, ki pe fer keksoz pa marse.

Eski mon koleg Onorab Philip Monthy, atraver ou pe dir nou ki ler nou Gouvernman ti o pouvwar, zot ti ankouraz zot siporter fer sa? Ki aprezan ler sa pe arive zot pe santi ki sa ou a krwar i en boul retour? Mon poz sa lanmenm.

Mr Speaker pour en rezon ou en lot, Mosyon loter Mosyon atraver ou Onorab Waven William, plizyer fwa ler nou pe koz, nou pe dir ki Gouvernman pa pe delivre, pa efikas, li i felisit Gouvernman poudir ki Gouvernman pe byen travay.

Ler nou dir ki i annan problem, nou ganny dir ki napa problem e Gouvernman pe byen travay e pe delivre alaoter.

Ler Lepep pe plenny son sor, e nou osi pe ede pour anmenn solisyon par anmenn plizyer kestyon pour Minis, plizyer kestyon atraver *PNQ*, pour *press* Minis e Gouvernman donn nou bann larepons ki korek, e pour revwar bann move desizyon ki zot pran, nou mikro i ganny tennyen. Minis i ganny dir pour pa reponn. E si nou ensiste pour ganny laverite, nou bann Manm i menm ganny sispann.

Mr Speaker, apre ki zot dir napa problem, Onorab li menm in anmenn plizyer Mosyon parey sa ki la ozordi, pour montre ki zisteman i annan plizyer problem dan son Gouvernman. Mon pa anvi gat Mosyon Onorab dan okenn fason, i mon lobservasyon personnel, i en realite ki mwan mon'n vwar e mon santi e osi bann zabitan dan mon distrik ler mon koz avek, zot santi.

Zot santi ki i annan kek keksoz pa pe mars parey ti devret, akoz zot ti ganny dir keksoz pour ganny fer dan en fason pli byen, dan en fason pli efikas.

Zot dir zot konnekte, zot konnekte ek zot zabitan, be si vre zot ti konnekte ek zot zabitan e zot ti konn problem zot zabitan, zot pa ti bezwen esper *meeting* piblik pour esper zabitan dir tou sa bann problem dan *meeting* piblik.

Zot ti pour donn nou lanmen *press* bann Minis ki vin la pour ganny solisyon, non pa reste trankil e les nou fer sa travay, preski dir nou tousel. Alors Mr Speaker, pa fer nou krwar poudir tou sa problem ki'n ganny dir dan *meeting* piblik ki en er ou tann zot pe demann presizyon, si ti anvi zot pour sey blanm lo 43an, me bliy tou problem ki piblik pe mete pandan sa 2an edmi pe al lo 3an ki zot la.

Mr Speaker Mosyon i dir ki i mank presizyon, be lekel ki pe mank presizyon? Se zot ki la. Se zot ki bezwen fer sir zot pe vin ek keksoz ki presi.

Mosyon i dir gaspiyaz resours dan lenplimantasyon proze, e sa alors pa pe donn sa servis o nivo ki kominote i bezwen.

Be lekel ki pe fer gaspiyaz avek resours, avek *taxpayers money*? Se zot! Sa i montre ki problemm i la e nou pe zisteman nou pe anmenn plizyer kestyon, pour ed zot. Nou'n anmenn plizyer kestyon pour ed zot, me pa pour detrir zot.

Mon swete ki Lepep pe ekoute, e sa ki nou pe - sa ki nou'n toultan dir i keksoz ki ti vre, nou pa ti pe fer krwar i annan problemm, ler nou ti pe dir i annan problemm.

Problemm i egziste e zot menm zot laba lot kote, ler mon'n ekout zot, zot agree ki annan problemm, ki keksoz pa pe mars parey i devret.

Mr Speaker, mwan mon'n pas atraver en sityasyon, kot mon *constituents* ekrir Minis, in cc mwan ladan, mon annan kopi *email* Mr Speaker, mon kapab montre ou. Minis pa *acknowledge* ditou, ni enn! Finalman mwan ki bezwen anvoy en *email* sey *beg* li dir li, "Minis *at least acknowledge* sa *email*", la i reponn.

Konmsi pour mwan en ler ki mon dir, ki zot sa travayer anba laba ki pe trenn lipye? Non. Menm dan *meeting* piblik i annan i dir 1an! 1an pe espere. Napa larepons. So i pe arive, i pe arive la.

E menm ler, zot fer vizit o nivo distrik, i annan zis en Minis ki sak fwa li i vini, i envit mwan. Be larestan ler i vini i an sousekre, oubyen i vin dan Mardi ek Merkredi ler i konnen nou annan Lasanble e nou bezwen la.

Oubyen pa konn ditou fodre mon *constituents* ki dir mwan, "be ti annan vizit ozordi, ou pa'n ganny met okouran?" Mon dir "non".

Sa lespri ki zot anvi travay avek, be sa toultan pour fer ki i annan defayans. Akoz ler mon asize avek *DA*, e osi ek zot *liaison officer*, nou koz bann proze distrik, nou sey rod bann solisyon, e nou anvoy devan. Be ler vizit in ganny fer pour sa bann proze *MNA* pa ganny envite li. *MNA* i ganny kit a lekar. Apre zot dir pa politik.

So alors, fodre zot osi zot sanz zot *mindset*, ler zot dir pa politik, sanz zot *mindset*, sanz zot fason fer. Si avan ti dir pe fer koumsa, be fer li, fer lotreman.

Mr Speaker, en senp pti legzanp ler i pye dibwa i dan semen segonder ki pe bar *right of way* pour transpor kapab

ariv kot en lakour. Semen segonder i semen Gouvernman, distrik i dir ou napa larzan pour tir sa pye dibwa oubyen en rasin dan semen. En pye dibwa, en rasin napa larzan, be kote zot pe met resours?

E mon konpran ler Onorab - pour Romain in dir, fodre nou konnen lekel lazans ki responsab pour sa bann zafer pye dibwa. Akoz dimoun i *call MNA* e mwan ki bezwen fer en zar rode lekel ki mon kapab fer vin tir pye dibwa, akoz distrik, napa larzan.

E si sa boug i sarze, i sarz mwan, pour travay ki Gouvernman - i vre nou bezwen ede ki Gouvernman - en senp travay ki Gouvernman ti devret kapab fer lo nivo distrik. E mon krwar bokou nou bann *MNA* nou pase atraver sa bann sityasyon.

So Mr Speaker, sa pour mwan i montre ki zot pa pe met larzan, kot vreman i devret ganny mete kot zabitan pe ganny afekte. I annan ki kapab vin atak mwan personnel, apre dir ki mon pe ganny lagrandisman por, *sewage treatment*, nouvo lopital.

(laughter)

HON ROCKY URANIE

Sa serten sa bann proze larzan ti deza la mon okouran. Por larzan ti la! Por larzan ti la! 50milyon ti annan pour Por, *sewage* ti annan \$14milyon ki nou ti'n gannyen pour fer *sewage* pour 14kilomet semen, e sa i menm dan zournal, zot kapab al gete silvouple, lopital zot in ganny en don \$4milyon e apre pres R30milyon ki *taxpayers money*.

Zot la, byensir zot bezwen delivre. Akoz parey mon'n deza dir zot pa ti ekspekte zot vin vakans la. Zot bezwen vin travay.

Mr Speaker, mon zis swete zis parmi sa bann proze i napa ki pe ganny konsidere koman resours pe mal ganny servi, oubyen pe ganny servi an tro, lo serten sa bann proze.

Mr Speaker, vi ki Mosyon pa *binding*, be selman Mosyon i osi ganny servi koman en form ledikasyon, pour edik nou bann Manm menm, Lepep Seselwa, mon swete ki Gouvernman i a ekout lapel Onorab e rektifye sa bann problem.

Akoz zot ti ganny elekte pour vin fer bokou pli byen, me selman i malere ki ler zot pa pe kapab delivre zot pe blanm travayer servis piblik e pe dir ki politik, sabotaz - sa i bann vye, bann vye retorik, ki dimoun deor in fini vwar, in fini konpran.

So alors, mwan mon pa pe *entertain* sa, akoz zot menm zot, zot in vwar kote defayans i ete, zot pe vir an ron. I annan i remersi en *agency* dir i pe travay byen, e i annan li menm *agency*, i dir non-pa pe delivre foudre refer sa zafer, regete.

So alors mon zis swete Mr Speaker, ki zot fer bokou pli byen e zot aranz sityasyon pour delivre alaoter, parey ki zot ti'n promet sa pep Seselwa. Mersi Mr Speaker.

MR DEPUTY SPEAKER

Mersi Onorab. Dan ou prezantasyon i annan en keksoz ou'n dir, mon ti ava kontan zis en komanter pa pour kontradir sa ki ou pe dir, me selman *advice* pour piblik ki pe ekoute, akoz sa zafer *call* Minis, *email* Minis pa ganny zot.

Personnelman mwan koman *MNA*, zanmen mon *call* en Minis ouswa ekrir li akoz mon konpran en Minis i vremen ekipe. Zot la pour regard vizyon stratezik zot Minister e zot annan en striktir otour zot ki piblik i dwatet servi.

Par egzanp mwan mon pour kontakte son lofis akoz mon konnen i annan en sekreter i annan en *PA*, i menm annan en Direkter Egzekitif dan son biro. Me pli enportan kot mon pe adres sa size, i annan en dimoun ki

ansarz sa *unit* dan sa Minister. *So I go through there and I leave the Minister* koman dernyen rekour si zanmen mon pa ganny en sa - akoz i vremen difisil.

E nou kekfwa bann Manm Lasanble osi, sa i en ledikasyon pour piblik laba deor, evite ekrir Minis direk, kontakte li direk akoz - menm mwan la mon telefonn pa ek mwan, mwan, letan mon mont dan mon biro la, zis *missed call*. Be akoz dimoun pe *call* mwan, zot pa vwar kot mon ete?

Mon annan en sekreter la, ti kapab *call through the Assembly* e kit en mesaz i pli fasil pour mwan gannyen. So i en ledikasyon pour nou piblik deor pour zot sezi e kekfwa i kapab deblok en pe sa bann keksoz ki nou pe koz lo la ozordi. Mon vwar ou lanmen anler Onorab. Wi?

HON ROCKY URANIE

Wi Mr Speaker. Ler mon dir ou Minis, Minis ek tou son bann dimoun *PS* ek tou bann responsab, tousala i ganny cc dan sa *mail*. So personn pa reponn e finalman mon bezwen enplor Minis pour li reponn.

MR DEPUTY SPEAKER

Sa i tre byen. Akoz zisteman nou annan en rol koman en reprezantasyon e nou koman

MNA wi, parfwa nou ouver sa laport ki fermen. Onorab Naidu ou annan en *point of order*?

HON SATHYA NAIDU

Yes Mr Speaker mon le *raise en point of Order*, pour koriz en *misapprehension* lo lapar Onorab.

MR DEPUTY SPEAKER

61.

HON SATHYA NAIDU

Yes.

MR DEPUTY SPEAKER

Ok.

HON SATHYA NAIDU

Lo lapar Onorab Rocky Uranie. E i enportan pour fer en keksoz kler. Dan mon diskour, mon'n fer resorti poudir ki L'Egzekitiv ti annan en lobligasyon a en serten moman e zot pa'n deservi zot responsabilite e alors distrik in erit plizyer ka.

Lo kote Onorab Arissol in ganny elekte de fwa, plis ki ou Onorab Rocky Uranie, in ganny elekte en trwazyenm fwa Bel Ombre. Pa vin menm mansyonn Prezidan, akoz in sorti *Leader* Lopozisyon, in deservi 2 manda e in vin Prezidan Larepiblik, baze lo son konpetans, an relasyon avek konpetans L'Egzekitiv, mon ti'n soulinyen i paret ou

tann serten keksoz e apre ou *distort*. Pa abiz ou drwa pour ou eksprim ou lekor silvouple. Mersi.

(Interruption)

MR DEPUTY SPEAKER

Ok-ok. Nou- *Let's stick to the fact of the matter*. Ok de prosen Manm ki lo mon lalis sertenman zot pa pour koz dan 9 minit, zot pa pour koz dan 8 minit akoz la ler in sanze.

So ki nou pour fer, nou pour al *break* e nou ava retournen 4er mwen 10. 4er mwen 10, so nou ganny nou 30minit nou a pran enn pti *break* pour lemoman. Mersi.

(BREAK)

MR DEPUTY SPEAKER

Welcome back tou dimoun. Nou pe kontiny deba lo Mosyon table par Manm Elekte pour distrik Grand Anse Mahe Onorab Waven William, ki lir; Swivan mank presizyon e gaspiyaz resours dan lenplimantasyon serten proze e donn servis o nivo kominote, Lasanble i demann ek tou akter kle dan kominote pou kontinyen revwar zot lapros, pou ki i annan meyer rezilta.

Prosen Manm lo lalis se Onorab Woodcock.

HON WAVEL WOODCOCK

Mersi Mr Speaker. Mr Speaker, nou Lasanble i en Lasanble ki'n fer bokou listwar depi ler nou'n konmanse. Annefe resaman ti annan en Mosyon anmennen par en zenn ki'n ne avek en dezabilite, ki ti anmenn en Mosyon pour bann dimoun avek dezabilite.

E ozordi nou pe *witness* en lot listwar dan nou Lasanble. Ozordi nou dan 7enm Lasanble. Nou'n pas dan premye, 2enm, 3enm, 4enm, 5enm.

6enm Lasanble ti en Lasanble en pe diferan, aköz menm si ti annan en parti dan Gouvernman, lot parti ti dan – menm si ti annan en parti ki ti dan Gouvernman, dan Lasanble ti annan en lot parti politik. Alor ki ti neselit en serten koabitasyon sa tenm ki nou ti servi.

E ozordi premye fwa dan listwar nou Lasanble, en Manm dan Gouvernman, in annan kouraz Mr Speaker, pou anmenn en Mosyon pou fer en evalyasyon son prop Gouvernman, kot i pa'n per pou fer resorti kot keksoz pa pe marse. Kot fodre amelyore. E menm donn sizesyon lo ki mannyer nou kapab amelyore.

E sa Mr Speaker, i montre ki mannyer nou demokrasi in evolye. E sa Manm se pa lot ki Onorab

Waven William, ki'n servi 5 term anba Gouvernman konman en Manm Lasanble pour *SPUP*, *SPPF*, Parti Lepep, *US*, Mr Speaker.

Ki zot ti sey fer li pas par lafnet ler i ti pe kritik son Gouvernman. Ki dela si zot ti'n ekout li, sa bann kritik ki i ti annan son Gouvernman, evalyasyon ki i ti pe fer ek son Gouvernman, petet zot pa ti pou dan Lopoziyon ozordi. Me zot pa ti ekout li Mr Speaker. Zot ti plito le fer li pas par lafnet.

E la ozordi i dan nou Gouvernman. E li i en dimoun avek sa leksperyans, ek sa lasazes ki i annan, i pare pou vin devan e pou li dir; kote ki mal, kote ki byen. E donn bann propozisyon lo ki mannyer nou kapab ed nou Gouvernman fer pli byen. Se sa rol en Manm Lasanble Nasyonal, Mr Speaker.

E Mr Speaker, nou Gouvernman i aksepte kritik. E se sa lafason ki en Manm i merit annan *oversight* lo en Gouvernman. Alor mon demann lot kote latap pou pa repros nou pou fer nou travay.

Akoz ler zot, zot ti dan 5enm Lasanble, e menm 6enm Lasanble zot ti per pou kritik zot Gouvernman, aköz zot konnen ki pou arive. Ler zot kritik zot Gouvernman, zot ganny met deor prosen

eleksyon. Zot pa ganny drwa debout ankor dan en eleksyon.

Mr Speaker, fodre pa zanmen nou bliye, Mr Speaker ki Gouvernman *US* pandan *COVID* an 2020 – menm si zot ti'n fer provizyon pou fors mazer, zot Minis Finans sa letan Mr Lousteau Lalanne dan en *interview*, i ti admet li menm ki zot kapab napa larzan pou pey lapey travayer dan Sekter Piblik an 2021. I lo rikord Mr Speaker, ki zot Minis Finans ti dir an 2020.

E fodre pa bliye Mr Speaker, i kler ki dan *Consolidated Fund* ler nou Gouvernman ti vin o pouvwar ti annan selman R14milyon Mr Speaker. Fodre pa zanmen ki nou bliy sa.

Mr Speaker, ler mon'n ekout lot kote latab koze, i kler pou dir zot annan en lakanmizri *meeting* piblik. Akoz? Swa zot in *fail* pou *attend* sa bann *meeting* piblik, ouswa zot in ganny lord pou zot pa *attend meeting* piblik, Mr Speaker, kan zot in ganny elekte dan zot distrik.

E nou tou nou konnen poudir zot in ganny lord. Akoz mwan mon konnen. Mon koz avek plizyer bann Manm lo lot kote latab, e i annan zot ki ti anvi *attend meeting*.

Me akoz zot in ganny en lord pou zot pa *attend*, zot pa'n al sa bann *meeting* piblik, menm si ti konsern zot distrik

– konsern zot distrik kot tou bann Minis - *Cabinet of Ministers* ti la, Prezidan ti la.

Kot zot ti kapab – e ansanm ede adres serten sa bann size konsern ki zot zabitan i annan. Apre zot a vin donn nou leson pou dir nou koumsa fodre nou, nou sanz zot *mindset*.

Mr Speaker, *US* i en parti ki ozordi zot zis *boycott* tou keksoz. Zot *boycott* menm Lazournen Konstitisyonnèl. *Flag Raising Ceremony* zot ti abitye vini avan, ozordi zot refize vini akoz Gouvernman in sanze. I en mank respe Mr Speaker! Lafet Nasyonal menm, Parad zot pa vini, zot *boycott* Lafet Nasyonal Mr Speaker!

Meeting i ganny fer pou zot *attend*, zot ganny envite – e mwan mon pou dir ozordi Mr Speaker, ki i annan plizyer *meeting* ki bann Manm Zil Pros in ganny envite, ki Onorab Uranie pa'n zanmen *attend* sa bann *meeting* Mr Speaker. Onorab Porice i la koman temwen. Onorab Churchill Gill i la koman temwen.

I annan Minis in al fer en vizit, in refize *attend* sa bann *meeting*. Olye, in al vakans *Silhouette*, Mr Speaker.

Mr Speaker, sanmenm distrik ozordi ki pe ganny plis proze. La Digue Mr Speaker. Tou lezot distrik pe dir; zot be

tou proze La Digue? I annan bann proze Mr Speaker, bann plan ki ti lo *shelf* ki ti pe pous gomon lo la, Mr Speaker. Lapousyey ti'n akimile lo la.

Nou Gouvernman in vini in tap lapousyey lo sa bann proze. Ozordi sa bann proze pe materyalize. Akoz zot, i annan bann proze zot in promet pour 20an, 30an, 25an, 10an.

La ozordi zot pe vin koz lo konplent ki en zabitan in fer dan dernyen 1an, 2an. Be bann ki pe esper lakaz 25an, 30an Mr Speaker, ki ozordi pe ganny lakaz, zot pa koz lo la?

Mr Speaker, ozordi i annan en kantite keksoz ki nou Gouvernman pe fer, pe *improve* lo la. Me i annan en ankor en kantite keksoz ki nou kapab fer Mr Speaker.

Mazinen 2an edmi nou'n pran – nou'n antre dan Gouvernman e nou'n erit en kantite keksoz. I annan keksoz ki nou'n erite ki bon. Me an menm tan i annan bokou bann keksoz ki nou erite Mr Speaker, ki ti dan bann leta vremen, vremen deplorab.

E Sesel en pti pei avek 102mil612 zabitan dapre dernyen *census*. Nou annan en pti marse vremen limite, en pti *market*. Me avek bokou, bokou potansyel.

E mon pou konmanse Mr Speaker, pou mwan felisit bann biznes. Bann *micro, small, medium enterprise* e

menm bann gro biznes osi Mr Speaker. Pou zot rezilyans pou sirviv e refer apre defi *COVID-19* Mr Speaker, ki nou pei ti'n ganny tape avek.

E Mr Speaker, ozordi kantmenm *US* pe rod tou sord kalite leskiz - *comme d'habitude* pe rod lipou kot napa lipou, Mr Speaker, nou Gouvernman in pran bokou bann bon desizyon.

Bann desizyon stratezik parey vaksinyasyon, e ouver nou *airport* ki dayer zot ti *boycott*. E akoz bon zesyon fiskal larzan Leta, ki ozordi nou pei pe redebout lo nou lipye e nou pe al dan bon direksyon.

Mr Speaker, sa Mosyon pe senpleman demann plis *synergy* e kolaborasyon ant tou sekter ekonomik ansanm avek Gouvernman. E partenarya si oule, pou fer Sekter Piblik e paraetatik reste soutenab e kree plis larises. Ki lobzektif – sipoze lobzektif Gouvernman pou kree larises pour son pep, pou nou pep viv byen e an bonn sante. E zot annan – zot kapab *make ends meet*.

I annan en kantite ki Gouvernman i kapab fer pou ankouraz biznes dan tou Sekter Prive – dan tou sekter pou fer pli byen, pou kree plis larises e plis lanplwa. Plis loportinite pou grandir e envestir.

E nou tou nou konnen *the bottom line is*, pou ki Gouvernman i anmas plis reveni, plis *tax* pour depans Gouvernman, pour nou pei kontinyen progrese.

Mr Speaker, i konmans avek Gouvernman. Si nou anvi kree larises pour nou pei, i konmans avek ladministrasyon en pei pou donn *leadership*, pou donn direksyon. Direksyon stratezik e met bann Polisi an plas pour soutenabilite nou lekonomi, soutenabilite tou Lendistri e sekter.

Mr Speaker, pli enportan se lafason ki en Gouvernman i zer larzan Leta. E nou'n war sa. Nou Gouvernman in fer bokou pou koup gaspiyaz. E nou konnen dan lepase ki lafason ki larzan pe ganny *managed*, pa ti neserman pe ganny *managed* dan en fason ki byen.

E si mon pou servi legzanp. Bann proze ki bokou bann Manm in koz lo la dan lepase, nou'n war dan lepase bokou bann proze ki ti a bann pri egzorbitan. Bann pri egzazere Mr Speaker, ki'n kout nou pei bokou, ki nou pei in perdi bokou larzan.

E bokou bann proze *substandard* ozordi, ki ozordi nou Gouvernman pe bezwen travay, refer sa bann proze e vin avek bann nouvo proze

pou ranplas sa bann proze ki ti ganny fer lo en standar ki pa ti alaoter.

E si mon pou al lo Praslin Mr Speaker, mon annan tro bokou – tro bokou legzanp pou donner lo bann proze *substandard* dan mon distrik.

Parey *rock armouring* Amitie - plizyer semen, plizyer pon ki'n ganny fer. Parey *Ponte Vecchio* sa de pon *Ponte Vecchio*, St Sauveur ki nou ankor pe sey rezourd ozordi, Mr Speaker.

Me dan tou distrik, Mr Speaker, nou'n war ki mannyer dan lepase anba Gouvernman avan, larzan ti ganny *mismanaged*. Larzan osi ti ganny vole.

Sa bann ki ti pe bour lanmen dan kof Leta, in donn bal Mr Speaker. E tou sa bann keksoz ozordi, nou pe koupe Mr Speaker.

Ozordi nou Gouvernman pe vey kont piblik. Pe koup koripsyon pou ki nou pa perdi larzan malapropo parey ti pe arive dan Gouvernman avan. Mon pa pou al lo sa bann topik. Nou'n fatigue koz lo la.

SBFA, Proze Ile Soleil 2020. Bal dan simityer. Bal *ASP*, Mr Speaker.

I annan sitan bokou Mr Speaker, bann landrwa dan Gouvernman, bann antite kot in annan *mismanagement of fund* kot larzan in disparet Mr Speaker.

E nou ozordi nou Gouvernman pou anpes sa bann keksoz arive, ozordi nou pe bouz *towards* en *cashless society*. Peyman fer *online*.

Nou pe *move digital* atraver *online banking* pou anpes vol larzan likid, ki dayer dan lepase, nou konnen dan lepase ki fason ki larzan ti pe ganny vole dan plizyer - disparet dan plizyer Minister.

E Mr Speaker, koman en Gouvernman nou bezwen modernize. Fer keksoz vin pli vit. Koup bann kou loperasyon e fer servis ariv a laporte nou zabitan pli vit, e dan en fason ki pli efikas. E nou pe bouz dan sa direksyon.

E sa ki nou anvi fer, Mr Speaker, se pou fer servis piblik vin pli efikas. Me fodre tou dimoun i *come onboard*. E sa i enkli Lopozisyon osi. Nou vin ansanm, nou *come onboard*, nou rod fason pou nou ed Gouvernman.

Mr Speaker, dapre tou, sa Gouvernman i nou Gouvernman. Tou Gouvernman – tou – sak fwa i annan en eleksyon, Gouvernman i reste Gouvernman Sesel.

Ladministrasyon i sanze, wi. Me Gouvernman i reste nou Gouvernman, i reste nou pei. E i nou responsabilite pou nou ed nou pei, nou Gouvernman pou bouz devan. E menm kritike si fodre, ki sa

ki nou pe fer ozordi akouz nou anvi ed nou Gouvernman.

Demmen ladministrasyon i kapab sanze. Dan kekfwad - dan ankor, mon pa konnen, 30an, 50an ladministrasyon i kapab sanze, me selman Gouvernman i reste Gouvernman Sesel e nou erit tou responsabilite. Menm bann det ki zot in akimile dan lepase, nou Gouvernman in erit sa bann det Mr Speaker.

Proze ki'n konmanse, nou Gouvernman i erite. Nouvo proze ki nou pou konmanse – e si i pa *fit* dan sa ladministrasyon, dan en lot ladministrasyon. Ouswa bann proze ki pou fer ladan le fitir, bann administrasyon ki pou vini dan bann lannen vini, zot pou erit bann proze ki Gouvernman presedan in fer Mr Speaker. Se koumsa keksoz i marse.

E i enportan pou annan kolaborasyon ant bann diferan sekter avek Gouvernman, pour ede kree larises. E Mr Speaker, fodre annan volonte par Gouvernman osi, pou ed bann sekter.

Malerezman Mr Speaker, dan lepase ki nou'n war? Nou'n war zis koze. Nou'n war bokou promet ki'n ganny fer me pa'n zanmen materyalize, Mr Speaker.

Pa'n zanmen delivre. Sa ti letap Gouvernman presedan. Kantite proze.

Kantite parol in ganny koze. Kantite zoli sanson in ganny sante, Mr Speaker.

Me problem se ki nou pa'n war zot *deliver* lo sa bann proze enportan. E ozordi, Mr Speaker, i annan en gran diferans ant ladministrasyon avan avek nou ladministrasyon ozordi. Nou war sa gran diferans.

Mon a dir ou diferans ki annan dan ladministrasyon avan avek ladministrasyon ozordi – avek ladministrasyon ki o pouwar ozordi. Nou ladministrasyon *LDS* i pran aksyon. Nou pa zis vin bat latet dimoun sak fwa eleksyon pe aproz.

Nou pa esper ler eleksyon pe aproz, pou nou taye pou dir nou pe al fer en tel proze. Ouswa pou nou tay partou, monte fer en *press conference* dir nou pe al fer en proze, parey proze *Sport Complex Ile Eve*.

Sak fwa en eleksyon ti vini en letan – sak fwa eleksyon mon rapel, Minis Larue ti Minis sa letan. Arh - mont lo televizyon, nou pe al fer *sport complex*. Sa i 15an pase, ozordi nou pa ankor war *sport complex* Mr Speaker.

Proze Lasose Baie Ste Anne Mr Speaker, pa ozordi zour pe vini sa proze Lasose Baie Ste Anne.

Dan 6enm Lasanble Onorab Gill i la, Mr Speaker,

en Komite ti ganny etabli par Minis Charlette. Diskit plan *scope of work* - vizit parti vizit - isi laba. Ti pou annan larzan pou sorti isi, larzan pou sorti laba.

Me selman Mr Speaker, naryen pa'n ganny fer. Sa proze – sa bann proze *Ice plant* Grand Anse, proze Lasose Baie Ste Anne in al 20an sepa konbyen lannen. Ti vizyon Albert Rene menm, selman zanmen in materyalize Mr Speaker.

Minis Bastienne ler ti vini ti vin Minis pour Lapes. Mon rapel sa zour, akoz sa zour mon ti vremen ankoler, mon ti sorti dan sa *meeting*. Li ler i vini i dir koumsa; “ou konnen, Grand Anse – zot pa bezwen *ice plant* zot. Zot bezwen zis en *cold storage*. Nou ava pran *ice* Baie Ste Anne nou a met Grand Anse.”

Tap kalot dan tou sa ki nou ti'n travay lo la. E nou ti annan en Komite ki ti'n ganny etabli ki mon ti lo la. Onorab Gill ti lo la. Tou Lasosyasyon Peser ti lo la e lezot bann *stakeholders* ti lo la. Nou'n diskite parti diskite, isi laba. Finalman ler Minis Bastienne i vini, i tap kalot ladan.

Baie Ste osi mon rapel Mr Speaker, menm zafer menm. Ti dir; *Arh*, i annan keksoz nou pa pou kapab mete. Nou bezwen *scale it down*. Isi, laba.

Leskiz pou ganny later. Isi, laba.

Mon rapel Onorab Gill ti dir koumsa; “fodre konble sa bout kot sa *slip* i ete. Konble par devan kordgard.” Sa ki i ti anvi. Mon rapel i ti fer propozisyon dan *meeting*, Mr Speaker. Pa'n materyaliz naryen.

E louvertir proze Lasose, Mr Speaker, mon *wish* mon ti'n *record* sa ki *Chairman* Lasosyasyon Peser ti dir kot sa proze. E *SBC* pa'n pas antye. Ti a bon *SBC* i pas son *interview* antye. Ou konnen ki sa msye ti dir Mr Speaker?

I dir koumsa; “ou konnen bann peser ler i ankoler ek mwan. Bann peser i dir koumsa; “ou konnen, Mr Green ou latet i a ganny letan blan, e menm bann landrwa pa nonmen pou ganny sans vin blan avan ler ou ganny sa Proze Lapes Baie Ste Anne.” I ti dir. I dir peser ti ankoler. Peser pa ti krwar poudir sa Gouvernman...

Mr Green, menm zafer Gouvernman pou sanze, sa proze zanmen pou demare. Mr Green lo *interview* in donn *SBC*. Al rod sa, pas lo *SBC* ou a war ki sa msye in dir.

E ou konnen Mr Speaker ki ti arive? Ler Mr Ferrari i vin Minis Lapes – en bon pe negosyasyon in fer ant li avek Mr Bossi - avek sa *stakeholder*

enkli sa msye ki lo *Board SFA*. Mon pa pou mansyonn non.

E zanmen mon pou bliye Mr Speaker, mon menm mwan mon ti annan en *meeting*. Sa letan - *DA Barbe* - Moses Barbe. Mon pe koz ou 2 landrwa la - Baie Ste Anne.

Akoz ti annan 2 proze ansanm sa. Ler Minis Ferrari i vin zis en vizit Praslin, nou ti zwenn ek li. I dir; Onorab Woodcock dan 1an mon donn ou en *ice plant*. 1an.

Fer vizit Baie Ste Anne i dir pa trakase, sa bann proze pou bouze. I dir aköz i annan larzan ki la. I annan larzan *available* ki pa'n ganny servi dan lepase anba *EU Seychelles Fisheries Agreement*, ki Gouvernman pa'n servi preski ditou Mr Speaker.

E ki nou'n war Mr Speaker, dan lespas 2an la, proze Lapes Baie Ste Anne ti konmanse an 2021. Negosyasyon in kontinyen pou fer provizyon pour bann peser, osi byen ki bann fermye e osi bouse, pou nou ganny sa proze Mr Speaker.

Ki'n ganny promet pour konbyen lannen? Mon'n perdi kont konbyen lannen Mr Speaker. Gras a sa Gouvernman ki sa proze in materyalize ozordi.

Passenger Terminal Mr Speaker, ki ozordi en Manm pe dir pa ti merit apel Ero, aköz i pou anmenn divizyon lo

Praslin Mr Speaker. Ki'n ganny apele apre en lensidan ki en ero ki fek ganny en *award* Mr Speaker.

Mr Luc Grandcourt ti sov lavi tou bann pasaze. Ou a vin dir pou dir sa non pou anmenn divizyon lo Praslin, kan i en dimoun ki'n fer bokou pou zabitan, non selman Grand Anse me Baie Ste Anne osi, Mr Speaker.

Mon rapel Mr Speaker, Onorab Gill ti la ler dezyenm vizit Prezidan ti vini. Premye vizit ti koz avek – mon pa bliye - *current – the former Chairman of Lotorite Port*, ti dir *ok*, proze pou demare.

Dezyenm vini ler Prezidan i vini i demande; be oli proze? I dir non Minis, proze sa an 2024 ki sipoze konmanse. Prezidan ti ankoler sa zour. E nou konn Prezidan manner i ete. En Prezidan ki serye.

I dir; mon donn zot 6 mwan pou fer sa proze! Proze pa'n pran 6 mwan Mr Speaker, me proze in pran 9 mwan. Mon rapel ler 6 mwan in arive, Prezidan ti fer vizit ankor. Mon rapel sa kontrakter, presyon ki ti lo sa kontrakter. Prezidan i dir koumsa; mon donn ou la 1 mwan, 1 mwan pou fini sa proze.

Nou annan en Prezidan ki pran aksyon. Nou annan en Prezidan ki kapab pran desizyon.

(APPLAUSE)

HON WAVEL WOODCOCK

Akoz si pa ti sa Prezidan sa bann proze ki ou war pe arive partou lo Mahe, Praslin, La Digue la Mr Speaker, zanmen ti pou materyalize anba Gouvernman *US*.

Akoz i annan sepa konbyen lannen zot pe promet zot pa'n zanmen kapab *deliver* Mr Speaker! Apre zot a dir nou koumsa nou vin koup riban.

Mr Speaker, pou koup riban fodre ou *win* en eleksyon pou ou kapab koup riban Mr Speaker.

(APPLAUSE)

HON WAVEL WOODCOCK

Ou konnen ou pa kapab azir koman en sipay ki pe sey antre dan lakok son kanmarad, Mr Speaker. E *US* zot pa ankor konnen ki lakok pou zot antre ladan. E sak fwa zot vin dan Lasanble, zot sey rod en lakok pou antre ladan. Mon krwar finalman zot pou antre dan en sopin Mr Speaker.

Mr Speaker, *ice plant, gear store* ozordi Grand Anse Praslin. Konbyen lannen nou pe espere pou en *gear store* Grand Anse Praslin, Mr Speaker? Bazar ti pe tonm lo peser Mr Speaker. Ti'n pouri Mr Speaker, nou'n aranze.

Warehouse Mr Speaker; *warehouse* in ariv dan kannal Mr Speaker akòz nou pa'n fer proze *rock armouring*. E menm sa Mr Speaker, zot in taye pou fer en *rock armouring* avan eleksyon. La ozordi get *rock armouring* Mr Speaker, bann proze *substandard* ki zot in fer.

E la nou Gouvernman in dir, mon pe espere, ki sa *rock armouring* Amitie pou pran la Amitie vizavi *airport* pou anmenn ziska Ros Korbizo, pour nou fer nou *seafont*.

E nou pou osi annan en proze pour bann *medium and small – well* en proze Vilaz Artizanal Mr Speaker.

E mwan osi mon annan lezot keksoz ki mon'n demande pour Grand Anse. Parey Mr Speaker, mon'n demande ki nou aranz sa lasose. Mon ankor pe demande, mon pa pou aret demande.

E mon'n osi demande pou fouy sa *channel*, akòz enn nou *challenge* se ki bann peser ler i antre ennler ler mare i ba pou vin sers *ice*, zot pri lanmenm. E zot ankor bezwen savoy *ice* pou al lo bato konzele an servan bann *fiberglass* swa bann pti bato.

Mr Speaker, nou bezwen ankouraz - parey mon'n dir - bann *MSMEs* pou kree plis larises, plis louvraz. Me nou

bezwen en fasilite, nou bezwen en lenfrastruktir.

Se lenfrastruktir ki lakle Mr Speaker. E parey mon'n dir, en kantite promes in ganny fer dan lepase. Be bann proze pa'n ganny fer.

Proze Amitie Mr Speaker. Vilaz Artizanal pou met bann kyos - en landrwa touristik Mr Speaker. Minis Cosgrow i la. Dan 6enm Lasanble mon ti anmenn en kestyon pour *Minister* Cosgrow, pour en proze ki'n ganny promete. I annan 20an.

I ti la Mr Speaker, devan, mon ti demann li; kan ki proze kyos, proze artit...pour bann artizan, bann artis, bann *craftsmen* pou ganny fer lo Amitie *site*? I ti dir mwan;

“pe vini, lannen – dan *next budget* ou pou war. Pa trakase nou pe travay lo la, pe vini menm Mr Speaker. ”

Zot in travay menm Mr Speaker. Zot in kontinyen travay menm ziska ler zot in tonm dan Lopoziyon Mr Speaker! Zanmen sa bann proze in materyalize. E zot ankor pe travay menm Mr Speaker.

Parey mon'n dir, sa bann proze pa'n materyalize. E la mon annan mon en Minis ki pe siport mon Mr Speaker. Mon *chapeau* Minis Devika, sipor ki'n donn mwan.

E pa zis mwan. I pe donn zabitan Grand Anse Praslin

akoz nou'n zwenn avek plizyer lasosyasyon. Nou'n zwenn avek Parfe, nou'n zwenn avek plizyer *stakeholders*, pou nou diskit sa proze lo sit Amitie.

Pou nou fer sa Vilaz Artizanal avek bann kyos, e bann fasilite pou deservi nou bann artis ek artizan pou fer parey en *Waterfront Project*. En proze avek bann fasilite *cafeteria, bar, whatever* pou nou kapab anbelir nou zil e donn zot bann fasilite neserer.

Mr Speaker, ledikasyon nou pep i enportan. Met bann fasilite an plas parey lekol. I annan Manm in koz lo *NIHSS*. Mon pa pou koz lo la, nou tou nou konn son leta.

Lo kote Praslin mon bezwen en lakres kot Grand Anse primer. I annan serten konversasyon ki pe deroule, me mon pe esper lo Minis pou nou ganny en keksoz konkret. Akoz nou bann *teachers*, nou bann zanfan, nou bezwen sa lakres Grand Anse, Praslin primer.

E mon annan en lot konsern kot i konsern renovasyon lakres, Anse Kerlan. E retar sa proze. En proze ki'n sipoze fini depi konmansman lannen. Me mon konnen poudir i annan serten defayans avek kontrakter ki pe fer ki sa proze pe tro tarde.

E la ozordi zot bann zanfan i dan sant – lakres i kot Sant Kominoter Anse Kerlan,

ki pa konvenab. E mon pe sipliye. Mon pe demann Gouvernman pou fer zot mye, pou met presyon lo sa kontrakter pou fini ek sa proze o pli vit posibil.

E enn bann problem ki nou'n gannyen dan lepase e menm anba Gouvernman avan, se avek bann kontrakter, kot bann proze i konmansman apre standar pa bon. Ouswa zot tarde ek proze. Ouswa zot kit proze zot al lo en lot.

Parey *Daycare*, Grand Anse Praslin ki nou ti bezwen finalman tir sa kontrakter, rod en lot kontrakter pou mete pou fer sa travay.

E bann kontrakter ki pa deliver, ki *fail*. Nou pa kapab kontinyen rebran sa bann kontrakter ankor. Nou bezwen pran bann kontrakter ki serye. Bann kontrakter ki *deliver* dapre zot kontra.

Lasante nou pep Mr Speaker; Enn konsern mon zabitan Mr Speaker, se bann spesyalis ki mont lo Praslin, zot mont lo Praslin menm zour pou war pasyan. E akoz ler avyon oubyen ler bato. Ler zot arive, zot ariv en pe tar. Pasyan i la depi 7er edmi pe espere. Ennler 9er – 9er dmi 10er ki zot pe war spesyalis. Ennler spesyalis pa fini war pasyan.

E sa en lapel mon'n fer avek Minis pou, akoz pa

organize pour sa bann spesyalis mont lavey, ki zot kapab ariv lopital boner pou war tou sa bann pasyan.

Sa enn bann pti, pti keksoz ennler si nou kapab *tweak* e aranze, i pou tir en kantite fristrasyon dan Pralinwa.

Lopital Mr Speaker; Fasilite lopital La Digue Mr Speaker. Petisyon parti petisyon sinyen par son Onorab, Mr Speaker. Nouvo lopital, mon rapel Onorab Anse Royale.

Onorab Lemiel ti dir koumsa; "Be si La Digue pa le, donn nou Mr Speaker." Mazinen ou prop koleg i dir en keksoz koumsa. Sa i fer onte Mr Speaker.

Mr Speaker, e la ozordi plis ki 1bilyon nou Gouvernman i anvi depanse pou fer en nouvo lopital *state-of-the-art*. E ou konnen, lot kote Lopozisyon i kritike. Al lo zot bann paz *Facebook* ou a war.

Selman ler ti fer *National Library*, ki zot ti fer? Pa zot ti demann Seselwa pou kontribye. Kwa ki diferan la? Kwa ki diferan Mr Speaker?

Ou konnen, ennler mon sagren Mr Speaker, sa bann kalite rezonnman ki nou war i sorti lo kote Lopozisyon. Sekter *Sport* i kapab anmenn larises dan nou pei Mr Speaker.

Sports Tourism nou'n koz lo la. E ozordi nou pou war bann konpetisyon enternasyonal. Konpetisyon natasyon. Konpetisyon *wind surfing* o nivo enternasyonal. *Kite surfing*. *Wake foil*. *Golf* osi.

E sa bann keksoz ki nou merit ankouraze pou anmenn plis larises e devlop – e devlop nou bann atlet lokal.

E finalman Mr Speaker, mon ganny en sok. Mon fek ganny sans zwenn avek sa group. Avek *Chairman Federasyon Foutbol* avek enn son teknisyen e mon'n ganny sans war plan stad Mr Speaker, pour sa *stadium* pour *beach soccer*. *World Cup Beach Soccer*. Ou kapab krwar pe ganny fer Sesel an 2025?

Konmsi tousala i montre ou lanpler ki Sesel pe arive. *Trust* ki bann lakominote enternasyonal ozordi i annan dan nou pei. Akoz zot *trust* nou, Mr Speaker.

E zot dir zot menm poudir zot *trust* sa Gouvernman, akoz sa Gouvernman mannyer nou pe zer larzan. E sa Gouvernman pa pou vole zot larzan, Mr Speaker. Kontrer zot pare pou donn nou plis larzan, akoz zot *trust* nou ki nou pa pou bour sa larzan dan nou pos, Mr Speaker.

Ankor en fwa Mr Speaker, Praslin nou bezwen devlop nou bann *sportsmen* lo

Praslin, La Digue dan plizyer disiplin; *water sport*, laboks, *judo*, *karate*, foutbol, *volleyball*, atletik, *basketball*.

Nou annan sitan atlet kalifye, *very good athletes* Mr Speaker, ki zot zis mank fasilite. E dan lepase Gouvernman ti napa sa volonte pou met sa bann fasilite an plas lo sa standar.

E nou Gouvernman, fodre nou fer pli byen ki Gouvernman lepase. E Minis in donn serten langazman, in reponn mon kestyon dan Lasanble Nasyonal pour devlop sa *Water Sport Centre* e fasilite spor *NSC* ki dan leta deplorab, in donn en langazman, en promet.

E mon pe ekspekte Minis Spor *deliver* lo sa bann promet ki'n fer. E sa i enkli kot *Ex STC* o bor lekol primer, kot in promet pou fer fasilite *DOJO*, pour karate, laboks. E osi Minis pour Lendistri ki'n dir...

Annefe, parey – mon'n fer ganny en konversasyon avek Mr Collie kot *IEA Industrial Estate Authority*, kot nou'n diskite ki nou pou fer avek sa lot *building* lot kote o bor *daycare* - pli pre avek *daycare*,

kot nou'n dir nou pou fer bann *light industrial*. 3 konportman nou'n agree pou nou fer pour bann *small* – pour *agro processing*. en dimoun ki anvii fer konfitir. Bann pti keksoz koumsa.

Aprè sa 7 pour bann pti keksoz, bann pti *craft*, koud. Bann pti keksoz *light industrial* ki pa pou *disturb* latmosfer lanvironnman o bor lekol.

E tousala Mr Speaker, i bann keksoz ki mon'n ganny promet. Ki zabitan Praslin in ganny promet. Bann keksoz ki *over the years* si ou pe demande.

E si nou – mon Gouvernman, i kapab *deliver* lo sa bann keksoz, zot pe fer bokou plis ki Gouvernman avan in fer, ouswa ki Gouvernman avan pa'n zanmen kapab fer.

Mr Speaker, enn bann pli go konsern zabitan Praslin se semen. E i koute pour *maintain* transpor. Ou konnen i kout en kantite larzan. Nou tou nou konnen ozordi i pa kout en pti sou. E i tir en pe larzan dan nou pos ler transpor i kase, ouswa nou bezwen sanz en pyes.

E nou annan bann semen ki bezwen ankor en pe travay o la. E la sa bann semen plito lo kote Baie Ste Anne, Anse La Blague, Anse Boudin pou al Anse Lazio.

E travay i demare lo kote Grand Anse, Konsolasyon. Mon rapel konplent en zabitan ti dir koumsa; zot be nou, nou bann zanfan rezete nou? Kan ki semen Konsolasyon pou ganny aranze?

E ozordi nou war poudir semen Konsolasyon in ganny *surfaced* ziska lo oter Konsolasyon desandan Anse Marie Louise e pou ale Baie Ste Anne. E semen Baie Ste Anne osi pou ganny fer Mr Speaker. Vallée de Mai, osi semen fek ganny refer pa tro bokou letan.

Me nou bezwen kontinyen fini *resurface* semen Praslin. E nou annan plizyer semen segonder ki nou bezwen *resurface*. E mon konnen ler nou annan problem pou fer *alignment* semen ouswa ganny *wayleave*.

Proze lakaz osi i enportan Mr Speaker. Konsolasyon mon pe ganny 8 *unit*, me mon vwar ki i annan en pe retar avek sa proze. E mon pe fer en lapel avek *SIA* pou bouze lo sa proze, akoz zabitan Mont Plezir pe espere.

E mon menm ek *ex DA* osi nou ti fer en travay ek en legzersis. Nou de *DA*, nou'n asize nou'n rod lenformasyon. Nou'n al lo *GIS* e nou'n idantifye plizyer kare later enkli en kare 80 arpan, Mr Speaker ki nou met dan latansyon, Prezidan kot nou kapab ganny bann proze; *land bank*, *social housing*, *condominium*, ki kapab ede soulaz bann dimoun ki pe sey pri en lakaz lo lalis. Ki annan en bann ki menm 20an pe

espere pou ganny en lakaz Mr Speaker.

Pli enportan Mr Speaker, an konklizyon se nou bezwen annan en plan *maintenance*. Sa en keksoz ki Gouvernman avan ti napa.

E mon kontan pou rode ki Minis in dir; *going forward* dan tou Bidze pou annan en konponan *maintenance*. Pou annan en laliny pour *maintenance*, pou govern *maintenance* tou bann fasilite lenfrastruktir dan Gouvernman Mr Speaker.

MR DEPUTY SPEAKER

Onorab.

HON WAVEL WOODCOCK

Mr Speaker, mon annan en kantite pou mwan koz lo la.

MR DEPUTY SPEAKER

Wi, ou'n fini an defo avek *Order 57...*

HON WAVEL WOODCOCK

Me selman mon konnen mon letan in ale.

MR DEPUTY SPEAKER

...ki mon pa merit permet ou koz plis ki 30 minit. So, silvouple.

HON WAVEL WOODCOCK

Ok mersi Mr Speaker, mon ava konklir lanmenm. Mersi pou donn mwan laparol. Mersi.

(APPLAUSE)

MR DEPUTY SPEAKER

Mersi. I reste nou 2 entervenman ki pou koze. Napa ankò ki pou kapab koze lo la. E yer nou'n sorti la 6er mwen zen kar.

Mon pa pou dir zot, parski i annan 2 Manm ki'n koz 30 minit, me selman nou zis realize ki nou pe asize depi bomaten. Onorab Aglae, ou prosen entervenman.

HON EGBERT AGLAE

Mersi Mr Speaker. Bonn apremidi tou dimoun ki a lekout. Mr Speaker mon a seye pou pa fer nou sorti la 6er. Mr Speaker entervenman ki'n koz avan mwan Mr Speaker e ler mon pe ekout bann lezot Manm lo menm kote latab, bomaten ki'n koz lo sa Mosyon, i montre poudir i annan en gran tre kantite kontradiksyon.

E atraver ou Mr Speaker, sa Manm ki'n koz avan mwan i touzour annan menm *speech*, pou menm Mosyon. E pou mwan Mr Speaker, letan mon pe regard Mosyon ki la devan nou, atraver ou, Onorab William loter Mosyon, in klerman edike ki dan sa ladministrasyon i annan mank presizyon e gaspiyaz resours. Se sa ki i pe dir dan son Mosyon.

E pou mwan ler mon'n ekout entervenman avan mwan, i parey i ti pe koz lo leta son Gouvernman ozordi. Si nou fer enn pti pe letour lorizon, ek bann evantyalite pandan sa dernyen 2an edmi, en kantite keksoz arive, en kantite keksoz in pase, e sa pep - nou'n vwar dan bann sesyon *public meeting* ki'n ganny fer - in eksprim en kantite konsern; en kantite problem konpare ek sa ki nou ganny dir isi dan sa Lasanble letan bann Minis, Lotorite i vin reponn kestyon ki tou keksoz i byen.

Nou pa ti pe fer politik nou, nou ti pe kestyonnen, akòz konsern nou elektora ki met devan nou ki vin dir nou demande e nou ganny dir tou keksoz i byen.

E dan nou labsans dan sa bann *meeting*, bann sitwayen in eksplik zot, in dir sa ki nou ti pe dir menm la anndan. So lekel ki ti pe lalang ek lekel la?

Nou nou'n enn parti ki'n la depi 43an, nou pa'n en parti ki'n parfe, me nou en parti ki'n fer en kantite progre. Si ozordi zot pe koz lo *maintenance*, ou pa fer *maintenance* dan ler ou, *maintenance* i bann keksoz ki'n ganny konstrir ki la ki zot in aki ki zot in gannyen letan zot in vin o pouvwar.

Sa i nou rikord, zot ti dir zot pou fer pli byen me fer pli byen. E letan zot pe koz nou

poudir zot annan kouraz pour zot anmenn en Mosyon pour zot Gouvernman, mon pa vwar li drol si sete Onorab William, en *SPPF* en *SPUP*, en Lepep ki'n anmenn sa! Akoz i ti fer sa kot nou; i ti kestyonnen, petet i annan ki pa'n ekout li, me selman pa blanm nou ki la anndan. *Sorry!*

Onorab William ou'n annan kouraz pour ou anmenn sa Mosyon. Mon ti a swete osi ki ava swiv parey bann *core SNP*, anmenn en Mosyon prey zot osi, kestyonn zot Gouvernman parey Onorab William en ansyen *SPUP*, *SPPF*, Lepep.

(APPLAUSE)

HON EGBERT AGLAE

Mr Speaker taler ou'n dir en kontradiksyon, ou pa pe *advise* nou pour nou ekrir ouswa telefonn Minis direkteman. Me selman isi dan sa Lasanble letan nou pa ganny kestyon pa pase, ou dir anvoy en *question in writing* ou a ganny en *in writing* en larepons. Sa i enn, en kontradiksyon ki mon pe dir la.

E dan *meeting* piblik, Sef, Prezidan i dir e Minis menm dan *meeting* i dir, “be ou kapab ekrir mwan, *call* mwan”. Be ki kalite kontradiksyon sa? Mwan, mwan osi mon'n pas dan sa bann zafer pa ganny

repons *email*, pa pran *call*, menm mesaz. Akoz ozordi, nou annan diferan form kominikasyon ki nou servi, pour fasilite nou lavi avek lavansman teknolozi.

Ou kapab *text* ou kapab *WhatsApp*, ou kapab *messenger*, i annan bann lezot *aps* osi ankor ou servi *email*, be *still* i annan pa reponn ditou. I annan de semenn, mon'n anvoy en *email* swivan en size mon pa pour al an detay sa size, mon koz ek Minis, mon koz ek *PS*, mon *cc* mon *Chief Whip* osi tou ladan. Mon anvoy zot *email*, anvoy kot sa departman tou, de semenn pe al fer demen la. Ni en larepons mon pa ankor gannyen.

Mon'n anvoy lo *email address* Lasanble Nasyonal. Petet si mon ti anvoy lo mon *personal email* zot kapab anvoy mwan en *extension* kot bis pa pase. Mon servi *the official channel*, be si ou'n vwar reponn! *Acknowledge!*

Mr Speaker, petet mon a demann ou atraver ou, la eski nou *server* ti annan problem dan sa de semenn ki petet *email* pa'n ale? Mon ti a kontan konnen. Akoz pour mwan sa, se sa ki i pe montre dan sa Mosyon. Se sa ki ou vwar lakoz mank presizyon, inefikasite pour *reply* serten keksoz. Parfwa par linaksyon i koz plis problem a lavenir.

Non nou pa la pour vin kritike, nou la poudir gete, en Gouvernman pour li marse, en ladministrasyon pour marse, kominikasyon i bezwen efektiv. E ki mannyer kominikasyon i marse, i en *two-way process*, i sorti kot enn i al kot lot apre i retourn kot lot, *the sender* apre ou ganny en *feedback*, *return back to sender*. Se sa ki nou pe demande.

Menm vizit ou demande - la mwan mon annan de Minis, Bidze in pase in fer 1an, Minis pe vin vizit menm Port Glaud, la in vin dan *public meeting*, mon sey sipliy ankor parey Onorab Rocky atraver ou Mr Uranie, mon sey flate, Minis be vini! Pa konnen ki zot per laba Port Glaud mwan.

Apre i annan i pase i vin fer *meeting* dan Port Glaud i dir, “aret donn Onorab Aglae sipor” ganny dir sa dirizan LDS. Wi i vre - *Leader LDS*, mon poudir lo rikord dan sa Lasanble. Be ki mannyer nou kapab fonksyonnen? Mwan mon’n ganny elekte lo kote US e Prezidan Larepublik ti ganny elekte lo LDS ek zabitan Port Glaud. I annan responsabilite li osi e son ladministrasyon, pour fer keksoz marse.

Nou bezwen fer sir bann kalite komanter ki nou fer, akoz se sa ozordi ki ou vwar sa Mosyon in vini ki ler nou, nou ti pe koze dan Lasanble, nou ti

pe lager ek sa bann Minis, nou ti pe lager kont *Welfare*, nou ti pe lager pour dimoun, zot, zot ti trankil e zot ti akiz nou.

Be si zot ti’n donn nou lanmen parey, atraver ou Mr Speaker, Onorab Loze ti dir zot in donn en koudmen zot os pour *press for action*, *press* zot Gouvernman, ti pour napa sa Mosyon mank presizyon, gaspiyaz resours ozordi. Ti pour napa sa bann febles, ki zot Manm menm, lot kote latab depi bomaten pe dir.

Ou konnen Mr Speaker, Oktob 2020 LDS i ganny eleksyon sanzman ladministrasyon. Minis Prezidan i sanze, sa ki nou'n vwar se ki menm avek sa sanzman *at least* 80poursan bann teknisyen ankor la dan governans pe travay. I annan ki dir mon pour ale bann PS, i annan DG i annan ki’n ganny met deor tou. Me selman teknisyen, lamazorite i ankor la dan governans.

E se teknisyen ki fer laplipar bann travay teknik, pour ou kapab anmenn sa desizyon lobzektif ki sa Gouvernman i *set* koman son target, koman son prensip koman son vizyon. I sorti anler koman vizyon i desann anba kot teknisyen, teknisyen i rod en fason pour enplimante li.

E sa menm teknisyen group teknisyen ki ankor la, ti menm teknisyen ki ti la dan

nou letan – laplipar. I annan ki'n pran in vini, wi. Me selman laplipar i ankor la. So mwan mon krwar zot devret donn zot lekor kestyon letan zot ti pe akiz nou dan lepase e zot pe vwar sa problem ki zot ladan ozordi. Mon konnen zot dan serten sityasyon, kestyonn zot lekor kote problem i ete?

Nou tann dir plan stratezi, plan konpreansiv isi, laba e la mon tandé, i annan serten dan ki dan ladministrasyon in dir, “be annou aret fer plan konpreansiv annou fer stratezi, 2an edmi in arive nou pour perdi eleksyon”. Akoz zot pe asize pe fer plan menm.

Onorab William atraver ou Mr Speaker, mon pe souliny en pe kot sa bann problem i ete avek ou Mosyon. E ou Mosyon i annan serten defayans ki mwan mon vwar ou pe demann tou akter kle dan kominote, pou kontinyen revwar zot lapros pou ki i annan meyer rezilta. Lekel sa bann akter kle?

Mon krwar ou'n mank en mo ladan en? Be akter kle se Gouvernman. Tou sa bann departman ki vin dan distrik, sa bann dimoun, sa bann *staff* i sorti dan en departman gouvènmantal. *You see what is the problem?* Se sa ki mon dir i annan kontradiksyon.

E la mwan Mr Speaker, nou kapab dir poudir tir politik dan travay, me selman dan bokou lenstans kan i annan en levennman ki swa en inogirasyon, nek ou tann zis en lardon politik ganny dir, nou pe tir politik dan travay. Be nou bezwen don legzanp nou osi.

Nou, nou politisyen nou, nou koz la anndan nou bezwen fer politik la anndan nou, e i annan bann aksyon lepase ki'n ganny fer dan *rally*, dan zot konferans anyel ki zot fer, zot in dir, “be tou dimoun i en aktivis, ki ou ekspekte?” Be ou vwar politik nek i fannen partou.

So tou sa ki nou dir ozordi i annan en reperkisyon lo demen, e sa i en keksoz ki politisyen i bezwen be *mindful of*. Sa ki ou lager ozordi la kont ozordi i kapab annan en reperkisyon lo demen. E se sa ki pe arive ozordi, se ki nou vwar bokou sa ki zot in prese yer, i pe vin zot lanmen roten ozordi.

Alors Mr Speaker, Mosyon pa kapab trenn *US* pa kapab trenn 43an pase, Mosyon pe koz lo ozordi lo gouvèmans ozordi, lo mank presizyon e gaspiyaz resours - menm si Onorab ki'n koz avan mwan in dir nou'n ganny felisite enternasyonalman par bann lorganizasyon, akoz nou

pe zer byen resours, la Mosyon i dir i annan gaspiyaz resours.

Be la oli problemn? Kot problemn i ete? Be ou vwar kot mon dir en *total* - parey madanm Potter ti dir – “be zot pa dan *gear*”. So Mr Speaker, mon krwar pep Seselwa ki pe ekout nou i konpran ki dilenn nou ladan ozordi. I annan en kantite ki pe travay dan sa pei. En kantite travayer dan servis piblik e menm lo nivo distrik ki pe fer bon louvraz e mwan mon felisit zot pour zot kontinyen fer, san get okenn apartenans politik.

Menm dan mon distrik, malgre zot sey fer bann pti group pour groupe kot ladministrasyon distrik, aköz zot in *conquer* partou - mwan Egbert Aglae mon vin ek mon gran ker pour mwan donn en koudmen, aköz mwan mon *believe* dan mon distrik. Mon pa *believe* dan sa bann lideoloji ki zot pe sey anmennen, aköz zot ti lager kont sa ozordi zot anmenn menm zafer.

Be fodre nou arete sa. Pa vin fer nou krwar la deor i lizour kan i aswar. Nou vwar sa bann keksoz. E mwan mon, mon salye tou mon bann frer e ser Seselwa ki en patriot dan son pei ki pare pour donner, ki pare pour lager, ki pare poudir i mal kot i mal, i pare pour debout kan bann

desizyon i ganny pran ki pa dan son zentere.

E mwan, mwan ti a kontan bokou zot ti ava annan sa kouraz sa lenerzi pour Onorab William i annan pour kapab anmenn bann Mosyon parey, aköz i ankor annan sa disan *SPUP*, *SPPF*, Lepep dan li!

Avek sa Mr Speaker, mon pour konklir lanmenm. Mersi.

MR DEPUTY SPEAKER

Mersi Onorab Aglae e dernyen entervenans lo sa Mosyon avan ki nou donn laparol *Right of Reply* Onorab Arissol.

HON SANDY ARISSOL

Mr Speaker, mersi. Mon kontan dernyen parol ki Onorab Aglae in servi se Onorab William i en *SPUP*, *SPPF* en Lepep ki'n anmenn en Mosyon. Sel diferans ki annan ek nou ki'n akey Onorab William, zanmen dan okenn moman, menm in anmenn sa Mosyon, nou'n esey fer li sorti par lafnet parey ti arive plizyer repriz.

Letan mon get lo *Order Paper*, i annan Mosyon anmennen par Francois Adelaide, mon pa konnen si i en *SPUP*, *SPPF* en Parti Lepep, i annan en Mosyon anmennen par Onorab William, mon vwar en Mosyon pour swiv byento nou pour koz lo la anmennen par Onorab Gervais Henrie,

mon pa konnen si en *SPUP* en Parti Lepep.

I annan en Mosyon ki ti ganny anmennen par Onorab Kelly Samynadin, mon pa konnen si *SPUP* en parti Lepep. Me selman lo *Order Paper* i annan Mosyon ganny anmennen par bann Manm *LDS!*

Letan mon get lalis bann kestyon ki annan dan *bank* nou ganny dir Mr Speaker, poudir letan bann Minis i vin la, nou pa *press* zot, nou, nou pa anmenn kestyon, nou pa dir nanryen dan Lasanble Nasyonal, zis Parti *US* ki annan drwa demann kestyon.

Minis Billy Rangasamy kestyon ki mon vwar lo son lalis pour li Onorab Regina Esparon, Richard Labrosse, Gervais Henrie, Kelly Samynadin, Michel Roucou, Regina Esparon. Mon pa vwar en kestyon pour Onorab Loze. Sandy Arissol, Sandy Arissol, Michel Roucou mon pa vwar en kestyon pour Onorab Loze.

Letan mon get pour Minister Antony Derjacques Mr Speaker mon vwar Doyace Porice, Regina Esparon, Gervais Henrie, Richard Labrosse Sandy Arissol, Michel Roucou, mon pa vwar en kestyon pour Onorab Loze, ni pour Onorab Uranie.

Selman nou ki pa demann kestyon Minis, nou ki pa *press* Minis. Annou get en

lot Minister. Pa mwan ki'n fer sa papye en, papye ki Lasanble Nasyonal in donn nou, parske tou kestyon i al kot Lasanble Nasyonal.

Minis Fonseka, mon vwar trwa kestyon pour Onorab Egbert Aglae. Felisitasyon Onorab Aglae ou pe travay pour ou distrik!

Letan mon get kestyon pour Minis Marie-Celine Zialor, mon vwar Andy Labonte, Andy Labonte, Andy Labonte, Onorab Naddy Zialor, Onorab Naddy Zialor mon pa vwar en kestyon pour Onorab Uranie sorti La Digue.

Minister Hassan menm zafer, selman sa de Onorab, Onorab Loze e Onorab Uranie, zot vini zot dir ek nou, nou pa *press* Minis ase, nou pa demann kestyon. Zis zot ki demann kestyon. Selman lo *Order Paper* tou le semenn i annan kestyon sorti kot bann Manm *LDS*, parey sa semenn Onorab John Hoareau, Onorab Gervais Henrie, Onorab Gervais Henrie, Onorab Richard Labrosse, Onorab Churchill Gill i annan enn, felisitasyon Onorab Gill! Onorab Andy Labonte avek en kestyon pour Onorab Lemiel.

Me selman nou, nou ganny akize devan medya, nou pa pe demann okenn kestyon lo Minis! Nou pa koze nou! Nou pa dir nanryen nou, zis Lopozisyon ki *press* bann

Minis. Letan zot, zot fer bann gaf zot anvi nou, nou fer bann gaf parey avek zot.

Nou, nou pa pou fer gaf, nou nou pour kontinyen demann Minis, nou pour kontinyen anmenn nou bann Mosyon zis parey Onorab William anmenn en Mosyon.

Onorab William in annan kouraz pour anmenn sa Mosyon, parey lezot mon bann Manm in annan kouraz pour anmenn sa Mosyon, pour nou adres bann sityasyon dan nou pei. Yer nou ti koz lo enn, lo nivo sekirite an relasyon avek sirveyans *camera*, nou ti koze sakenn dan Lasanble Nasyonal, tou lentervansyon ti ganny fer.

E la mon kontan aköz mon ti fer en fot dan Lasanble, enn pti video pe sirkile lo mwan an relasyon avek *Alpha Blondy* avek *Jimmy Cliff*. Mon ti sitan kontan *Alpha Blondy* ki mon'n rat li, me zot, zot kontinyen anmenn sa pour donn mwan en zoli promosyon en zoli garson parey mwan zot kapab trouve, mon *happy* mon'n al enn pti pe partou, partou dan bann lakour bann dimoun.

Sa i zot fason fer travay zot. Toultan konfiz dimoun, donn en move lenpresyon e mentenir poudir pei pa pe fonksyonnen, tou keksoz i lo *hold*, aköz sa pti group minoriter dan Lasanble

Nasyonal zot ki pe sey fer pei marse.

Mr Speaker, Mosyon Onorab William mank presizyon e gaspiyaz resours? I annan! E pa bliye poudir nou en ladministrasyon ki'n erit en kantite problem. Ki problem ki nou'n erite? Letan i koz souvan mank presizyon, e gaspiyaz resours, letan ozordi ou annan bann kontrakter dan distrik ki in ganny peye avek *taxpayers money* pa delivre dan distrik.

Eski i pa swivan mank presizyon ek gaspiyaz resours? Pa zot menm dan Lasanble Nasyonal ki anmenn kestyon ki *press* Minis pour rode, eski pa sa ki i pe dir?

Dan lenplimantasyon serten proze; dan tou distrik pa nou tou ki distrik pe al menm *speed*, parske lo proze i depan ki kalite proze ki ou'n prozekte pour sa lannen, ki groser proze ki ou'n prozekte pour sa lannen, me par kont nou tou nou ganny menm finansman.

Alor i pour *ok* pour en distrik, ki son proze i al pli vit, en lot distrik son proze pour mentenir en kou. Parske i depan ki proze ki li in fer? E sa i normal dan tou distrik.

E donn servis o nivo kominote. Be lekel ki dan bann kominote? Bann *MNAs*, bann *DA*, Lapolis, Ledikasyon, Lasante, tousala i form parti

nou kominote, parey Onorab Aglae in fer nou resorti poudir dan bann pti groupman ki ganny fer lo nivo distrik, Bel Ombre osi i annan en groupman ki'n ganny fer.

Zot pe *run* en vye biro laba kot mwan, zot pe donn en kouran ilegal en dimoun lo por. Kot mwan osi i annan bann groupman, zot pe pase zot pe demande. Ou krwar Gouvernman pe byen travay? Ou krwar poudir pei pe fonksyonnn byen?

Mwan osi dan mon distrik i annan bann groupman. Be ler i annan sa kalite groupman ki mon fer, mon rod en baton mayos zot. Non! Ozordi mon bann zanmi pei in sitan lib! lib! Konpare ek 43an pase, pour tou dimoun kapab eksprim son lekor. Dir sa ki i anvi, ekrir sa ki anvi.

E la semenn pase in menm annan en zournal ki'n dekri nou *LDS* koman “lera dan semen”, “lera dan semen” selman sa menm group parti politik zot pas kot tou bann lera dan distrik, sa bann *LDS* sa ,pour zot demande ki mannyer, ou vwar pei pe marse? Ki mon krwar nou tou nou bezwen met en pos ek nou lakaz, pa vin kot nou aköz nou bann lera!

Selman zot sa parti politik ozordi, ki pe donn lesou Lepep Seselwa! Zot ki vin dan nou Lasanble Nasyonall ki dir

ek nou dan zot pti papye, “sak fwa nou koze bann *LDS* zot riye, zot rikannen!” Prezan menm riye lo nou kote, nou pour bezwen demann zot permisyon pour nou riye ler zot koz lo en size. Aköz zot pe rod enn pti paragraf, pour met dan zot papye ki vid ki personnn pa enterese koz lo la, oubyen lir.

Mr Speaker, sa i leta nou pei. Letan Onorab William i dir i demann ek tou akter kle dan kominote pour kontinyen revwar zot lapros. I *ok!* Parske ozordi nou annan nou bann *MNA SPPF*, ki refize asiste bann dimoun ki'n siport *LDS!* Zot pa koz lo la sa!

Letan bann *DA SPPF* i refize asiste bann dimoun, zot dir, “en! Be i ti dan tik anler li, pa in tik anler ki i pe rode prezan?”

Sa ki Mosyon pe demande. Nou tou nou ti a kontan dan en kominote en pei kot tou dimoun i delivre, nenport ki lopinyon politik ou ete, si ou'n deside travay dan Gouvernman ou bezwen delivre. Sansan ou plas travay pa devret dan Gouvernman, ou devret annan en biznes pour ou, ki ou ava dir zis *US* vin kot mwan, *LDS* a laport!

Se sa ki Mosyon pe demande e se sa ki Prezidan Larepublik i kontinyelman dir dan bann *meeting* piblik. Parske Lepep Seselwa dan

meeting piblik, in fer resorti wi! I annan lenstans kot let pa ganny reponn. Wi! I annan lenstans kot telefonn pa ganny reponn, e i ariv avek nou osi koman *MNA*, parey Chair in fer resorti - Mr Speaker in fer resorti, ler ou asize dan Lasanble dimoun i *call* ou. Selman ou *live* lo televizyon ek lo radyo. Selman i ekspekte ou reponn son *call*.

Dimoun en pye dibwa i tonbe lo son lakaz, premye landrwa ki *call* i *call MNA*. Si en dife i pran dan bwa premye landrwa ki i *call, MNA*. Si rigol i bouse, i *call MNA*. Si semen pa netwaye, i *call MNA* me pourtan dan tou distrik Mr Speaker ou annan bann lazans ki'n ganny plase, pour *deal* avek plizyer sityasyon dan nou pei. Se sa ki mon konpran Mosyon pe demande mwan.

Ler Mosyon pe demann sa i pa vadir pe vir anba lao li. Non! Pei pe fonksyonnen. Ozordi mon *happy* kalite devlopman ki i annan lo La Digue ozordi, i plis devlopman ki annan lo Bel Ombre, me pourtan La Digue i en distrik ki'n vot *US*.

Be pour sa mon bezwen bat Prezidan Larepublik, bat Minis Finans. Non! Mon kontan pour La Digue, parske La Digue in ganny neglize pour plizyer lannen. Felisitasyon La

Digue pour bann gro proze ki zot in gannyen.

(APPLAUSE)

HON SANDY ARISSOL

Me par kont nou pa kapab annan en *MNA* ki vini ki reprezant La Digue, i pa asiste *meeting* piblik kot bann dimoun ki adres zot problem, me mon vwar Loncey Micoock ki pe defann tou La Digue, tou Digwa, reponn tou kestyon. Sa pa akseptab! Sa pa akseptab sa parske li ki Manm Elekte.

Me par kont i vini i dir avek ou zot vini zot pa envit mwan, zot vini zot vin an sou sekre, be nou Komite Defans, nou ti mont La Digue, nou ti al pour al vizit bann proze nou ti envit li Mr Speaker, i pa ti vini li! Onorab Uranie pa ti *turn up* li. Zis *DA* ki ti vini.

Me apre Onorab Uranie i vin dan Lasanble Nasyonal, akoz nou ganny medya nasyonal, nou dir nou pa ganny envite. Be Lafet Lendepandans, ler zot, zot ti fer *advert* pour dimoun desann dan zot *United Square*, pour vin selebre lendepandans. Be nou ti envit zot boner zot pour vin selebre ek nou Lafet Lendepandans.

Me zot pa ti vini Mr Speaker, zot refize vini. Me apre zot ganny medya Nasyonal, zot vin dan Lasanble, e zot dir zot pa

ganny envite. Zot vin an sou sekre, zot kree bann pti group, e zot dir pa donn sipor Onorab Aglae.

Se sa ki Mosyon pe demande, Mosyon pe dir la ozordi, nou koman en Lasanble annou zwenn, annou rode koman tou bann akter, akoz nou osi nou akter pour nou rode ki mannyer nou kominote i travay.

Sel keksoz ki nou anvi, nou anvi en Gouvernman ki efikas, e tou bann dimoun - nou annan plizyer bann dimoun ki travay dan Gouvernman ki pa siport nou. Nou konnen sa.

Me selman, nou pa enterese si ou siport nou, si ou pa siport nou. Nou sa ki nou enterese ou reponn sa telefonn, ou rann larepons sa let, ou asiste sa dimoun, e ou desarz ou responsabilite. Setou ki nou pe rode nou.

Ou politik ou al fer li *United Square*, si ou siport sa parti minoriter, oubyen ou a vin dan en pli gran landrwa parey *Freedom Square*, si ou siport sa pli gro parti politik ki apel *LDS*, dan Sesel. Se tou ki nou pe rode Mr Speaker. E Mosyon Onorab, Onorab William ler mon ava pe terminen, pe demann egzaktaman sa, napa okenn konplikasyon ladan.

La lot semenn mon krwar ou konnen si Onorab Henrie

pa pour dan *Chair*, mon pa konpran kote ou Mosyon san sey koz lo ou Mosyon, ki mannyer zot pour al avek sa?

Onorab William felisitasyon pour en Manm *SPUP*, Parti Lepep, *SPPF*, ki ou ete ozordi ou *LDS*, felisitasyon pour ou Mosyon, parske sa i montre poudir nou osi menm nou dan Gouvernman, nou kapab anmenn bann pwennvi, fer bann komanter e adres sityasyon parey i ete dan nou pei.

De semenn pase nou ti anmenn en Mosyon, zot dir nek anmenn Mosyon zis pour flat Gouvernman, zis pour lis Gouvernman, pour fer krwar tou keksoz i byen. La ler nou anmennen en pe le kontrer, *still* zot pa kontan menm, *still* pa bon menm, *still* pa'n envit zot, fer bann pti group par kote, pe koz lo zot, pa pe siport zot. Zot be zot be zot be konbyen letan zot pour ale koumsa?

E de plis zot vire zot dir ek nou Mr Speaker se nou ki annan problenm, get dan nou parti nou annan problenm. *Mes chers amis* annou aret koz problenm dan nou parti, lot kote laba mon'n i annan en lalis in sorti bann *proposed Cabinet of Ministers* ki pe vin kot zot la.

Mon'n vwar la i annan en lalis in sorti la, Mr Speaker avek mwan la. Annou pa koz

problemm dan nou parti, nou, nou annan bann Minis pe travay nou; nou annan bann Minis pe travay. Mon pa mansyonn zot non konmela, akoz mon aprann zot pa ankor ganny aprouve parske i paret i annan en pe problemm, parske i annan bann ki ti dir mwan poudir mon'n fer trwa term dan Lasanble mon pa ankor ganny en plas Minis la.

Mwan mon *happy* mon reste dan Lasanble 5an, 10an, 15an, 20an mwan, ki mon ganny en plas Minis, apre mon ganny pouse Minis mon bezwen rod en plas dan Lasanble, bar plas en lot dimoun! Mon *happy* kot mon ete mwan. E mon pe fer en travay pour mwan pei *ok*?

So alor nou lo nou kote *comme d'habitude*, nou pour kontinyen siport Gouvernman, nou pour kontinyen felisit e siport tou travayer Seselwa ki pe delivre dan sa pei. Nou bezwen siport zot e an menm tan nou le ki zot kontinyen delivre parske Mr Speaker mon a fini lo sa note, Onorab Kelly Samynadin ti anmenn en Mosyon ki ti pe demann bann paran pour siport laprantisaz zot zanfan. Ou konnen akoz?

Parske zanfan i komans dan lekol, mon rapel de semenn, trwa, kat semenn pase, oubyen en mwan pase Lekol Beau Vallon Primer ti pe

selebre 25an zot legzistans. E zot moto zot se, "En lekol ki kontinyen fer pli byen, pli byen e pli byen".

Letan nou pe ankouraz nou zanfan pour fer pli byen e paran pour siport laprantisaz zot zanfan, parske nou anvi nou bann zanfan Seselwa zot *end up* dan en karyer pozitiv, kontribye pour pei e pour rann lakominote en servis ekselan koman bann akter dan kominote, pour nou kontinyen revwar zot lapros, pour ki i annan en meyer rezilta parey Mosyon pe demande.

Avek sa detrwa mo Mr Speaker, nou lo kote latab nou pour siport sa Mosyon. Nou pour siport nou Gouvernman pour travay zot pe fer. Nou pour siport tou nou Minis parske nou kontinyen anmenn kestyon.

Semenn prosenn pou annan ankor 12 kestyon ankor sorti kot nou, nou pour kontinyen anmenn bann Mosyon parey zot vwar lo *Order Paper*, pour nou kontinyen fer nou travay, olye zis plennyen, plennyen, plennyen! Pour leres lazournen. Mersi bokou Mr Speaker.

(APPLAUSE)

MR DEPUTY SPEAKER

Mersi Onorab. Mon'n vwar lanmen Onorab Loze. Ou ava *state* ou *Order* silvouple?

HON JOHAN LOZE

Non Mr Speaker, mon pe lev mon lanmen *as a friend of the Chair*, mon napa okenn kankan pour mwan al melanz ladan. Mon pe plito mazinen Mr Speaker, si pa ti a byen ki Lasanble i pronons son lekor aprezan lo *aproporsyonman* kestyon lo *Order Paper* pour dimoun konpran. Akoz i annan tan ou tan, ou tan sorti en kote. I annan en formil ki zot, zot servi lo *ABC*, pour desid *aproporsyonman* lakantite. So vi ki

HON JOHAN LOZE

Wi. Normalman akoz i lafors politik. Si 8 kestyon i dwatet 5/3 - 5/3 parey nou vwar lo Komite i 5/2 solman i annan bann komite ki nou santi i enportan, parey *FPAC*, parey Ladefans nou donn Lopozisyon 3 syez olye 2. So wi i reprezant balans politik.

HON JOHAN LOZE

So tou le semenn i 5 kestyon *LDS*, 3 kestyon *United Seychelles* e se koumsa ki kestyon i ganny *aproporsyonnen* lo *Order Paper*? E si mon pa tronpe ti annan en kestyon Onorab Aglae ki'n tonbe sa semenn osi? Zis mon ti anvi...

MR DEPUTY SPEAKER

Wi akoz i ti'n *address to the wrong Ministry*.

HON JOHAN LOZE

Thank you, Mr Speaker. Mersi byen.

MR DEPUTY SPEAKER

Nou'n ariv ler aprezan pour *Right of Reply* e alor mon ava donn laparol Onorab William.

HON WAVEN WILLIAM

Mersi Mr Speaker. Mr Speaker avan ki mon al lo mon konklizyon mon ti a kontan fer enn de komanter lo sa ki'n ganny dir par lot kote latab.

Mr Speaker, i konmanse par Onorab Johan Loze. Zis pour eklersi e met keksoz dan konteks Mr Speaker, se ki Bidze pei i konsern larzan ki ladministrasyon i bezwen depanse. Mr Speaker lo sa rol *oversight*, e rann kont i devwar Manm Lasanble atraver kestyon ouswa Mosyon pour li fer sorti bann konsern, ki annan pour fer avek lafason ki zesyon larzan e ladministrasyon pe marse, vizavi devlopman Nasyonal e sosyoekonomik pei.

So en nenport Manm Mr Speaker, i kapab swazir pour anmenn Mosyon baze lo bann konsern, parey mon'n dir oparavan ki demontre ki Manm i konekte avek

sityasyon e konsern ki zabitan son distrik i annan.

Mr Speaker, vizavi Onorab Uranie. Wi Onorab Uranie atraver ou Mr Speaker, mon pour anmennen Mosyon, akòz mon'n vin isi dan sa Lasanble pa pour asize me pour vin travay.

(APPLAUSE)

HON WAVEN WILLIAM

E i mon devwar anmenn plizyer Mosyon ki mon santi ki mon bezwen tir latansyon Gouvernman. Me mon a dir li atraver ou Mr Speaker, si i napa nanryen pou dir pa dir nanryen.

Mr Speaker, ki anmenn mwan lo en lot entervansyon Onorab Aglae. Mr Speaker, mon anvi dir ek Onorab Aglae ki letan mon ti pe egzers mon drwa pour mwan reprezant pep Grand Anse Mahe e koz libreman, mon ti pe ganny anpese, sanksyonnen, e mon kontan mon'n debarke lo zot kote!

(APPLAUSE)

HON WAVEN WILLIAM

Mr Speaker, mon apresye ki dan sa kote, bomaten letan mon'n prezant Mosyon Mr Speaker, lafason mon'n koze *Chief Whip* or Onorab Sandy Arissol dan *tea break*, pa'n graponn mwan, ouswa dispit

avek mwan, ouswa parey li menm in dir, parey mon ti pour eksperyans pas par lafnet! I pa'n fer sa Mr Speaker, me zot in akey, zot akey rezondet, rezon akòz ki sa Mosyon in ganny met devan. Zot regard son merit.

Mr Speaker, ankor pour ekersi se ki letan mon ti komans mon lentervansyon, mon ti vwar li neseseur pour kalifye sa mo, sa de mo “akter kle”, Mr Speaker mon krwar Onorab *Chief Whip* in fer sa tre kler.

Enn ki mon'n oubliye Mr Speaker, ki pe vremen mon kapab dir ozordi dan nou demokrasi, pe fer serten keksoz ki mon kapab dir, i kapab retard progre en nenport Gouvernman ki o pouvwar, se lafason ki serten politisyen i travay. E politisyen osi i en akter kle Mr Speaker. E ozordi, i annan bokou lenfliyans dan distrik.

E mon pour dir sa, e kalifye Mr Speaker, siport li par serten pwen. Letan ou ganny politisyen ki pe pase, ki pe dir avek bann dimoun, ki “Onorab pa pe fer nanryen”, ouswa “Gouvernman napa ou lentere”, e menm Mr Speaker dekouraz sitwayen pour partisip dan bann Komite distrik, “pa lo Komite *LDS* - distrik parey trwazyenm az avek lazenes!”

So ou vwar ki fason Mosyon pe ganny anmennen pour fer sir ki nou pran serten pozisyon e serten pwen komen dan lavi devlopman sa pei.

Mr Speaker mon santi ozordi ki kot nou'n arive dan letap devlopman sa pei, e mon mazine petet se en diskisyon ki kapab ganny anmennen lo nivo enternasyonal. Letan mon pe koz la demokrasi. Mr Speaker, si ou pour, si ou pour tradwir la demokrasi, senpleman nou pe koz lo pouvwar Lepep.

Mr Speaker, me ozordi Sesel ou pe vwar e dan plizyer pei, kot letan Lepep in egzers son drwa iniversel, ler ou annan en Lopozisyon, li ki pe pres demokrasi, i pa anvi respekte drwa Lepep Mr Speaker! E mon propozisyon mwan se ki par lefe ki nou pe konsider revwar e amann Konstitisyon dan lavenir, avek Lalwa Parti Politik, mwan mon pe sizere ki sa eleman politik, pour parti politik, avek politisyen i ganny antre, i ganny konsidere.

Akoz Mr Speaker nou vwar ki pa pe - ki pe arive lo kontinan Lafrik, kot parti politik ki perdi i kapab sabotaz aki devlopman sosyoekonomik en pei, par bann aksyon ki pa dezirab!

Me eski la ou pa pe vyol *Charte* drwa dan Konstitisyon sa dimoun, pour li progresse

dan devlopman pei, aköz ou lentere parti politik?

So Mr Speaker, sa en size ki mon krwar dan lavenir, nou pour bezwen aborde, aköz mon santi poudir a plizyer enstan i pe diviz pei, i pe fer sitwayen al kont kanmarad, ay kanmarad, se lafason ki politisyen i pratik politik ki en politik ki pa soutenab Mr Speaker, pour devlopman lavenir par lefe ki nou tou nou rekonnet, ki Sesel i enn pti pei vilnerab. E nou pa kapab, nou pa kapab fer bann fason fer, annan bann adopte bann fason fer ki pour detri sa bann aki.

Mr Speaker, an konklizyon osi mon ti a kontan met devan serten bann rekomandasyon. Mr Speaker, premye rekomandasyon ki mon ti a kontan met devan se ki Prezidan atraver sa bann *meeting* piblik, e osi atraver sa Mosyon, pandan moman ki pe konsider bann stratezi pour *deal* avek bann konsern e problem, mon pe demande ki i konsider ankouraz son bann Minis - pa pour fer li toulezour - me konsider 2 fwa dan en lannen, pour vin dan distrik zwen ansanm avek Lotorite Distrik annou konsilte; annou vwar stati bann konsern e proze, pour nou kapab donn direksyon e fer keksoz bouze.

Mr Speaker, sa i a sov en pe sa lour travay lo Prezidan akoz mon santi si sa i ganny fer Mr Speaker, si Minis pa kapab vini me *at least PS* i kapab vini. Ki nou a kapab diskite. Akoz mon santi poudir i manke, i manke sa konneksyon ki a fer ki petet bann problem e konsern i ava *deal* avek.

Mon dezyenm rekomandasyon Mr Speaker, mon rekonnèt akòz Lazans SIA ti nesese ganny fer. Mr Speaker wi mon rekonnèt zot pe fer en travay fantastik. Me rezon ki mon'n demann revwar Mr Speaker, se ki i annan serten retar e mon pe demande swa zot ganny donner plis resours, pour zot kapab delivre pli efikasman; ouswa Mr Speaker zot konsider serten pledwari ki mon konnen parmi nou *Caucus* parfwa nou diskite, me akòz pa konsider kas travay bann pti proze i ganny anvoye dan distrik, kot ava tir enn pti pe lour.

Akòz ler ou pe regarde i annan proze nasyonal an menm tan bann pti proze distrik. E byensir Mr Speaker, proze nasyonal i bezwen pas avan tou, me selman nou annan sa demann e *backlog* o nivo distrik, ki mon santi poudir sa rekomandasyon ki pe devan petet ti a bon ki i ganny konsidere.

Mr Speaker, mon trwazyenm rekomandasyon, mon demande pandan ki lamannman Lalwa Parti Politik e Konstitisyon pe ganny konsidere Mr Speaker, sa eleman Kod Etik parti politik ensi ki bann politisyen i ganny revwar.

Mr Speaker, i annan sa neseseite pour fer sa, pour enn, sofgard nou demokrasi an menm tan sofgard sa *charte* Drwa Imen ki dan nou Konstitisyon. Mr Speaker, si mon al pli lwen, nou pe sofgard sa drwa dan Konstitisyon, me solman pour en nenport Gouvernman nou pa – nou pa sofgard li ase pour kapab - enn ankadre, pour li kapab enplimant son program, san ki i annan bann lenfliyans parey mon dir kapab destabiliz pei, Mr Speaker.

E pa bliye ozordi parti politik ouswa politisyen, i rod tou sord kalite fason pour zot kapab enn met retar. Mr Speaker, mon katriyenm rekomandasyon se ki Egzekitiv dan sa tranzisyon ki pei pe pas atraver, i balans sa laspe ledikasyon avek sansibilizasyon ek bann mezir ekonomik ki anfers, ki pep i reste azour pour vreman pran *ownership* plan stratezik devlopman pei.

Mr Speaker, ki sitwayen i volonterman pran *ownership*,

e reponn lapel pour travay pli dir. Mr Speaker, sa i koz pour li menm. Si ou pa pe pran *ownership* Mr Speaker, ou pa santi ou angaze. So i annan sa neseseite, pour sansibilizasyon e ledikasyon, pour anmenn tou dimoun *onboard* parey nou dir *the inclusivity* i vremen enportan.

Mr Speaker, senkyenmman. Ki sa fason fer Mr Speaker, *one-size fits-all approach* Mr Speaker, nou bezwen revwar. Nou'n koz bokou lo la. Nou aksepte ki wi sa pa devret leka Mr Speaker, me nou kontinyelman servi li akoz dan ka Grand Anse Mahe mon santi parfwa sa *one-size-fits-all approach*, pa neseseiman pe ed nou, akoz i annan en Manm ki'n dir taler, nou annan bann diferan spesifisite Mr Speaker.

E sa bann spesifisite si Lotorite Distrik pe met devan e i pa ganny ankadre dan sa plan stratezik Mr Speaker, nou kapab ganny kit deryer, ouswa serten group dimoun, serten distrik lo serten program i kapab ganny kit deryer.

Mr Speaker, sizyenmman mon demande ki Gouvernman, anvi ki zot pe *award* kontra e evalye bann - zot bezwen evalye byen bann kontrakter Mr Speaker. Mr Speaker dan sa sekter, mon

vwar poudir i annan lespas pour nou fer pli byen.

Me nou pour bezwen kapab enn annan listwar lo bann kontrakter, nou pour bezwen kapab met bann kondisyon ki sa kontrakter letan i pe ganny donner sa kontra, i pa komanse epi aret dan semen Mr Speaker.

E mon santi poudir petet serten sonm anba *Contingency Fund* i ganny mete de kote, akoz ki i arive i annan bann lenstans kot kontrakter i santi li dan difikilte, akoz i annan keksoz, problem ki monte letan i pe enplimant sa travay, ki li menm li i pa'n prevwar. e dan scope of *work* Mr Speaker, pa'n ganny enkli e prezan ou vwar ki travay i arete, ou bezwen *retender* Mr Speaker, pour kapab ganny sa Bidze apropiye pour kapab konplet sa proze.

Mr Speaker, e la ou vwar poudir sa kontrakter letan i pe espere, ki i fer li prezan bezwen taye al fer en lot proze, pour li kapab ganny larzan, pour li kapab pey son travayer an menm tan pey son *tax*. So i annan tout en problem ki mon santi poudir i annan sa neseseite, pour diskit ankor lo la.

Mr Speaker mon dernyen sizesyon, mon osi rekonnnet plizyer defayans, ki pti kontrakter zot annan Mr Speaker e mon pe sizere ki SIA

i komans en konversasyon Mr Speaker. Akoz ler ou regarde i annan diferan groser kontrakter, pour kapab vremen konpran sityasyon, ki personn pa santi zot defavorize Mr Speaker letan i annan proze dan distrik.

Mr Speaker, atraver mon Mosyon mon anvi rapel zabitan distrik ki mon pe vwar piblik La Misère tou le Zedi apremidi, Vandredi apremidi mon Grand Anse Mahe. Zot pa pour vwar mwan pe vin fatig zot toulezour devan zot laport. Mon annan en program vizit ki mon pe sivre, me si en sitwayen i telefonn mwan pour pas kot zot mon pour fer li.

Setadir, ler zot vwar lezot reprezantan parti politik ki'n perdi eleksyon, pe vin rod popilarite ankor, zwe lo zot moral ek plizyer size, ki zot Gouvernman pa'n rezourd depi sa 43an, i annan tou zot letan - zot annan tou letan pour pase Mr Speaker pour fer sa.

E mwan ki'n ganny elekte mon annan plizyer bann langazman, alors pa ekspekte mon pour vin fer parey zot. Mr Speaker, i pa mon lentansyon, pour al veye ki zot fer ki mon pa pe fer. Alors parey Onorab Arissol in dir taler, tou dimoun i annan sa laliberte ozordi.

Mr Speaker, me o kontrè an siny respe, pour drwa imen, bann ki dapre eleksyon

zot in dir ki zot pa anvi nanryen pour fer avek mwan, ouswa bann ki'n dir mwan pa pas ankor kot zot, mon pour respekte zot drwa Mr Speaker. Me mon laport i reste ouver pour zot si zot vin vwar mwan Zedi ouswa Vandredi.

Mr Speaker, la en legzanp kot mon pe respekte drwa imen. Letan en dimoun i dir ou be pa pas kot li, ouswa i napa nanryen pour fer avek ou, i dir ou dan ou figir, bezwen respekte son drwa, me solman ou kree sa loportinite pour nou kapab akoste ankor, atraver klinik ki ou fer.

Mr Speaker, mon anvi dir zot ki zot pour vwar mwan dan maryaz, me kot lanterman wi, akoz laplipar zot mon konn zot, e mon la pour solider avek zot.

Mr Speaker, anba program administrasyon distrik i annan plizyer program e group parey trwazyenm-az e lazenes. Mon anvi al dir avek zabitan sa i la pour zot, si zot pa vin devan, lezot i vin devan, demen bomaten nou pa pour kapab dir ki nou pa anvi enkli zot. Si zot les zot ganny dekouraze par politisyen, ki vwar zis politik, me pa get devlopman imen e devlopman sosyoekonomik distrik avek pei.

Mr Speaker, mon le konklir par remersi tou bann

Manm ki'n kontribye sirtou lo nou kote Mr Speaker ki'n vwar merit sa Mosyon. Mon anvi profit lokazyon ankor pour remerisi ladministrasyon distrik, dan organiz *meeting* piblik avek Prezidan. Mon anvi osi remerisi tou bann dimoun ki ti vini, e bann ki pa'n ganny sans vini, mon demann zot pour konsidere, akoz pa les politisyen afekte zot drwa partisipe.

Mr Speaker, avek sa de mo mon demann tou Manm pour vot lo sa Mosyon, akoz sa Mosyon pe demontre ki koman en Lasanble, ki'n swivre *meeting* piblik, an menm tan konekte avek nou distrik nou vwar merit dan sa Mosyon. Mersi Mr Speaker.

(APPLAUSE)

MR DEPUTY SPEAKER

Mersi Onorab pour sa *summing up*. Donk in ariv ler pour nou pran en vot lo sa Mosyon e mon ava zis relir kestyon ki devan Lasanble;

“Swivan mank presizyon e gaspiyaz resours dan lenplimantasyon serten proze e donn servis o nivo kominote, Lasanble i demann avek tou akter kle dan kominote pou kontinyen revwar zot lapros pou ki i annan meyer rezilta.”

Mon ava demann tou Manm ki an faver pour endike silvouple? Mersi. Okenn

Manm ki kont? Mersi. Mersi Madanm Deputy.

Donk pour kestyon ki mon fek poz Lasanble. In annan 17 Manm ki'n vot an faver, okenn Manm pa'n vot kont e 6 Manm in abstenir. Donk sa Mosyon in ganny aprouve par Lasanble Nasyonal.

Avan ki nou ariv lafen nou travay pour ozordi, Lasanble Nasyonal i a rapel ki yer i annan de size ki Dirizan Lopozisyon ti demann mon lopinyon lo la. Enn i konsern Mosyon - lo size Mosyon apre Mosyon Onorab Adelaide e lot i ti lev en *matter of privilege* ki mon bezwen donn en *ruling* lo la.

Mon pour pran premye size ki konsern Mosyon swivan Mosyon ki ti table yer par Onorab Adelaide, ki ti pe adres sitwayen. E kestyon sete eski Lasanble i merit viz Mosyon ver zis Gouvernman?

Dan mon lopinyon Mosyon i propozisyon ki ganny met de lavan pou en deba e pou Lasanble pran en desizyon. I en propozisyon pou fer en keksoz, sanmenm sa i sipoze ganny fraz dan en fason pou pran en aksyon, ouswa eksprim en lopinyon.

Ler en Mosyon i pase i vin en rezolisyon. Nou souvan dir ki Mosyon pa *binding*, e mwan mon krwar ki sa krwayans in ler pou Lasanble sanze.

Dan son rol Lasanble i pas Lalwa, i fer *oversight*, e reprezantasyon. Dan son rol *oversight* mon santi i kapab fer en demann avek tou antite, piblik, prive non-gouvernmental ou relizye, ki ganny en larzan pou zer zot lekor avek Gouvernman atraver Bidze Anyel pei.

Dan son rol reprezantasyon, mon santi i kapab fer en demann avek tou antite piblik, prive, non-gouvernmental ou relizye, ki nou bann *constituents* i bezwen zot pou amelyor zot lavi.

An dot mo, wi nou kapab table en Mosyon ki fer en demann avek lezot antite, apard Brans Egzekitiv pei. Me sa i mon lopinyon konman MNA Mont Buxton, konman *Chairman Standing Orders Committee* e konman Deputy Speaker ki la pe *deputize* koman Speaker.

Alors sa ki mon pe dir se ki i neselit plis refleksyon e ankor diskisyon. E mon pe envit sak Manm sa setyenm Lasanble, le de *Caucuses* e Lasanble Nasyonal kolektivman pou analiz profondeman, ki direksyon nou oule ale koman Brans Lezislativ Gouvernman, an sa ki konsern Mosyon. Ki kalite Mosyon nou kontinyen anmennen? Ver lekel nou merit adrese? Kan nou table

sa bann Mosyon? Ki kantite nou ki koze lo sak Mosyon? Kwa ki nou dir?

Mon'n fer en legzersis bomaten i annan 15 Manm ki'n koze lo sa Mosyon dan en lespas 6 erdtan. Kwa ki nou'n nabou prodwir dan sa 6 erdtan? E annou konpar li avek en mason. Konbyen blok in mete dan en laliny? En peser konbyen pwason in atrape? En planter ouswa en fermye konbyen plant in met dan later?

Me sa ki nou merit osi konsidere, se ki mannyer nou asire ki sa bann propozisyon i ganny lavi, e pli enportan vin *binding*. Alors sa i bann refleksyon ki mon kit zot avek e sa i-mon *ruling* lo size. Eski Lasanble i merit viz Mosyon zis ver Gouvernman?

Dezyenmman *matter of privilege Leader* Lopozisyon ki i ti leve yer, konsernan en ladres Speaker Mancienne.

Sa levennman ki Dirizan Lopozisyon in fer referans avek yer dan son *matter of privilege*, i konsern sa Servis Aksyon de Gras istorik, organize par platform enter-relizye Nasyonal, *SIFCO* le 29 Zen.

Bi sa servis sete pou anmenn tou Seselwa ansanm alokasyon nou Lafet Nasyonal, dan lespri linite e pou promouvwar lape. Sete pou rapel nou ki ler i annan en keksoz mal dan nou pei, nou

kapab adres li ansanm avek respe e tolerans.

Sete pou rapel nou ki, sa ki dwatet pe inifye nou koman en Nasyon, koman imen e antan ki krwayan, se lanmour.

Speaker Roger Mancienne ti ganny envite koman Sef Brans Lezislativ, pou fer en refleksyon spirityel e i ti swazir pou koz lo ki manner dan Lasanble Nasyonal, nou merit pe travay dan linite, koman en legzanp pour nou pei.

I enportan note ki lo komansman son entervansyon i ti dir, e mon site, “mon met tit e ran dekote pou adres zot koman lafanmir nou nasyon”.

I ti rapel nou, ki nou pei i souvan ganny dekri koman en paradi e ki sa i en gran lekspektasyon. Menm ler nou napa divizyon lo baz relizye ouswa ras etnik, i ti dir nou merit aksepte ki annan divizyon an se ki konsern - an komansman par divizyon lafanmir, endividyel, lanbisyon personnel, me i ti swazir pou adres divizyon politik.

I ti rapel nou ki sa divizyon i siperfisyel, aköz tou parti politik i pres preski menm mesaz e annan preski menm bi pour Gouvernman e ki nou anvi fer koman en nasyon. Nou divizyon i ti rapel nou, i tou senpleman aköz

apartenans a en parti politik a en lot.

Mon'n ekout *matter of privilege Leader* Lopozisyon e mon respekte son lopinyon.

Letan i dir ki bann komanter e bann parol ki'n ganny servi dan sa entervansyon pa enspir linite e latolerans, mon rapel Onorab Pillay ki konsey Mr Speaker sete ki nou kapab sirmont sa divizyon, aköz loportinite i la devan nou.

Apré ou lobzeksyon lo son entervansyon, mon al re-ekout sa diskour e mon antann en Seselwa ki'n viv dan diferan lepok evolisyon nou pei e son la demokrasi, e ki ti pe ofer en perspektiv inik nou lenstitisyon.

Sete la kot i ti konsey nou koman Manm Lasanble Nasyonal, ki i nou responsabilite pou montre ki manner nou kapab sirmont nou divizyon.

Son konsey sete, ki i en rol e latas enportan pou anmenn nou pei ansanm e ki nou bezwen en legzanp pour bann dimoun ki swiv nou. Koman en Manm ki pli aze ki nou isi anndan e ranpli avek leksperyans lavi, i ti rapel nou ki nou kapab fer en keksoz – ki nou pa kapab plito fer en keksoz e apre demann dimoun ki siport nou fer en keksoz diferan. E sirtou pour bann zanfan, nou bezwen donn zot

legzanp mannyer nou oule zot grandi.

Koman en dimoun avek konesans e lasazes, in senpleman ankouraz nou pour adopte serten valer ki fondamantal pour linite. Sa ki i ti dir i enkli laverite, liminite, konprenezon e respe pour sakenn antre nou, pour dimoun ki nou an kontak avek e respe pour nou oponan politik.

Mon pa partaz lopinyon Dirizan Lopozisyon ki sa diskour in demontre en mank lendependans dan son rol Speaker, kot i pa'n kapab separ son rol koman Dirizan LDS e Speaker Lasanble Nasyonal.

Annefe, Onorab pa devret bliye ki Speaker parey li, i osi en Manm sa Lasanble e i annan menm drwa ki nenport parmi nou pou eksprim li kan lokazyon i permet.

Dan son rol Speaker, Sef en Brans Gouvernman - Speaker i annan en devwar sezi lokazyon ler i ganny demande pou adres lanasyon pou fer – fer li pour fer pas bann mesaz pou met an konteks ki mannyer ki i swete ki Seselwa i devret viv, konmansan par sa brans ki li i ansarz.

Mon a rapel Lasanble, ki dan son lentervansyon, Speaker pa'n mansyon non

okenn parti politik, oubyen en endividi. In koz pour nou tou, lo tou lede kote latap, e pour pep Seselwa an-antye.

Mon vwar sa lentervansyon koman enn ki i pe esey fer dibyen atraver en lobligasyon moral pou reste, pour li reste koman Speaker angaze avek bann akter kle dan nou sosyete.

Pli enportan, atraver son laz e leksperyans, Speaker Mancienne ti rapel nou, ki si nou ranforsi sa bann valer ki mon'n mansyonnen avan, tel ki laverite liminite, i lakle pour linite.

Dan en letan kot i annan bann zenn politisyen lo tou lede kote latap, ki oule score en pwen politik a sak lokazyon ki nou gannyen, Speaker Mancienne ki a mon anvi, i annan en konprenezon profon dan konteks politik nou pei, i annan sa konsey pour nou, “annou apros nou travay avek lanmour e nou avar asir linite”.

Bann parol ki'n ganny servi pa'n target okenn group dimoun malapropo. Mon envit tou Manm Lasanble Nasyonal parey mwan, pou re-ekout sa lentervansyon koman en konsey e gidans, ki kapab permet nou e sa nouvo zenerasyon dirizan, navig bann defi nou parkour koman politisyen.

Si in fer en keksoz atraver son lentervansyon, se donn nou en kado lasazes, lonnekte e bon zizman e nou merit remersi Onorab Speaker pour sa.

Pou sit Proverb Ezai sapit 19, Verse 20 a 21 ki dir, “Ekout konsey e aksepte disiplin, a lafen ou pou ganny konte parmi bann sarz”.

Alor Onorab, mon pa santi ki ou privez, ouswa sa ki pour okenn Manm Lasanble Nasyonal partikilyerman lo ou kote latab in ganny afekte. Sa i mon *ruling* lo sa *matter of privilege*. Mersi.

(APPLAUSE)

MR DEPUTY SPEAKER

In ler aprezan pour nou ariv lafen nou travay pour sa Mercredi. Mersi pour tou kontribisyon ki'n annan. Mon krwar nou'n travay de zour en pe pli long ki labitid. Nou pour *adjourn* la e nou pour rebran sesyon travay Mardi 9er bomaten. Mersi.

(ADJOURNMENT)